

ПЕТӖ 1926 ВОСЯНЬ

ЛЭДЗӖНЫ: КОМИ РЕСПУБЛИКАСА ГИЖЫСЬ КОТЫР, ПЕЧАТЬ ДА ЮӖР
СЕТАН КОМИ РЕСПУБЛИКАСА АГЕНТСТВО

ВОЙВЫВ КОДЗУВ



ISSN 0134-4323

БЫД ТӖЛЫССЯ ЛИТЕРАТУРНО-ХУДОЖЕСТВЕННОЙ ЖУРНАЛ

2

УРАСЬӖМ (ФЕВРАЛЬ)

2012

ТАЙӖ НОМЕРЫН:

Елена АФАНАСЬЕВА. Марина. Кывбуръяс	3
Иван НОГИЕВ. Олӧмыс — ворсӧм. Повесът	7
Василий ЛОДЫГИН. Лача. Поэма	35
Юрий ВАСЮТОВ. Салдат Васюта. Повесът	40
Иван БЕЛЫХ. Висьтъяс	50
Анжела ЛОДЫГИНА. Тӧдны кольӧм кадсӧ, мед лӧсьӧдны водзӧ лоан олӧмсӧ	61
Галина МИКУШЕВА. Татчӧ ордымыд оз тыр... ..	68
Владимир ПАРШУКОВ. Зиновий Петрович Соловьѳ	72
Евгения ЛОБАНОВА. Енкӧлаыс пыр отсалӧ... ..	76
Пошта кудйыс	80

Обложка вылын снимокыс Елена Холоповалӧн.

© «Войвыв кодзув» («Северная звезда»), 2012 г.

СЫКТЫВКАР

СЕВЕРНАЯ ЗВЕЗДА



***Ежемесячный
литературно-художественный
журнал***



Учредители:

СОЮЗ ПИСАТЕЛЕЙ РЕСПУБЛИКИ КОМИ

**АГЕНТСТВО РЕСПУБЛИКИ КОМИ ПО ПЕЧАТИ
И МАССОВЫМ КОММУНИКАЦИЯМ**



РЕДАКЦИОННАЯ КОЛЛЕГИЯ:

Главный редактор

ЕЛЬКИН М.А.

Зам. гл. редактора

ПОЛУГРУДОВ А.В.

Ответственный
секретарь

КИЧИГИН И.Н.

УЛЯШЕВ О.И.

ЛИМЕРОВА В.А.

ТИМИН В.В.

УЛЯНОВ А.В.





Елена АФАНАСЬЕВА

Эм Из. Сійö шыалö чөвлунөн. Сылөн висътъясын муракылö кадыс. И вөвлöмаыс вына ыджыд лэбачөн шевкнитлö бордсö, мед вöчны нöшта öти кытш.

Марина

1

Мый тэныд Изйыс*,
Висьтав, Марина...
Ас пытшкад видзан
Радейтöм пыр на...
Из дорö öнi?
Радейтны Изсö?..

Олöмыс морттö быд ногыс изö...

Марина,
Тэ кодöскö пыр на коралан лолö?
Öд тэнад гөлөсөн чуксасьö йöла**...

Марина,
Тэ муслунсö азыма юин.
И сійö тэ пыр визувтiс юөн...

Визувтiс ставнас.
И öнi Из дорö —
Вичкоö быттö —
Волены корö

Радейтöм-лэбачыс...

Изйӱн то водіс:
ӱні тӱ видлы радейтны мӱдӱс.

2

Марина,
Тадз радейтны олӱмас оз ков.
Радейтӱм — йӱлаын.
Тан сійӱ оз ов.
Кыдзи ас пытшкад йӱласӱ видзан?
Сійӱ ӱд енӱж.
Тӱ сійӱс сидзан?
Чукӱстла нимнад —
ӱн воштысь,
ӱн на...
Марина, тӱ
Колан...
Ме тӱтӱгыз
Нинӱм.

3

Чӱв олан.
Он шыав меным мыйдыра.
Из моз чӱв олан.
Тӱ пыдди кыв-вора
Лолӱй.
И сійӱ ӱд абу нин менам.
Тӱ сійӱс новлан
Выль платтӱ моз, ӱм на
Коланлун сыын?
Изсӱ кӱ солӱ!
Радейтӱм — ыджыз из —
Видлы тӱ нолы
Сы сӱкта вынсӱ
Перйы лов пытшкысь...
Да кутшӱм пыдӱ вуж лӱдзӱма...
Ышӱд
Ловтӱ сы горулысь
Дзольгыны ва моз...
И шондӱ эзысьнас ворсны
Дзик важ моз...

4

Радейтӱм кусас...
Он ӱскы, Марина?..
Лун шӱрын шондӱыс кусас кӱ —
Чуймам,
А радейтӱм — сійӱ ӱд чайтам —
Аб шондӱ...—
Войсӱ ӱз адзывлы лун шӱрын кодӱ:
Синтӱ кӱ кинад тупкан — и пемыд...

Но өд тадз сэсса нэм видзөдны...
Сэні —
Пемыдас оз тыдав,
Но олө биыс...

Мыйсяма би
Мортыс новлө
Ас пиас?

5

Марина,
Сідз радейтін —
Йөлаө пөрин***,
Гөлөстө өні
Сетлывлан вөрын...
Коръяскө кывлан
Орччөн нач,
Матын...
И йөзыс велалис тэ дорө —
Чайтө:
Тадз, көнкө, колө —
Мед йөлөга шыа
Вөр-ваыс вөлі...
И оз төд, мыйла,
Марина, тэ вошөмыд
Тайө му вывсьыс —
Йөз синлы тыдавтөм лэбалө юсьыс
Выліас сэні...
Морт мед эз вунөд:
Тайө му вылас радейтөм юны
Жар лунө ва моз
Воліс өд сійө...

Да тыдавтөм лэбачсө
Кутыштны кийн.

6

Өти гөрөдө гөрддзасим тэкөд, Марина!
Чайті, гижә,
И мыйтакө чинас
Лов выв шогөй...
Но, буракө, венө
Мөвпыс тэ йылысь...
Бөрсяньөд менө
Пыр на горөдлан —
Коръяскө кывла.
Гөлөс вылад вуджлывла тыла.
Корся тәнө,
Өд төда — ог аддзы.
Кымын во
Менө новлөдлан тадзи.

Төвру мыгöрысь казяла,
И ловнам югда.
Радлунöс чöла
Тэ мекöдö юкан.

2008 во



**Ыджыд Из — тайö изйыс Емдін районса Эжов деревняын.
Парма съөлöмысь петалöм морт царскöй армияын уна во служитöм
бöрын вайöдiс аскöдыс том гöтырöс. Ачыс регыд кувсис. Ылі Витеб-
скын чужлöм ань кольччис овны ичöтик деревняö. И уна во чöж бөр-
дöдiс ассьыс шудтöм олöмсö Ыджыд Из дорын.*

***Йöла — йöлöга.*

****Греческöй миф серти, Йöлöга радейтöма Нарциссöс. Зон абу во-
чавидзöма сылөн радейтöм вылö. Шог пондаыс Йöлöга бырöма, кольöма
сöмын гöлöс.*

Серпасыс Ю.Лисовскийлөн.



Олөмыс — ворсөм*

ПОВЕСТЬ

Сөмын мөд луннас клуб дорын ворсігөн Евлог төдмаліс, мый, вөлөмкө, коркө сійө Тараслы юрас зорйөн вартөма, да сэтшөм ёна, мый өні Тарас ветлөдлө юрсө пөлөстөмөн.

Збыль, Тарас ветлөдліс юрсө чукыльтөмөн да содтөд грөзитчис на:

— Час, батё тэныд петкөдлас тышкасьөмсьыд! Содтөд Гурей Митрейыдлы висьталас да сысянь на сюралас.

— Кор нө ме тэныд вартлі? Ме кө тэныд зорнад варті, тэ эн и чеччы!

Евлог эськө эз и пыдди пукты татшөм суклясьөмтө, но мый лоас, та йылысь кө висьталасны батыслы? А Гурей Митрей дыр оз думайт, сылөн судыс ньөрйын либө тасмаын. Висьталөны кө, сідзкө, тайө збыль. Дерт эськө, оз жө тшук кувмөн нөйт, но яйыд өд аслад, доймө. Да и ньөти абу окота мыжтөг мыштө лосьөддыны тасма улад, коды тайө кажитчас? Мед көть эз висьтавыны батыслы! Мед көть эз жө висьтавыны!

Тадзи думсьыс Енлы ли, коды ли кевмигмоз Евлог локтіс гортас.

А мыйөн пырис керкаө, муртса бөрөн эз пет. Пызан сайын гудыр аскур тыра сулея дорын пукалісны Гурей Митрей да Миш Педөр. Господьй! Төдіс кө тайөс, эз на пыр да!

— Локтін, пиук? Но, пуксы да сөйышт,— лосьөдіс пиыслы сөян Прокө Пекла.

Евлог бокөн-бокөн, полігтырйи матыстчис пызан дорө. Митрей эз и видзөдлы пиыс вылө, налөн Педөркөд сөрни муніс лэч туйяс да кыйсьөм йылысь. Сідзкө, Миш Педөрыд абу на нинөм висьталөма. Детинка Педөрысь кыз позьө ыджыджык костөн пуксис да надзөникөн панясис, көть сөйнысө дзик эз ков, татшөминад кутшөм нин сөйөм! Но некытчө он воштысь.

Педөр көсөйтчыліс Евлог вылө да грөзитыштіс чуьна:

— Тэ, Евлог, смотри!

Гурей Митрейлөн чужөмыс здукөн вежсис. Сійө чошкөдіс пельяссө, синъясыс гөгрөсмисны:

— Мый нин менам дуракыс вөчис?

— Тараслы юрас зорйөн вартөма, да юрыс весиг детинаыдлөн чукыльтчөма.

— Мы-ый!?— Митрей чеччыштіс лабич вылысь, нетшыштіс тув йылысь паськыд салдатскөй тасмасө, кутіс пража дортіыс да кыпөдіс вылө.— Ноко, пет татчө, өні жө нөйта!

* Пом. Заводитчөмыс 2011 вося 12 да 2012 вося 1 номеръясын.

Бать выlö Евлог видзöдынысö эз лысьт. Синъясыс сувтсаöсь, чужöмыс гөрöдöма, вом дорясыс скöрмöмысла тіралöны. Евлог, кодлөн пыр жö вомыс вежынтчис да синваыс бан бокъяс кузяыс тюрöбтіс, бöрдігтырйи чеччис, петіс пызан сайысь, сувтіс батыс водзö. Ой, мый и лоö öні? Дзик прöстöсьыс, Тараслөн суклясьöмысь, öні батыс писö камöдас. Код юрнад, да содтöд татшöма скöрмöм бöрад, он весиг куж думайтны, мый вöчас. Но Миш Педöр чеччис жö пызан сайысь, сувтіс ая-пия костö:

— Дмитрий Гуриевич, оз ков нöйтны мортсö. Евлог таво тулыснас ёна мянлы отсасис тшуп дзоньталöм выlö понöльяс кералігөн. Эн нöйт! Прöстö öлöдам, мед некор сэсся Тарасöс оз вөрзöд, и ставыс.

— Кыдзи сідзи, ог нöйт?!— сідзи и пуис вирыс сөнъясас Митрейлөн.— Ми, мужикъяс, и то зорйөн ог тышкасьлöй-а! А куліс кө нö детинаыс?! Тайöс тадзи оз позь кольны!

— Оз ков, оз ков!— Педöр кутіс Митрейлысь тасмаа кисö.— Эн питö нöйт! Нöйтöмсьыд бурыс некор оз ло.

— Кыдз оз ло?! Кывсö кө мортыс оз гөгөрво, тасматö öдйö гөгөрвоас! Евлог! Ноко, лок татчö! Петкöдла ме тэныд, кыдзи зорйөн вачкасьны!

Евлоглөн повзöмысла сёлöмыс вомöдыс муртса оз пет, сідзи и чеччö. Сыркъялöмөн бöрдö, кияснас чужöмсö кыдз-мый вермö тупкö, шуны нинöм оз лысьт да и оз вермы. Мый, бара-й, лоас? Мый, бара-й, лоас? Вот тадзи прöстöсьыс öні батыс сійöс скöрийывсьыд збыль кувмöныс, колөкө, нöйтас!

Медбöрын Митрей раммыштіс, öшöдіс тасмасö тувйö да Миш Педöркöд бөр пуксисны пызан сайö. Евлог сы мында аттьöалана кыв думсьыс шуис Педöрлы: со öд, сувтіс сы дор, көть и эскöма Тараслы. Бур жö морт!

Евлог чеччис да көсйис батыс тöддытöг кытчөкө син водзсьыс вошны, но Митрей скöрысь чөвтис пиыслы:

— Пукав!

Ачыс тырталіс куш стöканъяссö, Педöркöд тотшнитчисны да юисны.

— Вай, Фёдор Михайлович, висьтав көть, кыдзи тайö лоöма?

— А ме и ачым ог тöд. Локті рытнас гортö удж вылысь, а детинаыд чукуля юра. Этадзи вот бокыв пöлөстчöма,— Педöр чукультліс юрсö,— да сідзи и кольöма. Мый нö, мися, лоин? Евлог пö юрö зорйөн вартіс.

— Мый, юрыс сэсся оз и веськав?

— Да, сідзи чукуля юрөн и олö. Оз вермы веськöднысö. Ог тöд сэсся, коркö бурдас оз?

— Ноко, пет татчö! Нöйта!— выльысь кватитіс тувйысь тасмасö да пиыс выlö горöдіс Митрей.

Евлог көсйис воськовтны батыслань, но Миш Педöр бара сувтöдіс Митрейöс:

— Эн нöйт, Дмитрий Гуриевич, оз ков, мыйыс öд оз овлы челядь костад да. Коркö öд справитчас жö. Тэ сэсся нöйтан көть он, нинöм жö сыысь оз вежсьы. Вай пуксьы да лöньышт.

Мам да ыджыд мам шы ни төв олöны, оз лысьтны суитчыны мужикъяслөн зык-шумö. Некод на öд таöдз эз кывлы, мый Евлог зорйөн вартöма Тараслы юрас. Миш Педöр то ачыс висьталö

да, дерт, сідзи и эм. А Евлог полёмысла тіралё, отарё шлюпкё-бёрдё. Некод од оз юав сылысь, збыль вартіс Тарасыслы али эз?

Медбёрын батёлён лёклуныс лёньыштіс, сійё усьпаньвыв пуксис да скёрысь чөвтіс пиыслы:

— Мун син водзысь, мед эг аддзыв! Вод да узы! Аски сёр-нитлаам!

Евлог одйоджык нин уйкнитіс гёбөчө. Гожомнас бать да мам узылёны сарайын вонйын, а сійё чойясыскөд да ыджыд мамыскөд гёбөчын, картофель гу вылё вольсалём пөвъяс вылын. Гёбөчад ыркыд и абу номйось, зэв лөсьыд.

Пөрчысис, водіс, шебрасис юр вывтійс да бурпөт на бёрдіс забеднёысла. Со од кызди Тарасыс вермис суклявны Евлогос. Но мыйысь? Дзик нинёмысь! Мый лёксө Евлог вөчис Тарасыслы? Быттьо тай нө зэв лөсьыда век ворслісны отлаын, некор Тарасөс Евлог эз отдортлы, весиг чунь помнас эз вөрзьөдлы, и со кызди вөчис. Тадзи од оз жө позь, кызди сэсся водзө овны татшөмыдкөд? Кодкөд ворснысө? Гриша сійё ыджыджык да пырджык Шурик гөгөр бергалё, Евлоглы на дорын местаыд абу. Да! Вот и жуглы юртө.

А аски мый лоас? Асывнас батыд быть тасмаалас, од Миш Педёрыд талун рытнас гортас мунас, некодлы Евлог дор сувтнысө лоө. Сідз нин скөр батыс, а код юрнад и дзик зверкод да весиг думыштнысө он вермы, мый эськө сійё пиыскөд вөчис. Муніс, кылө, гортас Миш Педөр, водісны бать да мам, ыджыд мам да чойяс.

— Евлог, вартін али эн тэ Тарасыслы?— юаліс гусьоникөн ыджыд мам.

— Эг, дерт! Зорйөн юрө вартны өмөй позьө? Весиг думыштнысьөкыд,— вочавидзис внукыс.

— А коді нө вартөма? Мыйла тэ вылё шуө?

— Потшөс вывсянь пө ачыс усьөма юр вылас,— висьталіс Катя.— Меным Вера да Валя висьталісны.

— Мыйла нө, сідзкө, Катя, батыдылэ эн висьтав?

— Кыдз нө сылы лысытан мыйкө шуны! То кутшөм скөр да...

Господи! Со и ставыс өні гөгөрвоана лои! То кызди делөыс вөлөма! Ачыс Тарасыс усьөма, а Евлог вылё валитөма! Аттө, но и морт! Тадзи од оз жө позь! Ещө другөн шусьыліс коркө!

Вөлисти детинкалөн морөс кудъяс ичөтик сьөлөмыс лөнис ёнтөмысь. Ёні повны нинёмысь, Катя аски висьталас батыслы, мый збыльвылас некод Тарасөс зорйөн юрас абу вартлөма, а ачыс сійё зор вылас либө муас колскысьөма. Вот и повзыліс жө, вот и дзөрыштіс жө талун Евлог. Төдө од, мый батыс скөрмөмывывсьыд некодос оз кывзы, көть мый тэ сылы эн висьтав. Вот таdzi кодкө сылы мый йылысь кө сөрас, да нинөм чайттөг, думайттөг и виас писө. Век лоө повны, век лоө мыйкө лёктор виччысьны, коркө мыччысьлас-ө шудыс Евлоглы? Но и олом!

Войбыд Евлогос шобрөдіс, войбыд сійөс то кынтіс да сэки сійө дрөжжитөмөн көлач моз куткыртчыліс шебрас улас, то жарө шыблаліс, сэки юрси йылөдзыс пөсявліс, шебрассө вывсьыс чужъяліс. Войбыд детинка бөрся вөтлысис батыс аслас паськыд тасманас өвтчигтырйи, а Трить Марпа сөмын ыззьөдіс Митрейос:

— Вот-вот! Нойтны колö питö, нойтны! Шпанаон быдмö! Мед гөгөрвоас, кыдзи зорйон вачкасыны!

Водз асывнас, кор мам лысьтис на мөс а ыджыд мам ноксис пачводзын, Евлог котөрөн чепөсйис гөбөчысь, матыстис улөс за-лавка бердö, кайис сы вылö да зия кутис мыйкö шаркөдчыны-корсыны сэтысь.

— Мый нö корсян, Евлог?

— Тасьтi джаджйö тай дребежжит пуктылi да некыдзи от аддзы.

— Мый пуктылiн!?

— Дребежжит.

Ыджыд мам öдйö шыбитис джодж пельöсö пупайка, мөдөс гартыштис юрлөс пыдди да водтöдiс Евлогöс сэтчö.

— Узышт на, дитюк, шойччышт. Оз некод босыт тэнсьыд дребежжиттö.

Евлог водiс да öдйö и унмовсис, а кор восьтис синъяссö, то чуймөмөн видзöдiс ас гөгөрыс. Мый тайö? Палялiс мыйлакö керкаын джоджын, көть водiс узьны гөбөчö. Сы гөгөр пукалiс-ны тöждөн тырөм чужөмъяса бать, мам да ыджыд мам.

— Садмин, пиук?— малыштис юрöдыс Евлогöс мамыс.

Детинка көсйис чеччыны, но мам кутыштис сйöс пельпо-мöдыс:

— Куйлышт, эн на пыр чеччы. Удитан.

— Мыйла?

— Сiдз. Юрыд висьö?

— Висьö.

— Мый нö тасьтi джаджсьыс корсин?

— Тасьтi джаджйысь?! Нинөм эг корсь.

— Кутшөмкö дребежжит пö тай корсян вöлi, ыджыд мамыд висьталiс-а.

Дребежжит? Кыськö быттö Евлог кывлiс нин тайö кывсö. А-а! Тайö жö «Федорино горе» книгаысь! Сэни гижöма: «А по-суда бежит и бежит, тараторит, тараторит, дребезжит»,— вот кытысь тöдтөм кывйыс кыптöма детинкалөн висьмөм юрас! А мый гөбөчысь ас кокнас петiс да тасьтi джаджйысь тайö «дребезжитсö» корсис, нинөм оз помнит. Со кыдзи олөмад артмывлö, мый он куж думайтнытö, сйö и лöö. Шензы көть эн! Лун шөр бöрас век жö Евлог чеччис, лунтыр öд оз кут туплясьны танi, сылөн и ывлаын уджыс помасьлытөм. Юрыс эськö висьыштö на, но терпитнытö поэбö нин. Челядь ворсöны көнкö, а Евлоглы öд гортад гажтөм.

— Но, гуляйтöдышт, сiдзкö, Любатö, кыкнад гажаджык,— суйыштис ыджыд мам детинкалы ичöt чойыслысь кисö.

Евлог сöмын ышловзис. Гажаджык! Он, бара-й, некытчö мын сыысь, этша на котөртан челядлөн ворсанiнас, колö чойыскöд ки на ки кутчысьмөн, надзöникөн ветлөдлыны. Любалөн öд кокъясыс зэв на нэриникöсь, сйö и видзöд, кытчöкö шатовмунас да усяс. И шор дорад сыкöд он лэччыв, и видз вылад он сяркнит-лы. Но мый тон вöчан? Катя сйö абу йöй, кытчöкö пышйöма нин, оз весиг тыдав некөн. Кольыны эськö сылы, мед видзыштö, но он босыт. Ковмас Евлоглы лунтыр татшөм мича луннас надзö-никөн чойыскöд чотликайтны. Гөра боктi лэччисны сёрнитiгтыр-йи, сус пу боктi, да паныдасисны ныв чукөркөд, көнi и Катя

тшөтш вөлі. Ветломаось, тыдалө, видз вылө, ставныслөн юр выланыс катшасин да мукөд дзоридзьясысь кыём юркытшьяс, сэтшөм любө аслыныс.

— Евлог, мый нө джаджсьыд корсин?— пыр жө юалис Паладь Галя.

Евлог лөгпырысь видзөдліс Катя вылө: паськыд вомыд удитөма нин брадзнитны!

— Сюрис эз сэсся дребежитыд? Ёна корсьөмыд да?— та-йö нин Валя суйсис сёрниас.

Ставныс гораа серөктісны.

— Кутшөмкө дребежит корсьö! Ха-ха-ха!— гизьöны-сера-лöны нывьяс.

Евлогы эз ло лосьыд сьölөм вылас. И кызди налы абу яндзим серамвыв лэптыны мортсö, коді ас тöдлытöгыс висигас котралöма, корсьысьöма абутөмторсö. Эз кут нывьяскöд тшетш-йысьны детинка, нуöді водзö киöдыс Любаöс, мед этша öскали-вайтöны, абу кө дыш.

Водзö чой горув лэчигөн налы паныдасис Трить Марпа, коді юрсö дзөрөдөмөн видзөдіс Евлог вылө да лёкысь шуалис:

— Страмина! Урöд! Белöй горачкаыд эз на босьт?

Евлог ылöджык нин кежис боквыв тайö лёкногөн пинясьысь старукасьыс, друг да вартас мыйöнкö, он öд тöд, мыйысь сідзисö скöралö сы вылө? Бур көть, кинас эз во, а сöмын броткигтырйи водзö восьлаліс. Недыр гуляйтыштісны чоя-вока, но регыд Люба мудзис да ковмис сійöс Евлогы сывьяс босьтны да сідзи катöд-ны гортöдзыс.

Гортас мам дөзмөмпырысь юалис Евлогысь:

— Евлог, Трить Марпа пыраліс да висьталіс, тэ пö Тарасöс няйт гуранö тойыштöмыд.

Евлоглөн чужöмыс нюжаліс, а забеднöйсла синваыс тыртіс синьяссö:

— Ме талун Тарассö эг на аддзыв да...

— Ме эськö сылы сідзи и шуи да, мися, Евлог висьö да гортысь öні на муртса и петіс Любакöд. Мый нө сэсся тайö Тарасыс лоöма? Мыйла сідзисö зыртчö, быдсяма лекторьяссö тэ йылысь лосьöдлө?

— Ог тöд, мый сылы оз тырмы?

Рытнас бать локтіс гортас да пöрчысигмозыс висьталіс:

— Аддзöдлі ме талун Тарастö. Юали сылысь, мися, збыль вартіс Евлогыд зорйөн юрад али эз. Тарасыд шуис, потшкөн пö вартіс.

— Потшсö Евлогыд и кыпöднысö оз вермы,— суитчис мам.— Потштö öд колö öтар помöдыс лэптыны да сідзи вартны. А сідзитö и ён мужиклөн оз артмы.

— Да, збыль, думыштыны кө, сідзи и эм. А мыйла нө тэ эн висьтав, мый эн вартлы? Колö öд вöлі шуны, эг пö ме варт!— бергöдчис Евлоглань бать.

Пиыс чöv оліс, мый тон батыды шуан? Кыззіс али эз на эськö сэки Митрей писö? Öдвакö. Позьö öд вöлі аслыс первой юавны, а не пыр жö тасмаö кутчысьны! Бара на Евлог мыжаөн коли.

Со и турун пуктан кад воис. Демаын көть и колхоз, но турун пуктоны быдён ас семьяён. Первойсö видлісны жö отчукөрөн уджавны, но төлкыс эз ло, эз кажитчы. Ыджыд котырнад лöсьыд гырысь видзяс вылын пуктысьны, а посныдінъясад, көні и бергавнысö некөн, сöмын мешайтчöны öта-мöдыслы. Да и оз быдён öткодя уджав. Мукöдыс дышöдчыштöны, а трудоденныд öтмында локтö. Со и юксялісны быдён ас котыръяс вылö.

Евлогъяслы ас семьяён пуктысьны некыз. Батъыс инвалид, та вöсна йöзкöд радын уджавны оз вермы, Катя да Евлог посниöсь на. Мамлы ковмис öтүвтчыны Кирö Вась Пилякöд. Пиля гозъя, Иринь да Пекла, со и артмис ичöтик бригада манера. Но мыйён Катя да Евлог быдмыштасны, вермыны кутасны гөрба косанад öвтчыны, сэки ас семьяён жö мöдасны турун пуктыны. Öні мам колхозö ветлöдлö, а батъ быдлаысь, кытысь сöмын турун сюрыштö, мүдорса боръясысь, нюрысь, туй бокъясысь ытшкышталö, чукöртö асланыс Сюруклы төв кежлö көрым. А төлыд ок кутшöм кузь!

Öшинювса борйын Евлогён бобув куталігөн Öксинь чожинь чукöстіс сійöс отсыштны юр ваялыштны. Йöйыд, сэки радпырысь юртö котрöдіс. Тайöс грекыд вылö батъыс адззылöма да чуймöма быдсөн: «Но, Евлог, вöлöмкö, юр нин ваявны вермö!» И заводитчис... Кузяла мöдіс новлöдлыны аскöдыс куртны-чöвтны, кытчö ачыс, сэтчö жö и писö кыскö. Тöдіс кө тайöс детинка, нинöм вылö сэки чожиньыслы эз отсав, шуис, мый сьöкыд, оз вермы юртö лэптыны. А öні сэсся сёр нин.

Со и талун Евлогöс бара нуöдö аскöдыс Пожög туй вылö. Евлог нуö кык куран, а батъ кык пöлöс вила: öтиыс дженъыд пуа, мöдыс кузь пуа, да кык нöсилка потш. Тасма костас суйöма чер, сытöг нö кызди? Пожög туй вылö позьö петны вöла туйöд, но сэті нюра да няйт, та вöсна батъ нуöдіс Евлогöс паралей кузя. Вöлöмкö, вöрті писькöдöм лунö-войö мунысь ордымъяссö шуöны визиръясөн, а рытив-асылö мунысьяссö — паралейён. Паськыд Пожög туйыс, и абу дивö, öд таті төвнас му кынмöм бöрад машинаяс журъялöны. А öні öти бöрся мöд туй шöрас дöввидзöны виж ваён тырöм джуджыд гуранъяс, гожöмбыд оз и косьмывыны. Гöп бокъясас, няйт вылас, быттö паськыда воссьöм дзоридзяс, чукөрөн-чукөрөн пукалöны еджыд бобувъяс, капуста бобувъяс. И мыйла найö сэтшöма радейтöны няйтсö? Мыйлакö чукöртчöны, а оз торйён-торйён пукавны, местаыс öд тырмö. Пуксясны да швачвидзöны, бордъяснас шенасьöны, көнкö, бабаяс моз ас костаныс бызгöны, майбыр и овнытö налы! Оз, бара-й, ков турун пуктыны.

Со, медбöрын и батъыслөн ытшканінас воисны. Тайö туйбок-са сёнын неыджыд эрдтор. Дзик вөр бердас, пуяс саяс зорöд места эм и быдсөн. Дерт, көнкö, батъыс жö кольöм воясö пуктысьліс тані.

Мыйлакö оз позь лöсьыд видз вылысь пуктыны турунсö, сöмын кыскö бокысь, лёкинысь вермöны найö ытшкыны. Лöсьыд видзясыс ставыс колкозлөн. А мый сэтшöм колкозыс? Деревня-са öд ставныс колкозын уджалöны. Видзяс вылысь турунсö пуктоны да ваялöны скöтнöйö, көні видзöны колкознöй кукъясöс. Кукъяссö бöрыннас начкасны да яйсö магазин пыр вузалöны карын да гырысь сиктясын олысьяслы. А демасаяс абу йöз?

Налы өд сөйны жө колө! А ас картасыд скөттө тшөтш колө мыйонкө вердны! Некедзи детинка тайос оз гөгөрво.

— Тэ видз гөгөрыс заводит куртны, а ме пока зорөд местасө лөсьода,— бать мыччис дзөляджык курансө Евлоглы.— Да мичаа курт, эн коляв турунсө!

Детинка мөдс надзөникөн куртны, петкөдны куйлысь турунсө вөр бердсьыс шөрланьыс, мед жар шондйыс виас кувтөм на турунсө. Бать видлалс зорөд пиньяссө. Отиыс сылы кажитчис ёнөн на да сйөс выльысь сатшкис, а мөдсө, кодс легнитигас ратшмунис, вежис выль вылө. Отар-мөдарсянныс пиньяссө пыкис бөжйөдъясөн, лөсьөдс да ёсьталс пыкөдъяс. Сы бөрын ачыс тшөтш босьтчис куртны.

— Эн видзсө курт, а турунсө! Миянлы өд туруныс колө! Ад-дзан, колялөмыд гөгөр,— скөрысь велөдс писө.— А ньөрьяссө вөрас шыблав, ньөртө мөскыд оз сөй.

Корсянь нө тайө гураныс лои виддзөн? Шуас жө! Скөр и бать Евлоглөн, дугдывтөг горзө. Евлог со кыдзи старайтчө танс, лөдз да ном пиын, найө лолыштнытө весиг оз сетны, вомтө паськыдджыка восьтны он лысьт, тырыс пырасны. Ызгөны гөгөрыд, быттө орччөн трактор жургө-уджалө дугдывтөг.

Но кузяөн-визяөн куртсис жө ытшкыломиныс. Бать тэрыба юрасис. Юрьясыс сйлөн мичаа артмөны, гөгрөсөсь, вылыс ёсьмө, а улитыс кураннас швачкөдөмөн мубердса турунсө топөдө юр бердас — сюртө. А Евлог юр туй куртө. Медбөрын юрассис.

— Лок, пиө, ветлам гөра вылас, сэни юр-мөд менам ытшкөма на. Куртам да ваям татчө.

Век на эз эшты?! Евлог ловзылыс нин быдсөн, кор куртсис да юравсис тайө гурансьыс туруныс-а. А батыслөн, вөлөмкө, көнкө эм на. Босьтс кык куран да чөв олігтыр, жугыля вөтчис батыс бөрся, кодс пельпом вылас юр новлан потшгьясөн зіля восьлалс гөра вывлань.

Бур көть, мый сэни абу ыджыда ытшкөма. Дзик туй бокас бадьясөн топөдөм неыджыд кушин, юр кык кымын и лоө. Сэти өдйө куртисны да юралисны. Дерт, ёнджыкасө бать уджалс, а Евлог сөмын лебезитчис. Уна-ө нө сыысь отсөгыд?

— Но, видлы, пиө, сюртны нөсилка потштө.

Евлог босьтс потшсө. А кутшөм сьөкыд! Ёсьтөм йывсө видлс суйны юр улө. Оз пыр! Некедзи оз пыр. Евлог мый вынсьыс пыксис потш помө, йөткө, йөткө, но эз вермы весиг метра джын пыдлаө суйны. Бать жө кутчысис потшкө да кокныдика и сюртс кыкнансө юр пыдөса-муа костас.

— На, пиө, кушенчаась, а то лөдзьясыд киястө йирасны дзикөдз. А чужөмад кө кутчысясны лөдзьясыд, висьтав, да пуктылам юртө. Ном курччөмтө өд терпитан-а. Но, босьтам.

Бать шуйга ранитчылөм кисө суйө нөсилка потш улө да сойсө кусыньтөмөн и новлө юрьяссө. Дерт, өни тайө Евлоглы оз тыдав, юрыс сайөдө. Но водзти аддзыліс, кор мамыскөд найө юр ваялісны, а пиыс бокын сулалс.

Сэтшөм сьөкыд вөлөма юрыс! И ылө өд колө нунысө! Лөдзьясыс сідзи и ызгөны чужөм бердад, лоө дугдывтөг пөлясьны да юртө пыркөдны. Оні гөгөрвоана, мыйла вөвъясыд гөжөмнад ланьтлытөг юрнысө вылө-улө блонйөдлөны, тадзи өвадсьыд дор-

йысьоны. То ыджыд веж лөдз дзик син дорö пуксис, курчис да сідзи и варкөдны-сёйны мөдіс.

— Батьö, лөдз курчö, пуктылам!

Юрсö пуктісны. Евлог став сёлөмсяньыс, мый вынсьыс скö-рысь швачкөбтіс дөсадитчысь лөдзсö да лязөдіс, ва места сөмын колис. Вот тэныд!

— Но, босьтам жö.

Кыпөдісны юрсö да нуисны водзö. Ылö колö нуны, зорөд местаыс на оз тыдав. Евлоглөн кушенчаа кисьыс нөсилка потшкыс пыр öтарö шлювгис-шлювгис и, медбöрын, мыніс да усис. Юр пөлөстчис да киссис. Евлог быдсөн йөжгыльтчыштіс, поліг-тырйи видзөдіс бать вылас, виччысис видөм, но тайö пöрйö Митрей мыйлакö нинөм эз шу. Сөмын зумыштчөмөн выльысь лөсьөдіс киссьөм юрсö потшъяс вылас, личкыштөмөн топөдіс.

— Босьтам!

Водзö нуисны, но некымын воськов бöрын потшкыд бара Евлог кийсь вильснитіс. Мый вöчан, эбөсыд кө оз на тырмы?

— Но, вай кушенчатö пöрччыв да сідзи нуам, тані абу нин ылын.

Кушенчатöгыд потштö кокныдджык вөлөм кутны, пöсялөм ки пыдөссьыд озджык шлювгы, сувтылтөг вайисны юрсö зорөд дорөдз.

— Нөсилка потшъястö, пиö, ну юр дорөдзыс да курт юр туйсö, а ме тайö турунсö чöвта.

Муртса на Евлог воис юр дорö, босьтіс куран, а бать сійөс сүөдіс нин, öдйö и лэпталöма. Сюртіс нөсилка потшъяссö, зіля куртіс юр туйсö, чукөртөм турунсö пуктіс юр вылас да личкыштіс, мед оз киссьы нуигас.

— Босьтам!

Неылö нуисны, и друг Евлоглөн нырсьыс чепөсйис вир да сідзи и мөдіс тюрны-войтавын.

— Батьö, нырысь вир петö!

Юр пуктісны.

— Аттö жö! Водышты гатшөн вуджөр саяс, куйлышт. Мый сэсся вöчан? Жарнад вируд кизьöрмис, буракö, сійөн и петö.

Евлог водіс туй бокö мыш вылас, чатөртіс юрсö. Пыр жö вомас чукөрмис солакодь нöгыль вир. Бергöдыштіс юрсö да сьöлыштіс боклань. Енэжті надзөникөн кывтісны посныдик еджыд кымөръяс. Юр весьтын шаркйысисны юрсигусьяс, дзизгисны-лэбалісны лөдзяс, вöсньыдика тіньгисны гежөдик номъяс. Жарнад найö этшаөнөсь, кыз шуö батыс, полöны, мый госыс сылас шонді водзад. А Евлог куйлö, виччысьö, кор сувтас вирус.

Кутшөмкө кад кольөм бöрын бать юалис:

— Но мый? Дугдіс вируд петны?

Евлог видліс ныр увсö:

— Быттö тай шмакасис-а.

— Но, чеччы, сідзкö, да нуам юртö.

Евлог надзөник кыпөдчис кокъяс вылас, сулалыштіс.

— Оз пет?

— Оз.

— Но, босьтам.

Вирус чорзьöма, бура шмакасьöма да тупкөма ныр розьсö.

Мукөд юръяссө матісьыд кокниа нин ваялісны зорөд дорө да батыс өдйө чөвтис, сигөртис неыджыд, өти чалькоста зорөдсө. Эштис, буракө, кокниа лолыштис Евлог. Но батыслөн кывъясыс бара на шогөдісны сійөс:

— Тані мөд сөнас ещө на менам ытшкыштөма. Ветлам да сэтысь идралам.

Дзикөдз жугыльмис Евлог. То өд, радлан-радлан, чайтан, мый өні ставыс нин, а, вөлөмкө, помыс на оз тыдав. Виччысян-виччысян гажа шоныд гожөмтө, надейтчан, мый пөттөдзыд удитан котравны-ворсны ас коддьөмыдкөд, а тані батькөд лоө кыскасьны кытчөкө ылө-бокө, жарысла упкыны, ном-лөдз пиын лойсьыны, турун пуктыны. Тадзнадтө гожөмыс сідзи жальон и кольө, он удит весиг ворсыштнытө.

Но, көть мөд сөнас этшаджык туруныс дай бокиысь эз ковмы ваявны, өдйө эштис. Евлог поліс на, мый коймөдлаын, колөкө, батыслөн ытшкөма да и сэтысь на идравны ковмас, но сылөн полөмыс весышөрө лоөма. Гортлань мөдөдчисны ая-пия.

— Но, зорөдъяссө пыдөджык вөчалім да, гашкө, некод оз аддзы,— майшасьыштөмөн чөвтис Митрей.— Лөддзыс талун! Пасьтөг кө мортөс пу бердө көрталан, татшөм луннад час джынйөн кушөдз вильөдасны. Мудзсьөма, другө, быттө эгө өна и уджалөй-а. Тэ нө, пиө, мудзин эн?

— Мудзи,— ышловзис Евлог.

— Нинөм, гортын шойчыштан.

Кутшөм шойчөм! Лэдзласны кө, сөйөм бөрын котөртлас на лыа дорө челядькөд ворсны, мед сөмын кодкө сэні лоө-а. Йөзлөн челядьыс, көнкө, лунтыр гуляйтисны, пөттөдзыс купайтчисны. А Евлог то сы мында кад прөстө воштис кутшөмкө турун понда. Батыслы кө сэтшөм окота пуктысьны, мед өтнас и ноксьө! Нинөмла Евлогөс манитны, кыскавны быдлаө аскөдыс.

Бать водз асывсянныс мунөма Семнадцатөйө лук вузавны. Семнадцатөй — сійө ылі вөрсайса посөлок, көні олөны рочьяс, найө пөрөдөны да нуоны көрт туй кузя Пасаельө вөр. Мыйлакө рочьяслысь оланінсө шуөны посөлокөн. Оз сиктөн, оз деревняөн, а посөлокөн. Сэні олысьясыс озырөсь, бура налы, тшук, мынтөны, деньганыс уна, сэтчө и ветлө тшөкыда батыс, ноппйөн новлө вузавлыны лук да картофель. Евлог оз гөгөрво, мыйла рочьясыс асьныс оз вөдитны градъяссө? Деньгаыд өд и мыйкө мөдтор вылө на ковмас.

Төрыт бать да мам нетшкисны град вылысь лук, разөдісны сійөс сарай джодж пасьтала да бок вылас пөрөдөм улөсьяс вылын дыр пукалісны, мед ляпкыдджык вөлі гөрбылясьнысө, весалісны, вундалісны пуртөн вужъяссө да жарысла вижөдны заводитөм лук турун йывъяссө. Дасөн-дасөн көртавлісны пучокъясө весыт кузя көвъясөн да тэчисны ноппйө, мед асыв кежлас лоө дась, сөмын пельпом саяд шыбит да ну.

— Челядь, ті прөстө эн олөй, ветлөй чөд вотны, кисьмөма нин,— ыджыд мам мыччис Катялы да Евлоглы пелькиник чуманъяс.

Вот тай! Бара уджыд сюри! Сэтшөм окота вөлі Евлоглы ворсыштны, а ковмас вөрө мунны вотчыны.

— Вай босьтам ведра да вотам тырыс,— вөзйис Катя.

— Ведра тыр вотны огөй вермөй,— нюжөдыштис Евлог.

— А мый ог вермөй, заводитам кө. Босьтам стопка да сэтчө вотны мөдам и ведраас кисьтавы. Ведрасө сувтөдам, сьөкыд өд лоө новлөдлынытө.

— Лок лыддям, кымын стопка төрө ведраас.

Чоя-вока босьтисны медея дзөля ведрасө, петисны войтва тыра пельса дорө да стопкаөн сөвтисны ведраас ва.

— То, сө кызь стопка төрө, сідзкө, морт квайтымынөн и воө. А квайтымын стопкатө ми өдйө чукөртам, да өд?

— Да,— сөгласа довкнитө юрнас Евлог.

Кайисны муяс дорө, пырисны вөрас и босьтисны вотчыны. Первойя стопкаяс өдйө тыралисны, но ёна дөсадитчисны номъяс. Найө нем жалиттөг сатшкысьоны и сатшкысьоны чужөманыс. Евлог скөралө на вылө, өвтчө лёкыс:

— Этя лёк йөйясыс! Спокой оз сетны.

Орччөн кылисны челядь гөлөсьяс, на дорө матыстчисны Валя, Вера, Шурик, Машө да Галя.

— Ті дзик кушинсьыс вотчанныд да,— чуймыштіс Шурик.— Локтөй ме тіяны петкөдла, көні чөдйыс сы мында, көть зырийөн зырт.

Збыль, сэні, кытчө найөс нуөдіс Шурик, чөдйыс уна и гырысь. Стопкаяс тыралисны өдйө, но ведраын пыр на вөлі пыдөсас. Унанад гажа, челядь дугдывтөг сёрнитігтырийи вотчисны, өктисны чөскыд тусьсө. Шурик өти тусь чуманас чөвтө, мөдөс вомас, өтиөс чуманас, мөдөс вомас. Мукөдыс, видзөдан да, сідзи жө өктысисны. А Евлог ньөти эз сөй, зілис, мед өдйөджык тырас стопкаыс. Тыртас — ведраө кисьтас, тыртас — ведраө кисьтас. Со и первойя дас стопкаыс лои чукөртөма, мөд дасыс. Но сэс-ся пыр сьөкыдджыка и сьөкыдджыка кутисны тырны стопкаясыс. Веськыд мат! И номъясыс пыр ёнджыка и ёнджыка сөйөны, зьвермисны дзикөдз.

— Абу нин найөс некорсө вердлөмаөсь!— скөралө да швачкөдө чужөм вывсьыс тайө пөтлытөм рушка гагъяссө Евлог.— Вай мунам, Катя! Ог сэсся вермы!

— Час, көсйысим тыртны да тыртам нин. Тэнад кымынөд стопка нин лои?

— Комын коймөд тайө.

А ведраас джынйыс на абу. Мыйла тайө? Өд комын стопкаөн морт, сійө джынйыс нин, а ведраас коймөд пайыс сөмын.

— Вай кызкө-мыйкө старайтчам да вотам нин морт квайтымынтө,— корө чойыс Евлогөс.

Вотчисны да вотчисны, вотчисны да вотчисны, көть сьөкыда, чужъялөм сорөн, но медбөрын воөдчисны жө морт квайтымынас, а ведраас джынсьыс муртса унджык и лои чөдйыс. Мый тон вөчан? Мыйла и эз тыр? Өд гортын зэв лөсьыда ваөн мерайтисны, артмис, мый сө кызь стопка төрө ведраас. А тані вотисны сө кызь стопкатө, а ведраыд эз тыр!

— Мунам, Катя. Эгө вермөй мыйлакө тыртны, сорсим али мый гортаным?

— Тырмас, став чөдсө он жө вотөй,— Шуриклы тшөтш дышөдөма вотчынысө. Сылөн чуман пыдөсас и лоыштөма, зато вом дорыс дзоньнас лөз.— Лэччам, чөрту, вотчөмнас и ставнас!

Сэсса уськѡдчис да став матігѡгѡрса чѡдсѡ таяліс, чужъяліс кокъяснас.

И челядь чукѡр мѡдѡдчисны сиктлань.

— Вот кутшѡм шаньѡсь миян челядьпияныс!— гортаныс воѡм бѡрын ошкыштїс Евлогѡс да Катяѡс ыджыд мамныс.— То мыйтта вотѡмаѡсь! Час, ме тїянлы чѡдъя йѡв ылѡ торйѡда, а тайѡс косьтыны пуктам,— и кисьтїс чѡдсѡ кѡрт лист ылѡ паччѡрѡ.— Тѡвнас мѡс сулалїгад чѡдъя кисельѡн номсасьны кутанныд.

— Мыйлакѡ ведраас сѣ кызь стопка ва тѡрѡ, а ми сѣ кызь стопка чѡд вотїм, но ведраыс эз тыр,— элясьыштїсны челядь.

Та ылѡ ыджыд мамыс дыр сералїс:

— Сїдзкѡ, сѣ кызь стопкаѡн кѡсийинныд ведратѡ тыртны? Но и челядь! Чѡдйыд ѡд пуксьѡ.

Клуб дорын Евлог паныдасис Тараскѡд. Дыр нин эз вочаась-лыны, гашкѡ, вежон чѡж, но ичѡтик деревняд он ѡд ѡта-мѡдсьыд пышъяв. Недыр кык детинка видзѡдїсны ѡта-мѡд ылас.

— Кор нѡ ме тѣныд зорнас юрад вартлї? Мыйла прѡстѡсьыс суклясьнысѡ? Меным сѣтшѡма вермис сюравны, бур кѡть, батыд тѣнад дорйис. Вартлї эг ме тѣныд?

— Эн, дерт,— дзик веськодя вочавидзис Тарас.

— И нййт гуранад ме тѣнѡ эг тойыштлы?

— Эн.

— Мыйла либѡ сїдзисѡ вѡчан? Тѡдѡмѡн мортсѡ суклялан?

— А тѣнѡ ѡд эз жѡ нѡйтны?

— Эз.

— Вот и ставыс. Мый сэсса сїйѡ важсѡ казътылан? Бѡр другасьны кутам.

Татшѡм и эм Тарасыс, быттѡ сїйѡ Евлог водзын ньѡти абу мыжа. Дерт, бурасисны детинкаяс и водзѡ ѡтлаын ворсїсны, но тайѡ лоѡмторйыс Евлоглѡн некор оз вун, нѣм чѡжыс кутас помнитны.

— Но, слабѡг, воин. Кыдзи нин ветлїн?— юалїс мам батыс-лысь, кор сїйѡ воис гортас.

— Лѡсьыда эськѡ да, туйыс тай загреки лѣк-а. Гѡгѡр дялянка да кыкысь сорсьылім, вель дыр ковмис корсьысьны трѡпасѡ. Муртса и аддзим. Но прѡстѡ ветлѡм эз на ло, став лукыс инасис. Кык сапѡг гоз то челядьлы ньѡби, Евлоглы резинѡвѡй, а Катялы кучикысь вурѡм.

— Кѡмкотыд ѣна нин колѡ, да тайѡ зѣв бур. Ар воас, а челядьлы кѡмавнытѡ нинѡм.

Евлог син тырнас видзѡдїс, кыдзи бать кыскис нѡпсьыс ыль сапѡг гозьяссѡ. Резина сапѡгыс рѡмпѡштан моз дзоньнас югъяліс, батылѡн киясас небыда дзуртыштѡмѡн куснясис, а кучик сапѡгыс кутшѡмкѡ пемыд и весиг видзѡдѡмпырысь тѡдчѡ, мый чорыд.

— Тайѡ оз ло дзѡля?— резина сапѡгсѡ босьтїс киас да видла-ліс мам.

— Оз кѡ-а... Сэсса ѡд Катялы кѡ оз кут тѡрны, подулас эм новлысьыс, Евлог кыскалас.

— Сїдзи. Но, пуксьы, Митюк, да сѣйышт. Вир тшыг, кѡнкѡ?

Бать майтѡгѡн дыр мыськис кияссѡ, гольѡдчис мыссян доз-йѡн.

— Ме вит шайтѡн пучок вузавлї, а Кирѡ Вась Пиля квайтѡн. Но та пуд сылысь кык пучок гусялісны да ѡтвыйѡ воис,— сера-

лігтырыйи висьтавліс бать.— Көнкө, шуоны, эн пö вывтi горшась. Гортын нö ставыс бур?

— Бур.

Со и коли гажа шоньд гожöмьд, быттö эз и вöвлы. Евлог пöттöдзыс эз и вермы ворсыштны. Уна на мöвп юрас бергаліс мортыдлөн, но öтчьд казяліс, мый лунъясыс дженьдаммöмась, войясыс нюжалöмась, пемдöмась. Оз нин важ мозыс пöж шондi, тöдчымөн чиніс дöсадитчысь лöдзяслөн лыдыс. Иля лун бöрын колхозын петісны му вылö. Лунтыръясөн сяргö куим вöлөн кыскалан вундан машина, шырö воны удитöм нянь. Нывбабаяс вöнясьöны, чукöртöны вундöм няньсö да кольтаасьöны, мужикъяс чумалитчöны. Челядь на гөгөр лунтыр бергалöны, ворсöны муясбердса вöрын. Öтчукорнад гажа. Рытъясын, пемдöм бöрас, сэтшöм лöсьыд ворсны дзебсясьöмысь, он, небось, другөн аддзы, кутшöм чумалиö кодi пырис. Ид чумалиясыд дзöлясь, дзескыд, на пытшкö он весиг төр. А вот сю чумалиыд ыджыд, пыран пытшкас да быттö неыджыд керкаын пукалан. Но оз дыр сулавны чумалияс му вылын. Косьмöм бöрас мича поводдяөн найöс разьöны, чумали майöгъяссö бөр новлöны вөр бокö да чукöртöны пашкыр коз улö, сэнi найö куйлöны мöд арöдз. А кольтаяссö ваялöны гумла дорö да тэчöны джуджыд сёрöмъясö, көнi найö водзö тöлалöны. Ёркыд дырйиыс нин колхозникъяс чукöртчöны ыджыд вартан машина дорö, кодлысь көлесасö паськыд тасмаөн бергöдлö трактор. Гөгөрбок кылö уджалан шы. Кольтаяссö кыпöдöны машина вылас, разьöны да чöвталöны паськыд розьö. Мый сэнi машина пытшкас вöчсьö, Евлог оз гөгөрво, но бокöдыс мыччöдöм трубатi та вылö лöсьöдöм мешöкъясö лэччö тусь. Мешöкъяссö кутöны колхозницаяс да тырöм бöрас вештöны бокö и пыр жö вежöны куш вылö. А машинаводзса паськыд вомöдыс ортсö петö куш идзасыс. Лöсьыда думыштöмась рочьясыд!

Колхоз му вылысь нянь идралöм бöрын Гурей Митрей катöдіс писö Чуркйö сиасыны. Кык во сайын Евлог кайліс нин лэч туйяссö батыслысь видзöдлыны, кор Демаö волісны веждінса велöдчысьяс. Сэки сылы вöлі сöмын на нель арöс.

Буретш Евлог Тараскöд лöсьöдчисны мунны шор дорö корабъясөн ворсны, кор кыліс Шуриклөн горöдöм:

— Чуркйö кайысьяс локтöны!

Миш Насталөн керка дорсянь чой горув öта-мöд бöрсяыс люзыгисны тöдтöм челядь, ставныс гирысьсь, Шурик кодьсь жö. Зэв унаөн, гашкö, морт кызь лоас. Мышканыс чераньяс моз ыджыд нопъясь, гөрбыльтчöмөн мунöны, мудзöмась. Кык детина ноп кыңзйыс кианыс нуисны саöссöм бокъяса ведраяс, кодсюрөлөн тыдалісны черьяс. Челядькöд тшöтш локтісны куим верстьö нывбаба, дерт, көнкö, медыджыдъяс пыддиыс.

Воысьяс сувтисны Иринь Гришаяслөн град йөр горулын быдысь коз пуяс дорö да сьöкыдырысь шняпйöдлісны нопъяссö му вылö. Вөрöшитыштисны мудзöм пельпомъяссö.

— Татчö и биасям, зэв лöсьыд то, кос,— шуис öти нывбабаыс.— Мальчикъяс!— мыйлакö детинаяссö сійö тадзи нимтiс, оз тöд, тшук, кыдзи коминас шусьö.— Ноко öдйö котöртлöй вөрö

песла. Да перйѡй кык вожка и вомѡна кызджык бедь, пусьыны ѡд ковмас. Коля да Ваня, лѣтчылѡй шорѡ вала! Нывъяс, зѣля кутчысьѡй картупель весавны! Мый шензянныд, некор на походѡ энѡ ветлѡй али мый?

«Кутшѡм походѡ? Локтѣсны Демаѡ, а шуѡны кутшѡмкѡ походѡн?»— чуймѡмѡн мѡвпалѣс Евлог, кодѣ демаса мукѡд челядьыс-кодѣ тшѡтш дивѡ вылѡ моз видзѡдѣс бокѡвѡй йѡзлысь ноксьѡмсѡ. А веждѣнсаыс сѣтшѡм гоньѡгѡсь, мыйкѡ котралѡны, ноксьѡны, на гѡгѡр сулалысь челядьсѡ быттьѡ оз и аддзыны.

— Оз ѡмѡй нѡ Чуркѡй кайны кѡсйыны? То кутшѡмкѡ походѡ шуис ветлыны да?— юалѣс Евлог Шуриклысь.

— Чуркъяс походѡн мунны и кѡсйѡны,— зѣв вылѣсянь чѡвтѣс Шурик.

Евлог бара нинѡм эз гѡгѡрво, Чуркѡй тайѡяс кайѡны али походѡ? И кѡнѣ сѣйѡ походыс? Мыйлакѡ батыс некор некутшѡм поход йылысь эз гаравлы, век Чурк йылысь сѣрнитлѣс. Выхысь юавны Шуриклысь сѣсся эз и лысьт.

А пестѡм бипур дорын оломыс пуис. Ставныс мыйкѡ нускисны-вѡчисны, быдѡнлы сюрис удж. Кык детинка тувъялѣсны бипур ѡтар-мѡдар бокъясас вожкаяс, коймѡд — беринѡсь чужѡма, гѡрбыла ныра — сулалѣс орчѡн да велѡдѣс найѡс:

— Да оз сѣдзи ков! Тѣ мый, Жикин, чертѡ некор на киад эн босытлы али мый?

— На, ачѣд видлы, тѣ кѡ сѣтшѡм нин мастер!— Жикин мыччис черсѡ сѣйѡс велѡдысь детинаыслы.

— Час, Борѡ петкѡдлас, кѣдзи колѡ чернад уджавнытѡ,— нюмдѣс верстьѡ аньяс пиысь ѡти.

— То видзѡд, кѣдзи колѡ, менам момент пырас!— Борѡ черсѡ юрсыйс вылѡ лѣптылѡмѡн тышнас мый вынсьыс камгис вожка шѡрѡ. Но вожкаыс пыдѡ муѡ сатшѡм пыдди шѡри потѣс.

Бипур дорын ызѡбтѣс гажа серам:

— Но и Борѡ! Ещѡ ѡд ошйысьѡ! Аслас удачаыс некытчѡ абу-а.

— Ѳнѣ ачѣд и ветлы вѡрас да выль вожкасѡ перйы!— скѡрысь чѡвтѣс Жикин.

— Бурджык, Коля, ачѣд нин ветлы, а то тайѡ Борѡыд коксѡ керыштас ли, вѡрас вошас ли,— ѡвтыштѣс кинас мѡд нывбаба.

Жикинсѡ, вѡлѡм, Коляѡн шуѡны.

Борѡ чушнитчис да вешйис бокѡджык, а Коля муртса кежлѡ саявлѣс вѡрѡ, недыр мысти вайис выль вожка да лѡсьыда тувъялѣс сѣйѡс. Вожкаясѡ вомѡналѣсны потш, сы вылѡ ѡшѡдѣсны ва тыра ведраяс. Вот мыйла ведраясыс саѡссьѡм бокъясаѡсь, наын пусьѡны бипур весьтад.

— Евлог! Катя! Ноко ѡдйѡ локтѡй ужнайтны!— кылѣс гѡра йывсянь мамыслѡн горѡдѡм.

Со ѡд, колѡ ѡнѣ гортѡ мунны татшѡм гажаинсьыс! И кынѡмыс ньѡти на оз сѡмав, кѡть аски асылѡдз оз сѣй! Буретш ѡнѣ, дзик ѡнѣ мамыслы колѡ вѡлѣ чукѡстны найѡс гортас! Оз гѡгѡрво Евлог гырысьяссѡ! Кутшѡмѡсь ѡд найѡ! Пыр зильѡны мыйѡнкѡ да мыйѡнкѡ челядьсѡ увтыртны. Быттьѡ сѣрѡнджык оз позь налы сѣйны? Мед асьныс ужнайтѡны, сѣтшѡм нин кѡ тшыгѡсь! Кынѡм то ньѡти на оз сѡмав.

— Мунам, Евлог,— нуѡдѣс воксѡ Катя.

Быть мун, а то сюралас ещö. И чоя-вока надзöникöн, зэв неокотапырысь восьлалісны гортланьыс. Унаысь на бергöдчылісны, мед видзöдлыны тöдтöм йöз былö. Вот век тадзи. Нинöмсö эз и аддзывны, а сэтшöм окота кыз позьö дырджык на олыштны гажа бипур дорын, видзöдны сэні паськöдчöм йöзлысь мошкоритчöмсö. Век öд мыйкö да мыйкö вьлитор налысь тöдмалан. Оз öд тай быд лун веждінсаясыд волены.

Ужнайтсьöм бöрын öдзöсö тотшнитісны. Чоя-вока чуймöмөн видзöдлісны öта-мöд вылас, öд налөн сиктын татшöм модаыс эз вöв, мед öдзöсö таркöдчыны. Сиктсаясыд, кöть коді оз лок, прöстö восьтасны öдзöссö и пырöны. Василиса Николаевна сöмын таркöдчылö, но сійö öні каникул вылын кöнкö ылын, мöд районьын. А тані тутш-тотш вöчисны и ланьтісны.

— Да-да!— гораа шыöдчис бать, сійö, дерт, гөгөрвоис, мый Веждінысь воём йöзыд на ордö вöзйысьöны.

Öдзöс воссис, керкаö пырисны сійö кык нывбабаыс, кодъяс челядькöд локтісны Веждінсянь.

— Здравствуйте!— рочөн чолөмасисны найö.

Тадзисö сиктын здоройтчылісны сöмын учительница Василиса Николаевнакöд.

— Здравствуйте,— шыасис воча бать.— Кутшöмкö вольтöм госьтьяс локтöмаось. Вай воськовтöй водзö, пуксьöй, шойччöй.

Нывбабаяс пуксисны налы мыччöм улöсьяс былö.

Бать лосьöдчис пырысьяслы паныдөн пызандорса лабич былö, мам — öшинь дорö, а ыджыд мам — потан дорын Любакöд. Евлог да Катя пыр жö шуркнитісны гөбöч былö, сэсянь пöлатьö, мыччöдісны юрнысö занавес увті брус весьтöд, сюся видзöдісны да кывзисны, мый йылысь кутас мунны сёрниыс.

— Дерт, кöнкö, ті могөн локтінныд?

— Могөн, зэв ыджыд могөн на локтім-а,— заводитіс сьöдов юрсиа аныс.— Ми Веждінса школаысь учителяс, менö шуöны Светлана Петровнаөн, а тайö Валентина Михайловна. Вот локтім челядькöд походö. Кöсьям кайлыны Чуркйöдз. Дмитрий Гуриевич, миянлы висьталісны, мый тіян сэні лэч туй, и вөр керка эм. Ми со и локтім юавны, гашкö, ті верманныд миянös нүöдлыны сэтчöдз. А то ми öд нинöм татысь ог тöдöй. Вот татшöм миян и могыс.

— Ми вермам тіянлы и мынтысьны таысь, Дмитрий Гуриевич,— шыасис мöд нывбабаыс, кодös Валентина Михайловнаөн шуöны.— Уна-ö шуанныд, сы мында и пуктам.

Учительницаяс, вөлöмкö, тайö аньясыс! Эз прöстö Евлоглы чужöм выланыс найö кажитчыны сöстөмөн. Учительницаысыд öд ставныс зэв мичаось да. Василиса Николаевнаыд то кутшöм! Позьö, бара-й, вылас видзöдлынытö! Синтö вештыны он вермы! И тайöяс кö вежсясны, дзик мöд йöзөн лоасны, туяд тай уджалан паськöмаось-а, вөрöдыд ветлігад оз öд, буракö, кутны бур көлуй кыскавны.

— Мынтысьны оз ков,— веськодямоз öвтыштчис бать.— Сі-дзи ме тіянös нүöдла, татчöдз кыссьöмныд да. Мед сöмын поводяыс оз торксьы-а.

Деньгаысь бöрыньтчис, вöзйöны вöлі да! Ачыс быд көпейка лыддьö-а, чуймаліс Евлог, коді сюся кывзис гырысьяслысь сёрнисö.

— Сэні ӧд узынытӧ унаыды некӧн да лунӧн ковмас кайлыны. Челядьыд воасны?

— Гырысьӧс нин, абу кагаяс,— нюммуни́с Светлана Петровна.— Сэсся ӧд асьныс вӧйысисны походӧ ветлынысӧ.

Кузяла кутшӧмкӧ поход йылысь гаралӧны. Мый жӧ сійӧ сэтшӧм — походыс? Колӧ эськӧ Евлогы тайӧяскӧд тшӧтш кайлыны Чуркъяс да, вӧр керкасӧ батыслысь окота жӧ видзӧдлынысӧ.

— Кымын километра нӧ керкаӧдзыс лоӧ?— юалис Валентина Михайловна.

— Ме серти кӧ, вӧр керкаӧдзыс километра дас вит гӧгӧр, да керкасянныс вышкаӧдзыс куим.

— Артмӧ, дас кӧкъямыс. А бӧрӧ-водзӧсӧ комын квайт лоӧ,— видзӧдлісны ӧта-мӧд вылас велӧдысьяс.— Нинӧм, котӧртасны. А кодӧ оз лысьт кайлынысӧ, ас вылас оз надейтчы, мед кольччылас Демаӧ дай.

— Но, сідзкӧ, Дмитрий Гуриевич, аски асывнас водзджык и мӧдӧдчам,— чеччисны улӧсьяс вылысь гӧсьтъяс.

— Да, татчӧ кук йӧрӧ шор дорас кӧ чукӧртчаннӧ и.

— Мый нӧ, весиг пызан сайӧ он пуксьылӧй?— чуймыштіс мам.— Сідзи и мунаннӧд?

— Огӧ нин, ми ӧд асланым сӧянӧн локтім да удитім нин уж-найтнысӧ.

Веждінса учительницаяслӧн петӧм бӧрын Евлог матыстчис мамыс дорӧ. Мыйкӧ кӧ сылы колӧ батысянныс, детинка пырджык зілис первой мамыскӧд сӧрнитны, ачыс эз лысьт бать дорас шыасьнысӧ, полис, мый Гурей Митрей пыр жӧ орӧдас сӧрнисӧ да некутшӧм тӧлк оз ло. А тані мамыс кӧ пиыс дор сувтас, то батыс вермас дзуртігтырйи и нылыдавын сылӧн корӧмлы.

— Мам, мед батьӧ менӧ аски тшӧтш босьтлас Чуркъяд. Но?

— Мы-ый? Сы ылна-аӧ?!— весиг синъясыс гӧгрӧсмисны мамыслӧн.

— Меным ӧд окота жӧ кайлыны-ы,— нораа нюжӧдіс пиыс.

— А воан?

— Мыйла нӧ ог во?!

Мам эскытӧма видзӧдліс пиыс вылӧ, довкйӧдлыштис юрнас, но век жӧ шыӧдчис Митрей дорӧ:

— Мите, Евлогыд то тшӧтш нуӧдчӧ Чуркъяд. Босьтлан он?— шыасис бать дорӧ мам.

— Кӧсьян миянкӧд кайлыны?!— Евлоглань кӧсӧйтчыліс батыс.— Он во! Туй шӧрас кок вывсьыд усян! Узьӧмӧн кӧ, мӧд делӧ-а.

— Мед кайлас, зэв ёна то детинаыс окотитӧ да...

Бать донъялӧмӧн мерайтіс писӧ юр вывсянныс кок улӧдзыс, недыр мӧвпалыштис да скӧрысьмоз кывкӧрталис:

— Но, сэтшӧма кӧ кӧсьян — ветлам. Но сӧмын тӧд: ме тэӧ сывйын кыскавын ог кут! Ачыд кӧ нуӧдчин, ас кокнад и мунан!

Сэтшӧм батыс и эм, пыр зумыш, некор оз нюммуны Евлогы. Но и мед! Зато аски Евлог гырысь челядькӧд ӧглаын кайлас Чуркйӧ, тӧдмасыс батыслӧн лэч туйнас, вӧр керканас.

Асылыс шондіа, гажа, ывлаыс сідзи и вашъялӧ. Енэжас ни ӧти кымӧртор оз тыдав. Посни кайяс гӧгӧрбок ланьтытӧг сылӧны. Евлог лэччис батыскӧд лысваа турун вывтӧ гӧра горув, вуджис кык плакаысь лӧсьӧдӧм пӧскӧд шор да сӧльнитчис веждін-

са школьникъяскөд, кодъяс сулалісны чукөрөн, гажаа сёрнитісны да сералісны. И Шурик то нопъясьома, тшөтш на дорын бергалё, Чуркйö жö мөдөдчöма. Но и бур. Ас йөзыхкөд пыр нин гажа-джык лөö.

— Тайö нö ичөтик мальчикыс тшөтш миянкөд кайö?— юаліс Гурей Митрейлысь Валентина Михайловна.

— Окотитіс тай тшөтш ветлыны-а.

— Аددзанныд! То кутшөм дзөляник на, и мөдөдчöма сы ылнаö, а ті-и-и повзинныд!— бергөдчис велөдысь аслас школьникъяс-лань.— Но, коді кайысь, вөрзёдчам!

Вель уна велөдчысь, а накөд тшөтш коймөд учительницаыс, кольччисны Демаö.

— Слабакъяс, трусьяс, некытчö тіян удачаныд абу!— бергөдчыліс кольччысьяс дөрö Борö.— А ми кайлам, нинөмысь огö полöй!

Гурей Митрей вөрзёдчис, сы бöрын лөсьөдчис Шурик:

— Ми — вöрсаяс, мунам медводзын.

Коймөдөн восьлаліс Евлог. Борö коли су потшөс, перилöа посъяс вывті вуджисны лөня шунгысь Войвож да визув Асыв-вож юяс. Тайö Вежа юлөн вожъясыс. Со помасисны видзяс да туристъяслөн кыз гез моз нюжалөм визыыс пырис вөрö. Ю дорсянь пыр жö туйыс крута катөдö вывлань. Батълөн трөпа бур, мичаа ордымалöма. Öтарас и мөдарас паныдасълöны сёлa лэчъяс.

— Тайö сёлa вылө сёръя лэч. Сёр öтар-мөдарас öшөдöма пельсь розъяс. Синмыд сёлaыдлөн сюсь, жбыркнитас-пуксяс лэч вылас, öтарладорсьыс тусьяссö көсьяс кокыштны, но оз судз. Увъяссьыс гартөм вугич пырыс мөдарас вуджигас и шедас,— висьталö челядылы Митрей.— А тайö ош пекля,— пуö көрталөм трос вылө индö Митрей.— Потшöма жö бокъястыыс понöльясөн, мед Микайлöыд веськыда ордым шөрөдыс мунас, а оз кытшовт.

— Ошъяс эмөсь?!— чуймис Борö.

— Вöрад, дерт, эмөсь!— шензыйштіс Борөлөн төдтöмлун вылө Шурик.— Тэ нö мый?

— А то и ош кок туйыс. Видзөдлөй! Дзик быттё паськыд лапаяса көмтөм морт мунöма. Тані сёнад, няйт вылад, лөсьыда төдчö.

— А друг да уськөдчас миян вылө?!— синъяссö шармөдіс Борö да бергөдлыштіс юрсö.— Пу вылө ковмас кайны.

— О-оз уськөдчы, эн полöй, сійö ачыс бокö кежö,— лөньöдыштіс Борөос Гурей Митрей.

— То ошкыд кодзувкоткарсö пазөдöма!

— Тані со и сіталöма. Регыд на мунöма, миян водзын, руалö на сітыс,— трөпашөрса сьөд чукөр вылө индіс Гурей Митрей.

— Вай бергөдчамöй, абу на öд сёр,— бергаліс öтарö-мөдарö Борö, сылөн чужöмыс кельдөдöма, вом дорыс тіраліс.

— Огö жö öд бергөдчöй,— серөктіс Гурей Митрей.— Сійö гожөмнад рам, морт вылад оз уськөдчы, ыліті кытшлалö.

— А пекляд кө шедіс?— полігтырйи шыасис öти ныв.

— Гожөмнад öд оз кыйсьывлыны! Пеклятö менам абу октöма, некыдзи шеднысö оз вермы,— такөдіс сійөс Митрей.

Трөпа кузя мунігөн вöрыс дугдывтөг вежласис. Сөнö лэччөдлө,

пемыд парма кузя зумыш козъяс костод гартчо туйыс, югыд кушино петало, коні ена гажаджык и весиг лов вылад кыпид-джык лоо.

— Но, вит километра мунім, позьо шойччыштны,— оти татшом кушинын шуис Митрей.— Пуксыйлой, кокъясто вескөдыштой.

Челядь порччалисны нопъяссө, пуксялисны, коді кыдзи кужис. А Евлог быттьо эз и мудз, коть сизим та мында на мунас. Бур, мый батыслон сэтшом кузь лэч туйыс, уна потка шедо. Евлог быдмас да содтыяс на, ылөджык выль вөр керкасө лэптас.

— Мед вирыд кокъяссыд лэччас, позьо кокъясто выло лэп-тивлыны.

— Тадзи?— юалис Шурик, водіс коз бердо, а кокъяссө кыпөдіс пу вылас да кресталис.

— Но, позьо и сидзи. Коді кыдзи көсйө, сидзи и шойччо.

Недыр пукалыштисны и вөрзисны туйо. Шойччыштөм бөрад первойсө мунны сьокыдджык, но недыр мысти кокъяс велалисны да мудзыс вешйыштіс.

— Но, вот и Ыджыд ёль дорө воим. Позьо юыштны, кодлөн горшныд косьмис. Менам то и чибльог лосьодөма,— индіс Гурей Митрей челяды, кор туристыяс лэчисны кузь турунөн тырөм сөнө.— Тайо бөръя ёль, сэсса ваыд вөр керкаөдз оз ло.

Горшъяс косьмөмаось, некод эз отдортчы чөскыд кодзыд вассыд. Юыштісны, кодсюрө весиг мыссисны. Евлог тшөтш жө мыссис. Кодзыд ваыс лосьыда ыркөдіс чужөмсө.

Ёль вуджөм бөрын туйыс нуөдіс пыр водзө вывлань. Кузь вөлөма лэч туйыс батыслон. То нин мыйдыра мунісны, а пыр на помыс оз тыдав. Евлоглөн воськовъяс вочасөн дженьдаммисны, шедісны пыр сьокыдджыка и сьокыдджыка, кажитчис, мый сапөгъясас кызджыка и кызджыка отарө конасис ляті. Вочасөн сійөс ордйөдалісны оти бөрся мод гырысь детинаясыд. Воисны восьсаинө, коні быдмисны сөмын гежөдик кыз пуяс.

— Тані Парма Иванлөн вөлөма му,— висьталис Митрей.— Аддзанныд, коз бердас кык гөр пыр на эм. То кутшөм кызось да сьокыдось, өнія гөръясыд кык пөв кокниджыкось.

Збыль, коз улын сулаліс кыз көртысь вөчлөм кык гөр. Татшөм гөрыд некорсө оз жугав, мед сөмын вөлыд эз вөв жеб, сэки кыскалас.

— Кык агас на тані коркө куйлісны, но пиньяссө перъявалисны да лэччөдлісны Демао колкозыды.

Эрдыс дзоньнас тырөма морт гумөн. Евлог төдо, мый сылөн йылыс чөскыд, юмов, эз этша өд номсасьыв. А тані ставыслысь йывъяссө кодкө мисьтөма орьөдлөма.

— То, ошкыд полян йывъясто сөйөма,— шевкнитіс кинас батыс, быттьо төдіс пиыслысь мөвпъяссө.— Сійө өд юмовтө ена радейтө. Тані медшөр ош позйыс и эм.

Пырисны сукджык козъя вөрө. Воисны дзик турунтөм, чорыд гумла кодь юждөминө.

— А мыйла тані нинөм оз быдмы?— чуймаліс оти ныв.

— Тані ме коркө ошкөд тышкасьлі. Пекляө шедөма да куйлө, ланьтөдчөма, виччысьо вөлөм. А төда өд, мый пекля октөма водзынджык, да видзчысьомөн жө восьлала. Вочаасим синъясөн да гөгөрвоис, мый казялі, кыз тай равөстіс горштырнас. Сьөла

зарад вöлі ружье стволад менам да удиті вежны öтка пуля вы-
лö. Ошкыд лёкысь нетшыштчис да көрт пеклятö сунисöс моз
орöдіс и меланьö зырöдіс. А ме метитчи да лыйи, и пыр жö са-
йöдчи этайö вожа пу саяс, пока тшыныс эз разав. Усьліс эськö,
но пыр жö и чеччис. Пу сайсяньыд мöдысь лыйи, та бöрын вö-
листи уси.

Евлог лöсьыда помнитö, кыдзи коркö батьыс Чуркыйысь лок-
тöм бöрын кыскис нопсьыс ошлысь повзöдчана жергöдöм гы-
рысь ёсь пиньяса кузь гöна юрсö. И öні, батсьö кывзигөн, детинка
веськöдчыштис, тшапа кыпöдіс юрсö да гоньöга кытшовтіс ви-
дзöдласнас сійöс кытшалысь челядьöс. Мед, найö кө ыджыдöсь,
мед, школаын кө нин велöдчöны, сы пыдди Евлоглөн батьыс то
кутшöм удал. И война вылад разведчикөн вöлöма, ловйөн фа-
шистьясöс фронт визь сайсянь кыскалöма, а öні то нинöмысь
повтöг и ошгьястö чергöдалö. Көть сійö и скөр, тшöкыда тасмаав-
лö писö, но век жö некодлөн татшöм батьыс абу!

Челядь сюся видзöдалісны пусö, кытчö Митрей домавлöма
пеклясö да көні пыр на дженьыдик сімöм трос помыс, кодöс
орöдöма ошкыс, чурвидзö.

— Мудзинныд, көнкö? Но, шойччыштамöй тані. Сэсся эз
нин уна коль, километра куим кымын сöмын.

Веськыда му вылö пуксьöмөн шойччисны, кодсюрö весиг
водлісны. Евлог тшöтш пуксьыліс пөрöм пу вылö.

Парма Иван мусянь туйыс мöдіс лэччöдны увань.

— Мыйла нö огö вывань кайöй?— юаліс öти детина.

— Керка дорö матыстчам. А оланінад öд мед матын ва вöлі,
гöра йылад нö ваыд кысь босьтчас? Со и колö неуна горувланьö-
джык вөр керкатö кыпöдны, мед ылісянь эз ков ва катлыны.
Сэні ключ петö, воам да аддзанныд.

Регыд мысти и кызкö друг мыччисис вөр керкаыс. Быттö
чукуль саяс и сулалöма.

Евлогöс быдсөн шогöдіс, сьölöмыс веськыда дількмуніс чуй-
мöмысла да шай-паймунöмысла. Öд сійö виччисис аддзыны көть
ичöтик, но мичаник, кыпыд да югыд керка. А тані сулаліс
потшгясөн да сямöдөн вевттöм ляпкыдик сьöд пывсян. Дерт,
Евлоглы пырны-петны позис кокниа, но батьыслы сöмын гөр-
быльтчöмөн. Керкаыслысь нельöд пайсö босьтöма сёйысь вартöм
трубатöм пач, тшыныс веськыда вомöдыс петö керкаас. Пытш-
кас пемыд, ичöтик öшиныыс зэв омöля югдöдö, и йиркас, и
стенгясас кыза пуксьöма сьöд са. Пач вом весьтас лöсьöдöма
сёр, кытчö пуысь вöчöм кутöдгясөн öшöдöны чайник да пöрт.
Черөн лöсалöм плакаясысь кык морт вылö неыджыд узылан
нар, лабич. Öшинь бокас зэв важ, косясьлөм öбраз, а мый сэні
серпасалöма, он и гөгөрво весиг. Потасö сүйöм пöвтор вылын
дзузган — куш консерв банкаö увань юрөн сатшкөм карасин
лампа юр, стеклöыс абу. Йирк бердас, матичас, көрт тув вылын
öшалö гартлөм вольпась көлуй. Сідзи батьыс шуö, а збыльвылас
тайö вундалөм сосгьяса важ пупайкаяс. На вылын и узлö нар
вылас батьыс.

Керка саяс кузь нель кок вылын сулалö ичöтик жытник
кодь.

— Тайö нö мый?— индіс Евлог сы вылö.

— Тайö тшамъя, сэні прөмыстө и видза. Зэв öд уна шырыс, пыр и сёясны. А тшамъяад пырны оз вермыны.

— А мыйла тшамъя улас муыс сэтшөм небыд, дзик лыа кодъ?

— Тані лэбув улад сёлаясыд пуртікасьöны, тойяссö вывсьыныс вөтлалöны.

— Дзик тані и олоны?!

— Да, керка дорад гоз-мөд семья быд во быдтысьö.

Тайö детинкаöс чуймөдіс. Вескыда керка бокас и олоны сёлаясыс! И оз повны!

Век жö эз кажитчы детинкалы вөр керкаыс, кутшөмкө шуштөм. Ещö öд гортас, мыйöн коддзас, ошйысьö батыс: зэв лöсьыд керка пö менам, шоныд, юр вылад оз вияв, кыйсьöм бöрад мудзвывсьыд майбыр шойчынытö. Час, Евлог ыджыда быдмас да бать дорсьыс лöсьыдджык керка кыпöдас.

Вышка дорөдз ветлыны окотитісны зэв этшаөн, Гурей Митрейкөд мунісны Шурик, Евлог, Жикин, Борö да öти роч ныв. Учительницаыс мукöд челядьыскöд кольччисны керка дорö.

— А тэ нö, Борö, тшöтш мөдöдчин?— юалис кодкö кольччысь детинаяс пиысь.

— Метöг нö кызди? Ме первойөн кая вышка йылöдзыс! Ставсö видзöдала, көні мый эм. Медводз ассьыным керкаöс корсьла.

— Тэ, бара-й, каян!— эскытöма серöктісны кольчысьяс.

Керка дорсянь туйыс пыр жö мөдіс катöдны вывлань. Кайисны да, кайисны да, Евлог гырысьяс бöрсяыд вөтчигад дзикöдз жаяліс. Та дырйи тöдчис, мый вöрыс прамöя вежсис, лои кутшөмкө ляпкыд, быттö кодкö нарöсьнö кажйöдлöма-чегъялöма пу йывъяссö.

— Гöра йывсьыд ён тöлыд да лымйыд пуястö жутлöны,— висьталіс Гурей Митрей челядьлы, бара быттö гөгөрвоис Евлоглысь чуймалөмсö.— Ми öд прамöй вылö нин кайим. Али энö казялöй?

— Кыдз эг казялöй? То кызди ставным пöсялім да, брöд ва-öсь лоим.

— А то и вышкаыс.

Воссис вын паськыд эрд, шöрас сулаліс нель кока джуджыд вышка, кыпöдöмаöсь сійöс öта-мөд бердас кыз болтъясөн да ён гайкаясөн кутöм керъясысь. Öтикыд абу судзöма да öта-мөд бöрсяыс куим кузь пос ковмöма сувтöдны, мед вышка вылөдзыс кайны. Öтикöд каян, воан пöвъясысь тувъявлөм джадж кодъ вылө, сэсянь мөд поскöд, бара джадж кодъ воас, и сöмын кой-мөд бöрас веськалан йылөдзыс.

— А кутшөм джуджыд! Интереснö, кымын метра лоö йылөдзыс?

— Метра комын вит кымыныд лоö, оз этшаджык,— вышка вылө донъялөмөн видзöдліс Гурей Митрей.— Кодкö кайланнды онöй?

— Татчөдз кыссим да йылөдзыс кайлытöг огö жö лэччöй,— вочавидзис Шурик да медводзын повтöг кайис дзуртысь да лайкъялысь палича посъяс кузя дзик йылөдзыс. Сы бöрся не-ыджыд костөн вөтчис Жикин Коля. Борö öдöбтыліс жö, тшупöд дас вылнаөдз кыпöдчыліс, но сувтіс:

— Ме, тшук, ог кай, поскыс, видзёда да, омёлик, паличьясыс чегны лютось, вышкасё тёлыс качайтё,— жалпырысь довкиёд-лыштис юрнас да бөр лэччис му вылё.— Мый сэтысь и видзёд-нысё, помтём-дортём вөр.

Видліс кайны и роч нылыс, но керка судта кымын вылнасянь ойзиг-чилзигтыр өдйөджык нин бөр косіс. Мөдөдчыліс вывлань и Евлог, но батыс чорыда өлөдіс:

— Евлог! Эн кай! Важ вышкаыс да сійө и видзёд, мед оз пөр!

Нинөм он вөч, сідзи и ковмис увсянныс видзөдны Шуриклөн да Жиикинлөн енэждорса джодж вывтёйс ветлөдлөмсё.

— Мыйыс сөмын тані оз тыдав!— горзіс Шурик.— Пасьтала вөр, а тонё Демаыд, Мусибедыд! Эстөн мыйкө лөз, зэв паськыд!

— Сійө, тшук, Дон ты,— воча горөдіс Гурей Митрей.

— А то Веждіныд кутшөм мичаа вольсыштчөма! Ульянаса манастырыд тыдалө и.

Шудаось жö Шуриkyс да Жиикиныс! Ыджыдось да налы позьö кайны вышка вылад, некод найөс оз сувтөд, а Евлоглы коли сөмын улітёйс шлапъявны да вежавны налы. Нинөм, и Евлог коркө быдмылас да кайлас на тайö вышка вылад, ставсö гөгөрбок видзөдалас, сетлас синмыслы пай. Воласны на и сылы праздник луньясыс!

— Но, лэччөй жö сэсса! Дыр нин любуйтчинныд,— кутшөмкө кад кольөм бөрын корис Шурикъясөс Митрей.

Нюмъялігтырйи, вомныс пельысь пельөдз, лэччисны му вылё Шурик да Жиикин. Майбыръяс!

— А тэ нө, Борö, мый эн кайлы?— шпынняялігтырйи юалис Жиикин.

— Кодлыкө өд колö жö ловйөн кольччыны, швачкысинныд кө сы вылнасянныд,— вочавидзис мөдыс.

Керка дорö бөр воисны өдйө, чой горувтö кокныдджык лэччынытö, котөрөнмоз и мунісны. Налөн ветлігкості тані пусьö-маось, бикур дорын ыджыд ведраын руалис яя консервысь пуөм чөскыд дука шыд, джек вылын дзоридз кодь мича чукөрөн куйлісны еджыд нянь шөрөмъяс.

— Но, кайлінныд вышка вылад?— юалис Валентина Михайловна. Сійö пукаліс мыр вылын, шөраліс нянь, мавтіс выйөн да мыччаліс челядылы.

— А кызди нө! Дзик йылөдзыс! Став муыс и ваыс сэтшөм лөсьыда тыдалө,— зэв збоя вочавидзис Борö.— А вышкаыс шогмытөм нин важ, керъясыс сісьось, гөгөр люті-леті, дзоньнас дзорө, вот-вот киссяс. Тёлыс пеляд шутылялө, муртса менö пос вывсыс эз нетшышт! Ки пөлөй мынліс весиг.

— Болтун!— серамыс петіс роч нывлөн. Евлог чуймөмөн кыпөдіс синъяссö ныв вылё, өд таөдз сійö чайтліс, мый локтысьяс пиысь ставыс рочось да коминас некод оз гөгөрво, а тайö нылыс гөгөрвоö вөлөм.

— Да, сэтшөм паськыда гөгөр тыдалө, весиг тіянөс аддзылі,— водзö сөрис Борö.

Евлог вомсö паськөдөмөн видзөдіс Борö вылё. И кызди сылы абу яндзим пөръясьнысö? Аслыс кайлыны зэв уліникö удачаыс и лои, а йөз водзад то кызди баквалитө. Жиикин да Шурик чөв олөны, веськодь налы, быттё оз и кывны, шпынняялөны сөмын.

Евлог видзөддiс батыс ыылö, но сийö нинöм жö эз шу. Сэки детинка эз вермы кутчысынысö и став сёлөмсяныыс гораа чөвтiс:

— Эн кайлы да... Куш Шурик да Жикин кайлисны.

Ставыс вак-вакөн серөктiсны. Евлог гөрдөдiс да бергөдчис мөдарө, бара сылөн мыйкө не сiдзи, буракө, шусис.

— Мудзинныд?— тайö нин Светлана Петровна сёрниö пыртчис. Сийö дарйөн кисьталiс тасьтиясö шыд.— Кынöмныд сюммис, көнкө? Но, локтöй да шыдсö панялыштöй, миян пось на.

— Да! Ой-ей ёна сюмалö, став ынöс джуджыд шылкаыд кыскөма,— эз дугды больөдчыны Борö.

Сийö медводзын нюжөдiс кисö шыд тасьтиланы, нетшыштитiс Валентина Михайловна кийыс ыя нянь да горша мөдiс шлумк-йыны-сёйны.

— Но, пиö, мудзин?— Гурей Митрей разис ноп мешөксö.

— Неуна.

— На, көвдум сёйышт, кынöмыд öд сюмалiс, көнкө?

Евлог дорö матыстчис Жикин:

— Лок, Евлог, ыя няньсö видлы,— да нуөдiс детинкаос Валентина Михайловна дорö.— Зэв öд чөскыд Веждiнад няньыд.

— Валентина Михайловна, сетöй тшөтш тайö ичөт детинкаыслы няньсö, мед сёйыштас.

— Да менам аслам эм,— омöлика мода ылас петитчыштитiс Евлог. Збыльылас сылы зэв окота вöли видлыны ыя еджыд няньсö, кодос сэтшөм чөскыдпырыс сёйисны веждiнса школь-никъяс.

Валентина Михайловна видзөддiс сы ыылö, но нинöм эз шу, сөмын водзö мавтiс и мавтiс ыйөн нянь. Эштөдiс, Евлог нюжөд-лис нин кисö, но учительница мыччис няньсö мөдлы. Бара босьтiс ыль шөрөм да сiдзи жö тэрмасьтөг ыялис, пуртсö öтарө-мөдарө новлөддөмөн. Оз, буракө, и көсйы сетны Евлоглы. То, бара веждiнсалы сетiс. Аддзö, тшук, мый Евлоглөн киас көвдум, да сийөн оз сет. И Евлог гусьöникөн көвдума кисö дзебис мыш са-яс, сулалö, быттö сылөн нинöм абу, быттö вунөдөма батыс босьтны сёянтö, куш нопсö лунтыр вөр кузя кыскалөма. То тай, мудеритөмнад жö-а! Валентина Михайловна эштөдiс мавтчы-ны да нюжөдiс ыя няньсö Евлоглы.

Босьтiс детинка кыза, жалиттөг вундөм шөрөмсö, курччис, и збыль, няныыс зэв чөскыд, ыйыс неуна солакодь да торйөн нин ёна кажитчис.

— Дмитрий Гуриевич!— чукөстiс Светлана Петровна.— Тась-титö вайöй да тшөтш нуръясыштöй.

— Ме ог нин кө-а, тi öд то мындаөнөсь да,— öвтыштчис Митрей.

— Локтöй, локтöй! Миян танi зэв на уна, сiдз жö кольö. Огö жö öд койыштöй добрасö.

То öд батыс кутшөм! Сылы чөскыд шыд вөзийоны, а мыйлакө петитчö. Ачыс төрыгтя көвдум няклялö-а.

— Но ладнö, сiдзкө,— Митрей петкөдiс керкаыс лемень тасьтi да мыччис Светлана Петровналы.

Мөдыс дарйөн тасьтi тырыс пуктiс чөскыд дука шыдсö.

— Лок, пиö, панясыштам.

Да, татшөм чөскыд шыдтö Евлог некорсö на эз сёйлы, весь-кыда сёлөмтö мавтыштö, паньыштан да. А яйыс дзик лытөм!

Кыс татшом яйсо корсьомаось? Мыйла сомын оти тасътысь батъискод панясьоны? Батъыс од ыджыд да ставсо отнас и шумкъяс, Евлог некымынысь сомын и удитас паньыштны.

— Эн тэрмась, пио, виньдан,— олодіс Митрей зіля панясьысь Евлогос.

Рушку дундымоньс детинка сёйис. Жаль, мый сесся унджыкыс эз тор. Мыйла сомын мортыдлон кынёмыд сэтшом дзёля? Мед эськё отчид асывнас сёйин да лунтыр пот. Чеччис джек вылысь да кокъяссё одва вештавы вермё.

— Но, сёйинныд-юинныд?— Светлана Петровна кытшовтіс синъяснас бипур гогор чукортчом челядьос.— Вайой зіля доз-муксё мыскалам и туйё ковмас мододчыны.

Евлог и вунодчыліс нин, мый колё бор лэччыны гортё. Кыдзкё быттё эз и окота вов татысь вөрзёдчынысё, сёлём вылас воис вөр керкадорса гажа раскыс детинкалы.

— Но, ставныд танось? Некод эз вош?— чуньнас быдон выло индаломон Валентина Михайловна лыддис челядьсё.— Тюрамой!

И бара, кыдзи и асывнас, Гурей Митрей бёрын лосьодчис Шурик, коймодон Евлог. Но регыд нин детинкаос кутісны орд-йодны гырысьджыкъясыд. Эз и казавлы Евлог, кыдзи лои мед-бөръяон. Да эз сомын медбөръяон, но кутіс пыр отарё кольччыны и кольччыны войтырсьыс. А найо абу кё и мудзёмаось-а, сомын пызйоны-муноны. И со нин сійо лэч туй кузя тапкё дзик отнасон, ыло колісны детинкаос. Суодіс турист чукорос сомын сэк, кор найо пуксялісны шойччыны.

— Устал малый,— жалитомон видзёдіс сы выло роч нылыс.

— Конечно, устал. Вот если бы он вместе с другими отдохнул в избушке, а не ходил к вышке с нами, то, может, и выдержал бы,— содтіс батъ.— Но, вётчан?— тайо Евлог дорё нин шыасис сійо.

— Вётча,— довкнитіс юрнас Евлог. И содтіс рочон:— Ничего, мы люди нагорные!

Сы гогор пукалысьяс прысьнитісны-серёктісны, а детинка чуймомон бергёдлыштіс юрсё. И мый найо татшом ёна сералёны? Мый сэтшомсё Евлог шуис? Но и мед гизьоны, налон сераліккості позяс шойччыштны. Съёкыда лэдчысис му выло. Кутшом лосьыд куйлыштны тадзи, кор киясыд и кокъясыд мудзёмысла тіралёны. Некодзи эз куж чайтны детинка, мый ёна мездас. Од гортас то лунтыръясон вермё котравны-ворсны, а тані мыйлакё одйё и эбостоммис.

— Но, шойччыштім, восьлалам жё водзё,— кыпёдчис кок вылас батъ.

Мунны нин колё? Сомын на пуксисны да! А чеччынысё съёкыд, абу колёма шойччынысё, ньёжйоникон кё водзё муніс, бурджык эськё вёлі. И бара медся бёрын кыссьё Евлог. Дерт, вошомысь сійо эз пов. Батъыслон лэч туйыс бура ордымалёма, да и уна мортыдлон таялом борад трёпаыс зэв лосьыда тодчё. Водзвылын некод нин оз тыдав ни оз кыв, саялісны син водзысь, мунысьыд пыр водзё мунё. Оні сомын не пуксьыны, дугдывтот восьлавны и восьлавны. А быд воськов шедё аминь съёкыда. Кокъясас быттё изъяс кортавлёма, одва кыпталёны, быд увторйё крукасьоны. То конъясис да ыло водзё тувгысис. Оні

эськѡ куйлыштны тадзи, мед эбѡсыс содыштас, шуѡны ѡд, топѡд-чан кѡ му бердас ѣна, муыслѡн выныс мортыслы вуджѡ. Но мыйлакѡ Евлог оз кыв эбѡс содѡмсѡ, мѡдарѡ на, кыпѡдчынысѡ ньѡти абу окота. А дыр куйлыны оз позь, колѡ чеччыны да водзѡ мунны. Ачыс ѡд вѡзйысис, некод сійѡс мырдѡн эз кыскы та ылнаас. Съѡкыда сувтис кокъяс вылас да водзѡ надзѡникѡн восьлалис детинка. Нинѡм, коркѡ воас. То горув лѣччѡдѡ, колѡкѡ, Асыввож дорад видзьяс вылѡ нин петѡ?

Но тайѡ, вѡлѡмкѡ, сѣн, сійѡс вуджѡм бѡрын трѡпаыс бара на чукыль-мукульясѡн котѡртѡ съѡд вѡр шѡрѡдыс. Мый тайѡ, код юрѡн али мый лѣч туйсѡ ыджыд батыс писькѡдлѡма, ѡтарѡ-мѡдарѡ шатлалѡмѡн? Час, Евлог быдмас да дзик веськыда ставсѡ нуѡдас, мед некытчѡ бокѡ оз кеж! Дзик нинѡмла чукльѡддынысѡ. Да и вѡр керкасѡ матѡджык вѡчас, Ыджыд ѣль дорас, кыр йылѡ, сѣн зѣв гажа вѡрыс. Мый вылѡ татшѡм кузь кытшовъясыс? Прѡста батыс горшасьѡ.

Съѡкыда шедѡны воськовъясыс, дзикѡдз чинис мунан ѡдыс детинкалѡн, ѡдва-ѡдва вешъялѡны мудзѡм кокъясыс. Но век жѡ кѡть надзѡникѡн, но матыстѡ гортланьыс. Со лѣччѡдѡ увлань. Тайѡ ю съѡртыс нин воѡ, али бара на джуджыд сѣн? Найѡс ѡд сы мында нин Евлог вуджис. Збыль тай абу вѡлѡма сѣн, збыль тай видз вылѡ петис детинка. Воис жѡ медбѡрын! Вермис вуджны тайѡ кузьсыс-кузь туйкостсѡ! Мед кѡть и ылѡдз кольчис гырысь челядьсьыд, кѡть и кувмѡныс мудзис, но век жѡ воис видзьяс ылѡдз. Вуджис перилѡа постъясѡд Асыввож да Войвож. Со и су потшѡс, код сайын тыдалѡ детинкалѡн чужан сиктыс — дѡна Демаыс. Джуджыд гѡра йылын налѡн керкаыс. Син водзын эськѡн, но он на тай лѣбышт, он на тринькъялг-тырйи котѡрт, ѡти здукѡн бѡрѡ коль кук йѡртѡ, дзикѡдз вын-эбѡсыс быри детинкалѡн, лусмунѡмаѡсь кокъясыс. Водзын некод оз тыдав, важѡн батыс да веждінсаясыд воѡмаѡсь сиктѡ, ѡнѡ шойчѡны, кѡнкѡ, майбыръяс. Надзѡникѡн-надзѡникѡн, ѡдва-ѡдва, кыссьѡмѡн кыссьѡ Евлог дзоридзѡн тырѡм кук йѡртѡ. Гѡрайывса потшѡс дорын то кодкѡ мыччысис. А, тайѡ мамыс виччысьѡ дзѡля писѡ. Со сійѡ аддзис нин Евлогѡс, петис дзирьяѡд да лѣчис шор дорѡдз.

Мамукѡй! Муса мамукѡй! Кодѡ нѡ сѣсся тѣ кындзи жалитыштас детинкасѡ? Ѳтнас сійѡ и радейтѡ Евлогѡс.

— Мудзин, дитяѡй мѣнам?— мам кутыштлѡ писѡ да мыччѡ сылы кисѡ. Евлог кутчысьѡ тайѡ вѡльнѡй съветас медся дѡна мортыслѡн киас, и кылѡ, кыдзи содыштѡ сылѡн эбѡсыс. Со, вѡлѡмкѡ, код дорѡ колѡ топѡдчыны, мед ѣнмыштан! Мамыскѡд ѡтлаын чуймымѡн кокныда кайѡ чой паныд гортас.

А ѡнѡ, кор тайѡ походсянныс кык во нин кольѡма, Гурей Митрей первѡйыс на катѡдис писѡ Чуркѡ сиасыны. Сѡдзкѡ, Евлог кѡть и ньѡжйѡникѡн, но быдмѡ.

— Талун кыкѡн сиасям, да ружье босьтла,— пищальсѡ да патронташсѡ матич вылысь лѣдзис бать.— Ѳтнам эськѡ некор ог босьтлы сиасигад да. Мешайтчѡ сѡмын, да и вунѡдны верман лѣч дорад. Евлогѡс съѡла шыднад номсѡддыны колѡ, мед оз кут ѡбижайтчыны.

Батыс окталѡ сисѡ, а пиыс пелысь ѡшлѡ. Сѣръя лѣчьястѡ сиавны, дерт, кокни и ѡдйѡджык, а муа лѣч дорад этша и гѡр-

былясьны ковмылас. Митрей зільö лэчсö вöчны кодзувкоткаръяс бокö. А гожöмбыднад тайö зіль войтырыс лэчсö дзоньнас тыртасны, оз весиг нинöм тöдчы. Батыс пидзöсьяс вылас лэдзчысьöмөн весалö лэч öтар боксö, Евлог — мöдарсö. Мыйла батыс пидзöс-чанясьö? Гачыс öд няйтчö, да и муыс улыöват, көтöдö пидзöсьяс-тö. Евлог тай нö куткыртчöмөн ноксьö. Ошкыд пакöститöма, чашъялöма кодзувкоткаръястö, ставнас пузувталас, оз видзöд, мый сэнi лэч лöсьöдöма, нинöм сийöс оз сувтöд. Михайлöөн жуглöминас выль лэч лöвö вöчны, а сэтчö бара содтöд кад мунö.

Сэнi и танi водзвылысь жбыркнитлöны сьöлаяс, некымынöс, кодъяс тыдаланвийö пуксисны, бать лыйис, мыйкö öд сейны ковмас вөр керкаас.

Недыр жежлö ая-пия пуксьылісны сейыштны, кынöмыд вись-талö пажын кадтö, сийö некор оз сорсьы. Тыртöммас да гуръявны кутас, шойччыштöй пö да нуръясьыштöй, а то кок вывсьыныд дзикöдз усянныд.

Лэчсянь лэчкö пыр водзö восьлалöны ая-пия. Зіля сиаласны öтиöс, и пыр жö батыс шавксö-мунö мöд дорö, тöкөтö оз көтöрт. Лэч туйяс кузьöсь, лэчкыс лыдтöм-щöттöм. Колö удитны сиасьöм помавны сентябрöдз. Öд сентябр первой лунö Евлог школаö мунö, сэки Митрей öтнасөн кольö. А öтикнад он ёна чепöсйы, кыкнад кык пöв öдйöджык делöыд мунö. Ая-пия кө вежонөн эштöдасны, то öтнаслы Митрейлы кык вежонтö бура тырмас лойсьыны.

Муныштасны, сиаласны, воськовтасны, сиаласны. Но и гаж-тöм жö тайö удж. Сэтшöма мудзан öти пöлөс ноксьыд. Евлоглы кажитчö нин, мый туйыслөн помыс некорсö оз и воы. И мыйла батыс татшöм кузь кытшовъяссö лöсьöдалöма? Горшла, тшук. Час, Евлог быдмас да дженьдöдас лэч туйяссö, дзик нинöм унасьыс.

Пемыдсянь пемыдöдз сиасисны Митрей да Евлог. Сёрöникөн нин воисны вөр керка дорö. Евлог кокниа лолыштiс: эштiс! Öнi сэсся вöлисти пöттöдзыс шойччасны. Но батыс бара на сылы удж аддзис:

— Лэччыв, пиö, ключ дорö да мичаа мыськав тасьтi-паньсö, а то шыръясыд танi миянтöг вöлюйтöмаöсь да быд дозйын то налөн сiт.

И збыль, гөгөр разалöма кутшöмкö сьöд шыдöс, а Евлог эз и гөгөрво первойсö, мый тайö татшöмыс. Босьтiс детинка тасьтi, паньяс, кружкаяс да ключ дорын көдзыд ванас мыськис дозмуксö. Батыс стеклö банкаөн гумлалöмөн сöвтiс пöртйö да чайникö ва, ключыс öд ляпкыдик, изъясөн дорöма гөгöрыс.

— Сэсся пуксьы, пиö, картопель весалышт да сьöла кушты. Ковмас öд пусьыны, танi миянöс мамыд оз виччысь.

Детинка ывлаын джек вылö пуксьöмөн надзöникөн весалiс картопель, вуттöм паськыд чуманö гөнсö чöвталöмөн куштiс сьö-лаяссö. Бать лэдзис матич бердсьыс тубралöм вольпась көлуйсö, плавгис найöс тöлöдыштны ывлаö сёр вылö, ломтiс пач, öшöдiс би весьтö пöрт да чайник. Керкаыс тыри синтö сейысь тшынөн, кодi валъялöмөн ылькйис-петiс ывла вылö осьса юрйыв öшиньöд да öдзöсöд. Сьöд керкаыд сьöд керка и эм, трубатöм öд пачыс.

— Сёям талун, пиö, «Суп-пюре гороховый с мясом», — лыддис

батыс нопсыс перйӧм брикет вылыс.— Сійӧ зэв ӧдйӧ пусьӧ. Сьӧласӧ талун лӧсьӧдам да аски асывнас пуыштам.

Керкаыс шоныштӧ, тшыныс кайис вывлань, лажынтьчӧмӧн позис нин пытшкас ноксыны. Бать ноксис пач дорын, а Евлог видзӧдӧс пачын мичаа ворсыс би кывъяс вылӧ. Кос пескыс ӧдйӧ и сотчис, колины сӧмын ӧгыралыс гырыс шомъяс, насянь ылькйис чужӧмтӧ сотыс шоньд, Евлоглы лои жар, ковмис пӧрчыны пупайкасӧ да картузсӧ.

Дзузган биӧн нин, кодӧ муртса-муртса сӧмын югдӧдӧс керка пытшсӧ, няньӧн панялӧсны пӧсь шыд, юисны пакулаӧн заваритӧм чай.

— Но, водам жӧ, пиӧ, шойччыштам, аски бара сиасыны. Час, медводз шыръяслы нальк сиала, войбыд ӧд танӧ кышӧдчӧны, овтӧм керкаад унаӧн чукӧртчӧмаӧсь. Сэсся вольсасям.

Состӧм ӧти пупайкасӧ вольсалӧс Евлоглы нар пыдӧладорас, мӧдсӧ аслыс ортсыас.

— А юр улас нӧ мый пуктыны?

— На,— мыччис батыс пиыслы шӧри поткӧдӧм чуркаыс пес.— Картузтӧ ещӧ сюйышт, мед небыдджык лоас дай. Водзтӧ нар вылас йӧра воль на вӧлӧ вольсыштла, но сійӧс дзоньнас шыръяс сӧйӧмаӧсь да ковмис сотны. Ва гачтӧ вай ӧшӧдам матич бердас, войнас косьмас. Дӧрӧмтӧ эн и пӧрччы.

Евлог вольсалӧс содтӧд ассыс пупайкасӧ, мед небыдджык лоӧ, нюжӧдчис нар вылӧ, шебрасьны эз ковмы, керкаыс жар. Да-а! Абу ёна небыд батыслӧн узыланӧныс! И мыйла оз лӧсьӧд прамӧйджык вольпась кӧлуй? Ладнӧ, шуам, Евлог сиасигас сӧмын танӧ узяс некымын войтӧ, а аслыс ӧд батыслы кузь арбыд чорыд пӧвъяс вылад клӧнӧдчыны ковмас. Недыр мыш вылад куйлыштан, кватитчан да, лыясыд доймӧны нин, колӧ бергӧдчыны бок вылад, тӧкӧтьӧ кад кольӧм мысти бара лоӧ вежны узянноттӧ. И тадзи войбыд. Кутшӧм нин танӧ шойччӧм! Он, тшук, и унмовсылы.

Войнас керкаыс кӧдзалӧс. Евлог кыскис увсыс новлан пупайкасӧ, шебрасис сьӧн да бара унмовсис.

Узьӧ, мыйкӧ вӧталӧ, но кылӧ, кызди лыпомъясыс чорыд пӧвъяс вылад доймӧны мӧдӧсны. Бергӧдчис мӧдар бок вылас.

— Но, чеччы, пиӧ, он жӧ тай узь-а,— кылӧс батыслӧн сӧрнийс.

Кыз оз узь?! Ещӧ кызди на узьӧ! Евлог эськӧ дыр на стынитӧс, эз кӧ пальӧд батыс. Колӧ батыслы татшӧм водзсӧ чеччыны! Ачыс оз узь, и Евлоглы тшӧтш оз сет!

Керкаын гажаа шлочкӧдчигтырйи ломтысӧ пач, йирк бердын еджыд кымӧрӧн гӧвкъялӧ тшын. Бать гӧрбыльтчыштӧмӧн пукалӧ пач водзын, видзӧдӧ гажаа йӧктыс би кывъяс вылӧ. Пач вом весьтын ӧшалӧны пӧрт да чайник. Дзузгансӧ ломзьӧдӧма да керка пытшкӧсыс неуна югзыштӧма.

— Чеччы да лӧччыв ключ дорад, мыссышт. Сьӧдасин ӧд дзикӧдз.

Надзӧникӧн, нускигтырйи, Евлог кыпӧдчис узянӧнсыс.

— Пасьтась, пиӧ. То гачыд, сапӧгыд да нямӧдыд, лӧсьыда косьмӧмаӧсь. Ме пач ломтӧм водзвылын лӧдзи тув вывсыс, мед тшыныс оз сьӧдӧд.

Гачыс косъмөма төрытъя көтасълөм бөрын чорыдөдз, оз кус-
нясь весиг. Ывлаын көдзыд, йирмөг босьтө шоныдінсьыд петөм
бөрад. Пемыд на, велавтөм синъясыдлы нинөм оз тыдав, сөмын
енэжын кодзувъясыс дзирдалөны пемыд пуяс костөдыс. Тіль-
сьыштис Евлог и чуймис, кызкө быттё та бөрын пыр жө юг-
зыштисны синъясыс. То төдчыны кутисны пуясыс, керка бокыс,
ключ дорө нуөдысь туйыс. Видзчысьөмөн, мед лысваыс оз көтөд
гачсө, лэччис горулас, койыштис көдзыд васө чужөм вылас, нир-
тыштис да чышкысис картузнас. Унзілыс кытчөкө вошис, Евлог
котөрөн кайис керка дорө.

— Войнас эг вермы узынсьө, муртса кешлө сөмын и ой-
быртлі, петала ыркөдчыштны да бара. Кык шыр шеді налькйө.
Клопкөмсө кыла, сідзкө, шедіс, шойсө шыбита ывлаө да выльысь
сиала. Кык варышөс лыйи. Локтөны татчө да кос пуяс йылас
пуксьөны. Мушкаыс оз тыдав пемыднад да ствол кузяыс метиті.
Өні югыднас нин пуяс увсьыс аддзи, веськавсьөма жө,— висьта-
ліс батъ.

Евлог жө некутшөм шыяс эз кывлы. Сідзкө, бура на узыөма,
көть чайтис, мый эз и унмовсьы-а. И мыйла батыс варышъяссө
луйлө? Мед олөны да керка дорсьыс шыръяссө куталөны, сы
понда, тшук, и волөны татчө, ачыс со налькйөн кыйө жө найөс-а.

— Кушты, пиө, варышъяссө,— мыччис батъ Евлоглы паськыд
гөн чуман. Сійө гөнсө тані чукөртө ичөтик мешөкө, мед бөрыннас
лэччөдны Демаө. Мыйлакө татчө юрлөстө оз лөсьөд, пес вылын
лоө узылыны. Кажитчө сылы али мый?

Евлоглөн куштысигкості батълөн том сьөлаясыд пусисны, сійө
кисьтис тасьтйө шыдсө. Керкаыс пыр жө тырис чөскыд сьөла
шыд дукөн.

— Куим сьөла пуи. Өні сөям өти сьөла, өтикөс босьтам па-
жын вылө, и рыт кешлас ужнайтны кольө өти. Красуйтчы, пиө,
пока пөткаыд эм!

Мыйла батыс тадзи сёрнитө? Быттё кытчөкө сьөлаясыс
вошасны! Найө өд өдйө тай рөдмөны, өти гозйыс кө дас—дас
кык колькйөн вайө. Эз куж чайтны Евлог, мый батыслөн
кывъясыс збыльмасны. Регыдөн вөрад пөткаыд и быри, зэв
этшаник, сөмын мода вылас, кольыштис.

— Варышъяссө нө кытчө?

— А, шыбит эстчө гуранас дай. Мед шыръяс красуйтчөны,
асьныс өд уна шырөс жө сөйлісны.

Пуксисны нар вылө орччөн ая-пия, водзаныс паськыд джек —
пызан, код вылын руалө да ныртө гильөдө чөскыд дукөн пөсь
шыд. Пөттөдзыс сөйисны, вильөдісны сьөлатө. Небыд яйыс том
сьөлаыдлөн. Юисны сакарөн юммөдөмөн пакулаа да сэтөр коръ-
яса чөскыд тшай. Эз кө ков бара лунтыр сиасьны, збыль, вөр
керкаад овнытө абу лөк.

— Но, слабөг, кынөмпөт шеді,— кыпөдчис батъ нар вы-
лысь.— Час, пөсь ванас сукар көтөдышта.

Тасьтйө пуктис сукаръяс, кисьтис сэтчө чайникысь пөсь ва,
видзыштис недыр, сы бөрын васө рудзөдіс, а көтасьөм сукаръяс-
сө пукталіс джек вылө. А сійө джексө кыпөдіс содтөд вөсньыд-
джык джек вылө:

— Мед шыръяс оз вермыны кайны. Тадзи оласны лунтыр,

тѡлыштасны да рытнас дзик небыд нянь кодѡсь лоѡны. Буретш миянлы ужнайтны.

Сюсь батыс! Сукар катѡдѡ вѡрад, сійѡс нопъяд нунытѡ кокныдджык няньсьыд, и тшамъяад пуктас да оз тшык.

— Час, первой лѡсьѡдчам, мед нинѡм оз вун. Си босьтѡ, ружье да патронташ босьтѡ, чер тасма костѡ сюйи, пелысь чуман да шѡрт тѡ босьтан. Сѡян босьтѡм. Ставыс, сѡдзкѡ, лои. Но, мѡдѡм жѡ, пиѡ.

И бара водз асывсянь, муртса сѡмын сиыс лѡчъясад тѡдчѡ, мѡдѡсны ая-пия лунтыр кежлѡ вѡрѡ лысва кѡвтны. Абу тай дыш батыслы этадзи лойсьынысѡ! Кѡдзыд, кийд кынмѡ, енѡжсянь лѡччѡ посни бус кодѡ зѡр. Лѡчкыд батыслѡн помтѡм-дор-тѡм. Кузь лунтыр ѡти и сійѡ жѡ нок, сѡтшѡма та вылѡ дѡзмылан. Лѡч ѡтар бокас сунис йылѡ кѡрталѡмѡн ѡшѡдны пелысь роз, мѡдарас. Ва сунисыд оз кывзысь, чунь бердад ѡшйѡ. Бать окталѡ сияссѡ, ки пѡвнад оз вевъяв, война вылын доймылѡм шуйга кыс ѡмѡля отсалѡ, дыр лѡ ноксьынысѡ лѡч дорад. Евлог мукѡд-дырйиыс ѡдйѡджык эштѡдѡ пелысьсѡ ѡшлыны, но виччысьлыны лѡ батысѡ, кодѡ лѡч мѡдар бокас ноксьѡ. Сѡръя лѡчяс дорад позьѡ кѡтъ ѡтмѡдарас сувтны да сѡки ая-пия оз мешайтчыны ѡта-мѡдыслы, а му лѡчъясад некыдзи, быть лѡ виччысьлыны Евлоглы, та вѡсна весиг тшѡкыда бѡрѡ кольлывлѡ да ковмылѡ котѡрѡн суѡдны батысѡ, кодѡ водзѡ мѡд лѡч дорѡ нин шавк-сьѡдѡма.

Вежон сиасьѡм бѡрын эськѡ и эштѡ тайѡ маньливѡй уджыд, воисны медбѡрын гортас ая-пия. Мудзѡмаѡсь, но зѡв кыпыд сьѡлѡмаѡсь кыкнанныс, ѡд сѡтшѡм ыджыд удж лои помалѡма.

— Локтѡй, локтѡй, трудникъяс,— нюмъялѡ налы кильчѡ вылын Прокѡ Пекла.— Ёна мудзинныд, кѡнкѡ?

— Неуна эмышт,— кыдзи и век, ньѡти нюмъявтѡг, зумыша вочавидзѡ Гурей Митрей.

— Менам дзѡля пиукыс, батыслѡн отсасъысьыс, тшѡтш мездис!— кутыштлѡ Евлогѡс мамыс.

— А кыдзи нѡ? Ѳтнамлы кѡ, мѡд вежон на тырмис эськѡ сиасъыны,— бать ружьесѡ да нопсѡ мыччѡ мамыс, пуксьѡ кильчѡ пос вылѡ да пѡрччѡ сапѡгъяссѡ, бура пыркѡдѡ сапѡгъяс пытшсьыс да нямѡдъяссьыс ѡшйѡм вѡрса лыс-ѡгсѡ. Батыс моз жѡ пѡрччысьѡ да пыркѡдчѡ Евлог. Сійѡ быттѡ тшѡтш жѡ нин пѡрнѡй мужик, нарѡсьнѡ оз видзѡдлы весиг Катя вылѡ, кодѡ петѡс жѡ налы паныд, быттѡ оз и казаяв.

— Но, гортын ставыс бур?— юасѡ бать мысигмозыс нин.

— Абу ёна бур,— ышловзьѡ мамыс.— Турун примитан комиссиян мунѡсны да миянлысь Пожѡг туй боксьыд кыкнан зорѡдсѡ колхозѡ гижѡмаѡсь. Кирѡ Вась пѡ петкѡдлѡма.

— Но-о,— содтѡд на зумышмис, быдсѡн пемдыштѡс Митрейлѡн чужѡмыс. Сійѡ пуксис пызан дорѡ, думыштчис. Чунь рѡчнас кокныдыка таркѡдыштѡс пызан пѡвийѡ, тайѡ петкѡдлѡс сьѡлѡмыс-лысь чорыда майшасьѡмсѡ.

— Бара на, сѡдзкѡ, сьѡкыда Сюрुकлы тѡлыс коляс. Мый сѡсся, тайѡ Кирѡ Васьсѡ вины али мый?

— Эн нин лѡкѡссьы, асьсѡ коркѡ морѡн лыяс.

— Сійѡ ѡд кор на лоас... А сѡтчѡдз мыйтта на лѡксѡ бур

йöзыслы ваяс. Дыр-ö, бара-й, тайö комунистьясыс йöз вылас сьмекайтчынысö кутасны-а? Ме инвалид, Евлог дзик на кага, кыкөн то кыскö бокиысь гусясьöмөн моз турунтö чукöртам-чукöртам, и на тэныд, мырддясны дай. Но, вай ужнайтыштам.

Мамыс налөн локтигкежлö пöжалöма моркова пирöг, а сийöс Евлог зэв ёна радейтö. Дерт, удитöма нин асывсяньыд кöдзавны, но детинка сэтшöм любöпырысь нямляліс-сёйис юмов пирöгтö!

— А тöрыт кино вайлісны,— ошйысьыштис воқыслы Катя.

— Кутшöм кино?!— здуқысьөн нюжаліс Евлоглөн чужöмыс.

— «Чапаев»,— быттö нöшкөн юрас вартіс чойыс Евлоглы.

Детинкалөн забеднöйсла учины киясыс, вот тайö да! Öти лун öд сöмын эз удитны воны, öти лун! Тöрыт на и петкöдлöм-öсь «Чапаевтö». Ставныс видзöдöм-аöсь тайö киносö, а Евлог вöрын көнкö гызмасис, эз удайтчы сылы аддзысьыны повтöм комдив Чапаевкöд, сылөн востер ординарец Петькакöд да пулемётчица Анкакöд. Дерт, «Рöднöй сёрнисьыд» лыддыліс Чапаев йывсьыд дженьыдик гижöд, но сийö öд абу на Гражданскöй войнаса геройсö ас синмөн аддзылöм. Бара на Гриша да Тарас ошйысьны кутасны, висьтавлыны, кыдзи белöйяссö Чапаевыс гындіс. Ёна жö шудтöм морт Евлог! И нинöм он вöч, он, небось, тшöкты Кино Васьыдлы, мед мöдысь вайлас Демаö тайö киносö. Но, гашкö, коркö удайтчас жö видзöдны «Чапаевöс».

Аски сентябр öтикöд лун. Евлог мунас школаö, первой классö, сылөн заводитчас дзик мöд олöм. Со и помасис челядьдырыд!



Лача*

ПОЭМА

2

«Муса Веня, видза олан,
Гижа тэныд гоз-мөд кыв.
Бөрти ачым бытысь вола,
Шондодас кор ывлавыв.

Митö сьöкыда, но олам,
Кыдзкö-мыйкö кольö лун.
Бөрдла, но эг усь на лолөн,
Ог на йöзö корны мун.

Отсалöны рöдным-вужным,
Отсалöны шань, бур йöз.
Вермим төвсö кыдзкö вуджны,
Эз на кынты миянös.

Миян вöсна тэ эн шогсьы,
Сьöлөмтö эн дзикöдз ви.
Вотлім ягсер Помös боксьыс,
Эмышт картупельыд и.

Кыдзкö олам, керка шоныд,
Век на эмышт воддза пес.
Зэв на-й буретш гортын лоны,
Медтö тэнад мынас вез.

Ме öд төда: абу мыжа,
Нинöм лёксö тэ эн вöч.
Няньөн катіс тэнад пыжыд,
Йөрö төрича эн көдз.

Пемыд йөзлы югыд нуин,
Медым вежөр төдіс юр.
Лэптін овны кыпыд руөн
Да век вылын кутны юр.

Төждөн-уджөн мунліс воыс,
Гижин-пессин лунысь-лун.
Йöзыс сыланкывъя лоис,
Озджык вина-сурö сун.

* Заводитчöмыс 2012 вося 1 номерын.

Жалитоны найо тэнө:
Шань по вөлі Тима пи.
Кодкө коро лэдзны Енмөс,
Кодкө эскө: югдас би.

Бурө эскөмыс и кутө
Уджсө төдысьясельс лов.
Ставон вөдитоны мутө,
Вермысь скөттөгыд оз ов.

Отсалоны вөрыс-ваыс,
Сөмын туй да ордым төд.
Мед кө абу сәні маыс,
Сійон кынөмыд оз пөт.

Ачым тшөтш жө бурас эска,
Татөг эськө важон кын.
Талун лолөйлы кө дзескыд,
Аски лоас олан вын.

Югыд кадыс синъяс водзын,
Кор на томось вөлім ми.
Тэкөд дөзмывлім ми шоча,
Өйис сьөлөманым би.

Ёна жө и сьөлөм куліс,
Кор салдатын видзис кад.
Сәки тулыс эз вөв тулыс,
Көть и дзоридзаліс сад.

Петіс нюмөй сәки вөлись,
Синъяс водзын лоин кор.
Гажа вөлі миян көлысь,
Шудыс вөлі пом ни дор.

Ёна жө и кыпыд лолон
Сәки олім тэкөд ми.
Дөзмывлөмыс көть и лоліс,
Сійө шуднымөс эз ви.

Вывті ёна уджсө төдін,
Коркө шойччылін ли эн.
Бөрти гөгөрвоны мөді:
Ковмас миритчыны мен.

Эн өд асьтө флаг моз лэпты,
Лэптін йөзлысь сям да лов.
Эн кө быттө ачыл лэб тэ,
Эз и мукөд бордйон ов.

Өні олан гажыс лөнис,
Йөзлөн сьөлөмъясын — дой.

Йиджөм вира кыа вөнъыс,
Волө лун, но быттьö вой.

Абу вөлөсьт вылын сьылан,
Быттьö гөгөр личкис ун.
Сьодас йöзыс олö-вылö,
Медтö сöмын колис лун.

Гашкö, көнкö да и гажа,
Көнi гажа — ме ог тöд.
Эз нин некод волы важөн,
Оз и усьлы югыд вöт.

Олөм весьтын сардмөм шалльөн
Дорсянь помөдз енэж от.
Кылыштö на көнкö чалльөг,
Гашкö, сьөлөм дзик оз пот.

Эска ме, мый бөр тэ воан,
Збыльыс вермас, лöжыс — оз.
Бөр ми шудаöсь зэв лоам
Долыдалысь юсьяс моз.

Төждөн-уджөн водзö олам,
Челядь бордъясясны мед.
Чайта, кыпалам на лолөн,
Йөрö петшöрыс оз пет.

Ыджыд керка вöчөм эштас,
Сэтчö, майбыр, төрам ми.
Ёна жö и гажа места —
Помöс бокса пожөм дi!

Мед и волывласны карысь,
И Москваысь тшöтш жö мед.
Миян тулысысь көть арысь
Аддзас мичлунсö поэт.

Вөрö-ваö найöс нулан,
Вöчлан кодарынкö би,
Дозмөр шыд ли юква пулан,
Дзикöдз шоналанныд тi.

Водзö лоö йöзлы сьылан,
Водзö лоö шоныд кыв.
Дзик быд вөлөсьт бурсö кылас,
Сыктивдiн и Эжва йыв.

Сöмын висьöмлы эн сетчы,
Сэнi төрасьысь оз сюр.
Олан думөн быд лун чеччы,
Быттьö ставыс тэнад бур.

Быттьö гортись эз и нуны,
Вылыс Човсö он и тöд,
Лёктор вöчысьöн эз шуны,
И дзик ставыс тайö — вöт.

Эскы, мый сьöд шогсьыс мынан,
Дзескыдiныс дыр оз кут.
Кыптöм лолöн, содöм вынöн
Тэнö сывъялас на шуд.

Гашкö, шуан, челядь сёрни,
Да оз сюр тай мöдыс мен.
Ачыл тöдан: мыйöн норман,
Ньöти сьöкыдсö он вен.

Тэнсьыд гөлöстö ме кыла,
Кöть и абу талань тшын.
Век тэ орччöн, кöть и ылын,
Тайö сетö меным вын.

Кокни дзоляника ловлы,
Мый эм миян шоныд поз,
Челядьным оз тшыгйöн овны,
Ворсöны жö челядь моз.

Авъя гөгөрвоё ставсö
Да оз юась, колö-й-оз.
Пыртö гортö пессö-й-васö,
Ставсö вöчö ыджыд моз.

Муза уджтö зэв жö тöдö,
Дасысь висьталöм оз ков.
Сійö миян визув öда,
Сійö миян бордъя лов.

Вокан — муса кага миян —
Тöрасянтор на и эм.
Дзик öд тэ кодь баннас сійö,
Мед жö тöдлас шуда нэм.

Бöрдны чойясыс оз лэдзны,
Сійöс ворсöдöны пыр.
Мыйкö велöдöны тэчны,
Налöн гөлös керка тыр.

Тайö-й шонтö менсьым лолös,
Эськö вöлі — эн кöть ов.
Меным ставсö венны колö,
Кут и тэ бур биön лов.

Ыджыд ниа пуыл ловъя,
Бушков паджліс, да эз чег.

Эска ме: и Чисталёвъяс
Сы моз сулаласны век.

Гижи тэныд бура уна,
Кытчөдз асылыс эз кый.
Бумаг вылад сьокыд шуны,
Сьолөм пытшкын вөчсьө мый.

Йөзсянь чолөм содтөд пукта,
Натөг эськө сё пөв лёк.
Көть он кор, а отсөг чуктө,
Миян шог — и налөн шог.

Мыйён шондөдыштас — вола,
Кольла кодлыкө да горт.
Эн жө, эн жө усь тэ лолөн,
Менам дона, муса морт.

Кызкө-мыйкө пальөд шогтө,
Эска: воссяс дзескыдін.
Аддзысьлытөдз. Виччысь. Локта.
Тэнад Ара. Помөсдін».

Водзё лоё на.



Колян वोся ноябр төлысьын петіс Ю.Васютовлөн «Салдат Васюта» повесьтлөн бөрзя юкөн. А неважён редакцияө пыраліс Юрий Васютовлөн Михаил пиыс, коді и дасьтыліс гижөдсө черновикъясьыс печатьө да висьталіс, гортысь пө сюрисны йөзөдтөм юкөньяс, торйөн куйлөмаөсь. Редакция чайтө кола-наөн йөзөдны найөс.

Юрий ВАСЮТОВ

Салдат Васюта*

КАЗЬТЫЛАНА ПОВЕСЬТ

Салдат — генерал

Салдатад служитігөн быд дивөыс тай овлө. Сөмын мортлөн мывкыдлуныс — сійө өд раблөн мывкыдлун: гөгөрвоан, а вөчан, позьө көть оз. Быд чиллян-көлеса, дерт, аслас чөрс вылын бергалө, но морт сійөн и морт: ачыс абу аслас, кыдзи, шуам, ош либө көин.

Во служитөм мысти позянлун ветлыны гортө вөзйылісны и меным. Но сэки ставсө торкис Кырнышев. Штабын ышнясьома, көр вылын пө муна Княжпогостсянь аслам Удораө. А финчастьө, көн писараліс, вайис самолётөн лэбан билетъяс. Найө ёна донаджыкөсь көрт туйөд ветлөм серти, и та вөсна дугдісны сетавны отпуск, абу кө гортөдз көрт туй. Инта—Воркутаө — көть кыкысь, а Удораө — виччысь, кор көрт туй нюжөдасны.

Но өтчыд полк водзын йөзөдісны приказ лэдзны менө дас лун кежлө гортө. Приказыд абу чикыш — садөкө он йөрт. Но туй меным вештасны сөмын Княжпогостөдз. Сэтысянь пө көръяснад он кө во, шыөдчы сэтчөс военкоматө, отсаласны.

Частьысь вөтлөмөн вөтлісны, а зептын «шыр чуалө, төв шуть-лялө». Төда өд: кыті вөсни, сэті и орө, тыртөм кальтаөн оз позь туйө петны. Мыйкө өд козинтор колө бать-мамлы нуны. Төрыг на сө шайт вөлі, да книгаяс ньөбалі. Мыйтакө коли, да карса рынокө котөртлі. Медся ыджыд да мича яблөксө бөрийи, вит яблөк лоис козин вылө. Нопйын кос паёк, и ставыс. Абу тшыг — и бур.

Сэтшөма гаж бырис ай-мамысь, ёртъясысь, гортса вөр-ваысь. Нывъяс йылысь юрын жувъялөны омөль мөвпъяс. Ныв, кодөс, кыдзи ачым чайті, ме радейті, районса өти юралысьсянь кага вайөма. Ёртъяслөн татшөм юөрлы эз эскыссьы, но мый эм, эм нин. Войтөгыс и луныс абу, а кулөмаыслы век көть горзы: «Мед олас!»

Пукала өтнам плацкарта купеын, мөвпала тадзи. А пуксис

* Содтөд. Заводитчөмыс 2011 वोся 7, 8, 9, 10, 11 номеръясын.

водзвылам — полковник. Киас кутё розя-розя ичотик шахмат пёв, фигураяссё розьясас быттьё тувъялёма, мед оз гылавны туй вылын зёркөдчөмысь.

— Салдат, он ворс? Некодкөд ворсны. Германиясянь локта... Йоймы көть тайё кузь туяс,— шыасис полковник.

— Омёлика зэв,— виччысьтөг вөзйыси быттьё. Дум вылын ефрейтор Капуста, коді ставлы вермис мат пуктыны, көть школаын нель классё эз велөдчыв. А тані со полковник. Погонъяс вылас синтё чөвтлөмысь повзян.

— Ме өд абу жё мастер,— полковникыд лышкыд.— Ворсам. Нинём он ворссы. Кадсё көть коллялам.

Ме аслым эг эскы, кор полковниклөн корольыс йөрмис сыа-меа фигураяс костё. Менам весиг вомкаличё личалис, а полковникыс ачыс аслыс шуис: «Мат». Эг гөгөрво, кыдзи шудыс мелань бергөдчис мөдысь дай коймөдысь... Шахматөн киас олө и узьё кө, гашкө, ачыс сетчис полковникыс, медем ме эг дөзмы, но быд партия помын сійө чеччыліс, гораа шензис, мый тадзи артмис. Медбөрын ворссыём полковник нуөдіс менө аслас купеё, көн сійөс виччысисны томиник на гөтырыс да батыс кодь жө өдва төдчысь ныра да ыджыд сьод синма ар дас квайта мичаник нылыс.

— Танюша, голуба! Ме тиян дорё вайөді чемпионөс!— гораа да гажаа төдмөдіс семьясё мекөд полковник.

Найө номсөдісны менө чөскыд сёян-юанён да коньякөн, гораа сералисны, мый стратегия-тактика төдысь полковник сетчөма салдатлы.

— Ме — салдат жө,— оз лөгась полковник.— А тайё салдатыс,— кыдзи менө нимтөны, сійө сідз эз и убөлит юавны,— вермас на генералён лоны. Сійө кужө нуөдны рекогносцировка, водзвыв артыштны, кыдзи вермыны. А ме ог... ог көсйы ме лоны генералён. Пом...

Сідзкө, оз быд салдат көсйы лоны генералён. Но мыйла генералён эз көсйы лоны тайё полковникыс, ачыс эз висьтав. Но ворсны шахматөн мекөд сэсса эз жө көсйыв. Семьянас и шахматнас лэччис Таллинё.

На пыдди купеё пырис матрос. Ме весиг зэлөдчылі. Флотын служитысьяс вылө менам Ригаын артмис аслыспөлөс видзөдлас. Кок ув му вылын служитысьяс серти найө быдлаын зілісны петкөдлыны асьнысё быдса юр вылө джуджыдджыкөн, мый йылысь көть эз мун сёрниис. А вылө пуксысьяссё ме ичөтсянь эг радейт.

Но тайё матросыс, вөлөмкө, дзик мөд пөлөс. Пыр жө висьтасис, ме пё Попов Володя, служита Таллинын корабль вылын радистён, а муна отпускө гортө, Вөлөгда карө.

Радист радисткөд ми өдйө аддзим өтув сёрни. Зэлалөмыс менам регыд и личалис. Лёкала, вөлөм, матрос форма вылас, а морт вылас лёкавын, тыдовтчис, нинёмла.

— А ме волі өтчыд Ригаад,— шызис матрос.— Кывлін, речной порт водзвылас, ратушадор берегас, речной трамвай бергөдчис?

Кывлі, мися. Ленинградысь челядь вөлөмаось, унаён вөйөмаось.

— Ме сэні жө вөлі...

— Кыдзи нө мездмин?

— Ме жö ю вылын быдми... Он куж вартчыны — вöян. Но öдвa-öдвa жö... Збыль кö нин енмыс эм-а. Та вöсна со и отпуск сетисны кадысь водз.

И висьталіс старшöй матрос Володя Попов со татшöмтор. Эскы кöть эн сэсся. Даугава кузя теплоход вылын экскурсия дырйи Ригалöн Ратуша вылö дзоргöмөн туристъяс тöдлытöг чукöрмасны ставөн öти борт дорас. Та вöсна теплоходыс потельтчас*, а капитаныс казялас тайöс да рупор пыр горöдчас, мед йöзыс вешгяс шöрлань. Туристъяс аддзасны жö, мый палубаыс кок уланыс вежынтчис, да ставөн öтвылысь зырöдасны мöдар бортланыс. Воддза доровтчöмсьыс вор кодь пыдöсa теплоходыд йöзыскöд тшöтш быгыльтчас мöдар борт вылас. Зумыд му вылö тувччыны велалöм туристъяс повзясны да ызнитасны важинас. Теплоходыд и песовтчас да гумовтас ставнысö ва пиö. А карсянныс ю дорöсыс сэнi — из берд. Сöмын мöдлапöлас ваыс лажмыдджык да лыа бöжыс сызö мезд.

Теплоходыс сунгыяс-вöйö, а ва веркöсыс быттö пузö пессьысь да бруткысь йöзсьыс. Гөгöр жуö-ойзö бультыкасьысь. Вакöд венын быдөн кöсйö ассьыс ловсö дорйыны, кутчысьö кытчö судзас. Öта-мöдöс дзескöдöмөн да тойлöмөн тадзи вöйтöны кода-кодöс. Мездысьöмлы сорласьысь йöз чукöрсыйс матрос кöсьяс петны пыдлань сунöмөн, но ва пытшкас кодкö кутчысяс сылөн кокö. «Тадзинад ме ачым пöда»,— мөвпыштас матрос да мöд кокнас чужъялöмөн пондас йöткыны кутчысьысьöс. Но сйö быттö кöртөн йитчöма кокас. Сынöдсö лолыштöм бöрын нин казялас: сйöс «вöйтны кöсйö» оз вакуль, а — олöма ань. Нырвомыс вируля дой, но кабырыс пöчыдлөн клещи кодь.

Аслас мамыс дум вылö усьö, да жалитас. Водтöдас пöчтö вылысас да ен отсöгөн воөдчасны лыа бöжас. Ачыс ни пöчыс сувтны оз нин вермыны, и санитарнöй машина нуас больничаö. Аскинас матрослы висьталасны: пöчыд — адмираллөн мам.

«Таллинын нин, служба вылö воём бöрын, чукöстисны адмирал дорö. Чайтi, каюк меным,— висьтасьö ызьбöм матрос,— адмираллысь мамсö лои чужъялöма-дойдöма, пиньтöг öд кольöма. Ёна и повзи... Но адмиралыд, вöлөм, морт жö. Весиг гортас корис, чай юны пö. Пöчыд сэнi зарни пиньяса нин».

Но та бöрын майшасьöмыс том мортлөн сöмын содöма. «Гöтрасьны тшöктöны, ог тöд мый и вöчны»,— жугыльмöны синъясыс матрослөн. Вöлөмкö, адмирал дорö пырас геройөн, а петас жöникөн. Лöсьыд нюма мичаник зон вөрзёдас сьölöмсö адмираллөн нывлысь. Во гөгöр сайын нылыс кольöма мамтöг, да нормöм сьölöмыс виччысьöма муслун. Öдйö и гөрddзасьöма ставыс. Со и муна пö ай-мамлысь юасьны, найö менам — олöма нин войтыр. Ме — пож пыдöс, медся ичöтыс пö. Гырысь чойвок ас овмöсөн олöны нин.

Володя зэв шань морт вöлöма, но лышкыд. Кузь туйын вагон-ресторанö пыралім, да киöд кутіс, эн тэрмась пö, ме мынтыся. Тöда пö, тэныд, салдатлы, ресторан вылö сьöм оз сетны. И тадзи локтігчöж, Вöлөгдаөдз. Ленинградын на лунтыр шöйтiм, Эрми-

* Потельтчыны (диал.) — дзибыртчыны.

тажö пыралім, памятникъяс водзын снимайтчим, столöвöйö кежа-
лім пажнайтны, и пыр мынтысьö Володя. Менам пö эм, а тэныд
ковмылас на. Вöлöгдаын гортас на пыртöдліс: олышт пö кöть
öти лун. Но поездысь кольччыны эг лысьт.

Лоис эз старшöй матрос Володя Попов зятён адмираллы,
ме ог тöд, но сыкöд сёрниысь ме гөгөрвои, мый абу таын сылөн
шудыс. Чуньнас енэжланьыс индöмөн сійö некор оз тöдчöд:
менам гöтырöй — сылөн ныв. Уна во мысти сійö некодлы оз
пасйы: гöтырöй — наукайсса кандидат. Либö — доктор.

Шуда морткöд янсöдчим, и аслам шудöй быттö кытчöкö
ылалöма либö метöг вожа туйöд мöдöма. Княжпогостö поезд во-
ис рытнас. Войсö колявны ковмис вокзалас. Буретш лагеръ-
ясысь мездалöмаöсь пукалысьяссö Сталинлөн кулöм бöрын.
Лабич вылын моздöдчи*, вуграла син пöвнам, узя нисö ола.
Коркö ловгöннам кыла: морöс зептам кодкö пондiс пырны. Тшап
кинам — морт ки вöлöма. Песовтi, кыз велöдлісны, дзурттöдзыс,
милиция сöмын торйöдны вермис.

Зептысь видлалi — документъяс ставыс ордам. Гөгөрбок ви-
дзöдлі, а сумкаöй абу нин. Регыд и сійöс аддзисны, абу на рек-
тöмаöсь, весиг яблökъясыс дзоньвидза, а узыны та бöрын корис-
ны милициялөн дежуркаын. Асывнас мунi военкоматö, а сэнi
ыстысьöны, МВД пö сетö тэныд туй вылö ыджыд сьöм, а военно-
матлөн самолёт вылö артасьöм эз на вöв. Кыз кужан, сiдз и
мун пö. Кöть подөн.

Бара подөн кайны Косланöдз? Кытчöдз нö сэки нюжалас
отпускöй? Аттьö шуда матрослы: зептын кольöмась рубъяс. Пыр
жö сетi гортö телеграмма, мед ыстасны сьöм телеграф пыр. Ас-
кинас нин вöлі гортын. Армияöдз на тöда вöлі ай-мамысь торйөн
олöмсö, но гортö пыри, да кылöй оз шед, горшöй гөррдзасьö.
Сiдз и сывъялі батъöс да мамöс, шы лэдзтöг.

Кык лун эг петавлы гортысь. Мый абусö сöра-висьтала аслам
служба йылысь: кызди кыям «вöрса вокъясöс» латвияса вөръяс-
ысь, кызди дзоньөн колям, кор веськавлам «биа шер» улö...
Эскöны оз ай-мам, но лöня кывзöны, а мамукöй сöмын малалö
юрöд: «Кристосöй-енмöй, видз пиукöс, видз...» Сэсся быттö
мыйкö казтыліс да содтыліс: «Сталин-енмыс эз ло, да и Ленин-
енсö вунöдöма...»

А лун-мöд мысти менам быттö вунісны ай-мамöй, кодъяс
дорö кык во чöж кыскыси, сьöлöм топавмөн гаж бырис да.
Ёртъяс, а медсясö нывъяс, эз лэдзны меным, том мортлы, гортын
пукавны. Кöть эг кöсйи ме косланса нывъяскöд и кыв вежны
ни паныдасьны, но том вирыд ворсö сönъясад, и сэки тэ —
ачыд абу аслад.

Ывла вылö менö кыскис Геня. Армияысь воём бöрын сійö
овмöдчöма Косланö, но оланін абутöм вöсна патеруйтiс ми ордын
кызд батльөн чужан сиктысь бур тöдса. Петтöдзыс, гаж могысь,
пукалыштiм, а кор спирт сора чай бöрын юрным шоммыштiс,
кывным разьсис жö.

— Тэнад эм ныв? — петiм да, юалi Генялысь.

— Эг на аддзы коланасö, — шуö синсö читкыртöмөн.

* Моздöдчыны (диал.) — пуксьыны лöсьыда.

— А көсьян бөрйытөг?

— Кыдзи?

— Паныдасясны ки-киö кутчысьöм кык ныв — öтиыс менам, мöдыс тэнад.

— А томöсь кө?— армияын сизим во коллалöмсö Геня чайтис тöдчанаөн.

— Пöрысьыс узьö нин,— быд здукö ме збойджык лоа.

Збыльвылассö том и олöма йöз, кок йылысь кө оз на пöрны, рытнас петöны пальöдчыны, лöсьйöм плакаысь тэчöм поски кузя сикт öти помсянь мöд помöдз, öтарö-мöдарö шöйтöны. Кодъяскö боджгöны* сьылгтыр, а петас кө гудöкасьысь, чукöртчасны шор дорö да бура дыр йöктасны.

Паныд, быттö сёрнитчöм серти, кык ныв локтöны, тöдсаяс нин, көть и абу кослансаяс. Риммаыс — Сёлыбысь, Тамараыс — Разыбысь, кыкнанныс клубын сьылöны-йöктылöны, а тöдмасьлі накöд армияöдз на.

— Мы с Тamarой ходим парой,— шмонитыштi да чолöмаси нывъяскöд.

— Рочмöмыд тай дзикöдз, Юрий...— ас нимсьым сьölöмöй быттö горшöдзöй чеччис. Быд ног нин нимтылісны менö, а та-дзи некод на эз шулы. Ичöтдырсянь ставөн менö Юрикөн шуисны, а Римма шуö: «Юрий». Кывнас и крукаліс менö нылыс, а ми крукалім кыкнаннысö киясөн да рытывбыд кужим колана кывъяс корсьны öта-мöдлы. Геня, вöлөм, тöдса жö нин налы, да ми гозйөн-гозйөн нуöдiм нывъясöс гортö, көні, тöдiм, виччысис тыра пызан.

— Тайö — менам,— виччысьтөг шусис батъ-мам водзын Римма вылö индöмөн.

— А тайö — менам,— аддзысис жö Геня.

Мамуклөн синъясыс чашкавлісны. Некор на ме нылöс эг вайöдлы гортö. А тайöс öтпырысьөн гөтырпу пыдди петкöдла.

Нывъяс, вöлөм, шогмана сьылöны. Да и Генялөн сьылан горыс лöсялö накöд. А батъ и мам менам, румкаасясны кө, век горöд-ласны важ сьыланкывъяс. Гажа и рыт артмис. Но отпускалагөн тайö вöлі медбөръя гортса öтувъя гажа рыт. Ме пондi вошласьны гортысь да волі сöмын асывлань матöджык.

Локта öтчыд тадзи асья рöмыдын поски кузя гортö, көдзыд нин, да йöжгыльтчöмөн, октябр öд кыссис помланьыс. Пос вывтi вуджи шор, сөнiка ва весьтас ыркыд сетысь ру öшйö. Гортöй абу и ылын тасянь, муна, шебрас йылысь мөвпала. Друг кучкис юрö: шорас мыйкö эз важ ног вöv. Бергöдчи да бөр матöдчи. Сiдзи и эм! Тайö абу кыз кер пом, кыдзи чайтi поскöд вуджиг. Шор вомөн морт куйлö! Юрыс öти берегас, кокъясыс — мöдас. Берег пöлөнъясыс йизьöмаöсь нин, но мортыс шоныд на, пуль-сыс тiпкис.

Зэлöдчылi да кыски кос вылö, песыштi ки-коксö. Пондiс ымзыны. Сiдзкö, ваыс абу пырöма вомас. Чужöмыс — няйт ту-пыль. Вомсьыс лөк зын-дукөн öвтö-пöдтö. Шлина код мортыс. Тыдалö, пос вывсяньыс усьöма. «Кодi тэ?»— юала. Мыйкö эськö көсьйö шуны, но кывйыс оз кывзысь. Синъясыс ветлöдлöны улö-вылö. Лөкөн-сорөн кыдзкö лэптi пельпом вылам. Но и сiт

* Боджгыны (диал.) — восьлавны надзён, бавъявны.

ноп, штангаён кё эг мырсыыв, та съөктасё эськё вөрзёдны эг вермы.

А вот кытчö ме сійöс нуа? Вой—асыв костас став сиктыс узё, сöмын гортын виччысьöны. Но пельпом вылын öшалысь «мешöк» пондiс броткыны: «Амбра... амбра...» И тöдi шыалöмсьыс — тайö жö Абрамов! ОРС-лөн тшöкыда юысь-кодалысь конюк. Олö гöтырыскöд конюшнябердса вежöсторйын, пи эм и ныв, меысь томджык. Гöтырыс коми, и челядьыс комиён сёрнитöны, а ачыс абу и велавлöма, рочён воöма, сэтшöм и кольöма. Налань мунны — бара на колö шор вуджны. А вои да ог тöд, кыдзи и вуджны. Тöдi: пос пыдди пöвтор вöли вомöныс, а öнi абу. И берегыс паськыдджык да джуджыдджык. Ковмис кевны, рективны «сит мешöксö», кыдзи ачим нин кути шуавны ноксьыс мудзöмла, да бара сöвтны мыш вылам. А сійö быттö абу ловъя, сöмын «амбра» да «амбра» кылас öшйöма.

Öдзöсö йиркöдчöм вылö мыччысис Катя, ыджыд нывныс. Пыртöд, мися, гортад, гöсьтöс вайöдi. Пыр и тöдiс Катя, мыйся гöсьт мекöд воис. Кыв ни джын эз шу, отсалiс лэдзны джоджö.

Гортö вои жö коркö, кокöй рудз, юрам мудз, костюмöй рыт-нас виль вöли, öнi — няйт, серыс вежсьöма. Мамукöй повзис: «Тышкасин али мый, пиукöй?!» Кинас сöмын бокъясас шлопöдö да юрнас öтарö-мöдарö довкиöдлö. Висьталi, кыдзи йизыны кутöма мортыс, да пыр и вежсис чужöм вылас: «Кулис öд эськö... кулис кö... ныла-пияныс на ичötöсь и...»

Но тайö кöдзыд вой бöрас ывла вылас друг шондöдiс, пондiс пызйыны-зэрны — пом абу. Сэсся ру лэдзис, мöдлапöлыс оз тыдав. А сэнi аэропорт. И менам отпуск помассис, мунны колö. Лун дай, мöд дай руалö, самолёт оз лэбав. Бара и военкоматö ковмис мунны. Военком шуö: гиж пö телеграмма частяд, мед оз шогсьыны, а ми пö печать пуктам, стöчмöдам. Ме и гижи, кыдз военком велöдiс: «Задерживаюсь отпуском ввиду непогоды. Рядовой Васютов».

Дас лун пыдди гортын олi кызь лун. Быд лун военкоматын пасйисны, мый омöль поводдя вöсна ме ог вермы мунны. Подöнтö ог нин лэччы көрт туйöдз. Кыкысь нин лои тальöма Шожым туйсö, да полöмыс чöжсьöма пактавтöдз.

Кор частьö вои, пыри ветлан-мунан кабалаяс сетны. Каблукъясөн ме тшилк-тшолк — сiдзтö и тадзтö, радöвöй сэтшöмтö воис отпускысь. Подполковник сувтiс, дыркодь видзöдiс ме вылö, мурталiс синнас неыджыд тушаа салдатöс, вом джыннас нюмдыштiс да кывъяссö нюжйöдлöмөн быттö юалiс: «Значит, задержался... генерал Васюта?» Пызан сайын пукалысь капитан, лейтенант да кык ефрейтор гидз-гидз серöктiсны, но оз лысьтны гораджыка да кинаныс тупкисны вомнысö, виччысьöны, кор подполковник аслас баснас серöктас. А подполковник виччысьö на здуксö. Никак нет, мися, рядовой. Сэсся гөгөрвои: эз öд сiдз-тадз генералён нимтыны. Дзикöдз кынми сулаланинам. Эг на вöвлы «губаын», татысянь и нуасны сэтчö, көть и ог на тöд, мыйысь.

— Запомни, Васюта: задерживаются генералы. А мы с тобой только о-паз-ды-ва-ем!— пельсянь кок улöдз быттö электрической ток зөркөдiс-лэччис.— Ну, цел-невредим приехал?

— Так точно, товарищ подполковник.

— Это хорошо... в наше время. Ну иди... служи дальше... генерал... гы-гы-гы-ы!— серөктіс аслас басөн подполковник, а сы бөрын и капитан лейтенанткөд, да и кык ефрейтор вомнысө жергөдісны. А ме — кру-гом, коклябөрөн тшолк!— и котөрөн өдзөсө.

А ротаын нин төдөны: «генерал» воөма. Ефрейторъяс, штабса крыса-шыръяс, удитөмаөсь юөртны татшөм кыпыд выльторсө. Старшина Сергей Иванович оз серав: «Көть нин ефрейтор чин сетісны первой, а өд өтпырысьөн — генерал. Тадзитө быд салдат дас пыдди кызь лун пондас отпускавны».

Лунъяс мысти менам нимлун вөлі. Валяровский вайис телеграмма: «Чолөмала нимлунөн, сиа лоны генералөн. Римма». Быттьө ваө видзөдөма. А олөм мунө водзө. Медыджыд дивөыс өд — олөм. Медся повзьөдчанаыс — олөм жө. Луныс — кадыслөн син, войыс — пель. Мый аддзан, мый кылан — ставыс тэнад. Но олөмыс сэки олөм, кор тэ кодыкө колан.

Саласпилс

Быд морт — виысь. Гутөс, да виас. А ми, коми йөз, кыйсьысь-вөралысьяс, кок вылө сувтөмсянь вины-кыйны пондам: пышкайөс гумла-рыныщдор баддысь, кальсыөс ыбсайса козъя вөрысь вөв бөжысь гартөм лэчкө. Сэсся лым улө дзебсьөм байдөг велалам кыйны, арын — сьөла вылө асланым дженъыдик чөс туй нин сиалөма. Пищаль өшйис пельпом вылө дас арөссянь. Ставсө тшөктө вөчны тшыг кынөм. И вины — кынөмпөт перйөм могысь.

Локтім медводдзаысь лыйсянінө, Рига карсянь верст кызь сайө, да кылам чуймөдантор: тані пө война дырьи вөлөма концлагерь. И гөгөрвоны позьтөмтор: тані пө торъя пачьясын сотөмаөсь комын сюрс мортөс. Унджыкыс пө еврейяс, чиганъяс, рочьяс, латышъяс, пленө сюрөм салдатъяс. И на пөвстө көнкө веськаліс, дерт жө, коми морт. И кытчө сійө «юөртөг вошис», өні некоді оз төд.

Саласпилс — тадзи шусис тайө лыйсяніныс, көн «ловйөн» кольөм өти баракын, вөвлөм конюшняын, овлім ми төвсья да гожсья лагеръясын воюйтны велөдчигөн. Оланін вөлі дзескыд, ми кыдзи бөчкаын солалөм чери олім. Тані медводдзаысь сувтім часөвөйөн видзны ва юкмөс. Тані миян роталөн вөлі медводдза воштөм: боксянь лыйөмөн кодкө виис миянлысь часөвөйөс, мый вөсна пост вылө быд сувтіг ми ёнакодь полім.

Сулалам өтчыд ми Котковкөд оцеплениеын, дөзьөрिताм тирсайса туйсө, мед лыйсигөн сэті эз ветлөддыны. Друг кок улын мыйкө чушкыны пондіс. Видзөда: вутш улысь змей петө, менам сой кызта пөшти. Таөдз ме некор чукля вөньяссө ловйөн эг адзыв, да кыдзи тай горөдча лёк горөн! Котков — зит-зят затворөн, мелань котөртө. Аддзис змейтө да өтчыд сутшкөмөн и бытшкис штыкнас, кыдзи плац вылын велөддісны.

— Тайө абу змей, а уж,— шуис Котков.— Но чужөмыд кельдөма, да лои вины... Талөн ядыс абу, шыръясөс сөйө. Миян Леткаын сюрлөны жө,— менө раммөдөмөн төдчөдіс.

Дерт, абу мойдса Горыныч, абу и куим юра. Но ме водзын, көть и штык йылын, вөлі змей: вожа кыла, веглясьө нидзув

моз, сямодысь чорыджык кыша, кӧн чери сьомыс пырис-петіс ӧта-мӧд вылас да дзарӧн повзбӧдчана ворсіс гажа шонді водзын. Быть пов, кор весиг казътылӧмсьыс пӧсявлан. Но регыд ме тӧдмалі «змей» дорысь ёна повзбӧданаджыктор.

Миянысь унджык тӧдысь «дедъяс» петкӧдлісны кык гу, кытчӧ фашистъяс «дзёбмаӧсь» концлагерса пачьясын сотӧм йӧзлысь коляссӧ. Орчӧн кодйылӧм гуясыс метр кык пасьта да куим-нӧль кузъта. Гуяс весътас чуркйыс эз нин вӧв, кольӧм вӧсньы-дик му эшкынас кодкӧ унаысь пырӧдчылӧма. Траншея кодъ ыджыд гуясыс ӧні вӧліны гурана-гуранаӧсь, и быд кодйӧминын сьӧдӧдісны са-пӧим сера ёкмывляс. Ӧткымын салдат, коді матӧд-чыліс татчӧ, карабин штыкнас гудйысис са пытшкас. Некод эз ошйысьлы зарни пинь перйӧмӧн, но тасма пряжкас туплясисны гуяс гӧгӧрын.

Ме ылісянь гӧгӧртлі тайӧ гуяссӧ. Ӧтиас куйлӧ дас вит сюрс и мӧдас — дас вит сюрс мортӧн. Ме полі: друг кӧ найӧ ставӧн лолыштасны, сэки ӧд пӧимыс, саыс пошиктас-резсяс тайӧ сӧстӧм пожӧм яг пасьтаыс да ставыс сьӧдасяс. А ягыс и збыль абу миян яг кодъ, сійӧс быттьӧ весалӧма-нюлӧма, весиг киссьӧм коляссӧ кодкӧ чукӧртӧма, и кок улын чаль ни палич оз сорась. Пожӧмъясыс сулалӧны ӧта-мӧдсьыс торйӧн, мед пашкыр йывъяс-ныс вермисны паськавны да лалавны дзескӧдчытӧг, и ни ӧти пуыс лӧсас он аддзы. Тані збыль казялан: абу сӧмын вужйӧн пуыс ловъя.

А гуясыс сідз и олісны восьсаӧсь, кундысь ни дӧзбӧритысь эз вӧв. И гуын куйлысьяслӧн пӧимыс кыдзи Клааслӧн пӧим со-тӧ сьӧлӧмъяссӧ талуңъя йӧзлысь.

Беддъыд — кык пома

Унджык салдатыс куритчис. А куритчыны сетісны сӧмын махорка. Гаровтан чигарка газетысь, кыскыштан пӧсь да курыд тшынсӧ — горштӧ сотлас, сювъяс кузъыд кынӧмӧдзыд волас. Тшӧкъялӧны салдатъяс, кызӧктыласны, но шпуткӧны-куритӧны. А кытчӧ воштысян: сетӧмсьыс унджык он босът. Пинь весалан порошок ньӧбны сӧмын и тырмӧ салдатлы сылӧн службаысь государствоӧн мынтысьомыс.

Но и тайӧ ном сіт мында удждонсьыс кык-коймӧд юкӧнсӧ салдатлысь «мырддӧны». Войнабӧрся кад. Жуглӧм-киссьӧм странаӧс ловзбӧдӧм могысь быд во йӧзӧс гижсьӧдӧны заём вылӧ. Тадзи государствоыс удждысьӧ аслас гражданагысь, мед найӧ жӧ вермисны овмӧдчыны бурджыка. Оз вунӧдны и салдат йылысь. А мый: кӧма-паськӧма, абу тшыг, табак сетӧны — мыйла сылы содтӧд сьӧм?

Госзаём, дерт, ас кӧсйӧмӧн босътантор. Но ӧд ми ставӧн война кадся быдтасъяс. Комиын асланым радейтана Ленинад Сталина государством сиктса йӧзӧс сідзи лысьтіс-нӧняліс быд-сяма заём-поставканас, мый некутшӧм мӧслӧн, непӧштӧ кӧзалӧн, эз тырмы йӧлыс-выйыс, лыыс-яйыс, куыс-гӧныс да и сюрыс-гыжйыс, мед тырмымӧн мынтысьны. Сизим йылӧма «ловъя дӧва-ясӧс» вӧв пыдди додъявлісны гӧриг-агсасиг и эз на вунӧдлыны сы йылысь, мый татшӧм «ловъя дӧваясыс» оз тырмыны «трудо-

воспитательной лагерьясын». А гөгөрвотом йылөмсө детдомъясө да ФЗО-ясө өкталісны, страналы колана да сяма гражданаөн велөдісны лоны. Мөд ногөн кө, ми и вөлім тайө войнабөрся сямa граждананас.

Шуоны кө, мый удждонлысь кык-коймөд юкөнсө колө сетны страналы — сетам. Гижсьөдөны кө заёмө — гижсям. Ас көсьөмөн кө — и ас көсьөмөн. А коді сэн көсьө: ачым-ө, начальник-ө, Сталин батъ-ө — миянлы нө мый. Кодкө мед сөмын көсьө-а. И дас шайттө салдат вермас тырмөдны төлысь кешлө. Сійө өд төдө, кызди гортас мунысь салдат черысь шыд коркө пуөма. А служитігөн салдат пөт, пусыны оз ков, сідзкө...

И со тайө «сідзкө» вежөртассө мыйлакө эз гөгөрво радөвөй Ковальчук. Миянысь, комсомолецъясысь, сямаджык вөлөма, көть ми и шуим сэки: «йөй улө лэдзчысис». «Либө — либө», — шуис сійө. Зэв кө тиянлы колө, гижөй пө госзаём вылад ставсө, мый меным вештанныд: комын шайтөн кө төлысь, сідзкө куимсө квайтымын шайт вылө. «Тадзи оз позь, — паньд сувтөны командиръяс. — Дзик денегатөг салдат — абу жө салдат. Коймөд пайсө да колө кольны аслыс... ас көсьөм серти». А ме пө ас көсьөмөн и көсья, чорыда сулалө ас кыв вылас Ковальчук. Он кө гижөдөй став вылас, көсья пө, мед меным мынтісны көпейкатөг ставсө, мыйта шуөма министрөн. Либө сідз, либө тадз.

Асныралысьөс венны командиръяслы эз отсавны ни партия, ни комсомол котыръяс, сы вөсна мый Иван Ковальчук эз вөв налөн артыасын, а кылыс и збыль вөлөма өтчид шуана. Та бөрын связь ротын сійө лои салдатъяс да ефрейторъяс серти куим пөв озырджык мортөн. Медводз тайөс гөгөрвоисны сылөн «землякъяс». Сэсса и мукөдъяс карө петавны дасьтысиг чукөртчылісны сы гөгөр.

— Удждыв көть өти шайт... — бара нин дзайгө ефрейтор Капуста. Сылөн шойччан лун. Увольнение серти позьө карө петавны. А Ковальчуклөн дженъид сёрни: «Абу». Капуста дась кисө нюжөдны корысь моз: — Ваня, ми өд өти сиктысь тэкөд, гашкө, рөдвуж на... Тэ Иван и ме Иван...

— Абу, — өти кыв Ковальчуклөн.

Бөрынджык төдмалім: Ковальчук оз горшась, нывлы козин вылө, кампет-печенньө вылө сійө удждас көть кодлы. Но вина-табак вылө — оз. Кывлас кө, тэ көть куимысь земляк, кредит оз ло. Та понда-ө, мөдтор вөсна-ө, но өтчид ефрейтор Капуста салдатъяс водзын шуис:

— Ме дугді куритчыны.

— Кыдзи — дугдін? — ёртыасыс, дерт, оз гөгөрвоны.

— А сідз. Дөзми махоркасыс, тшыныс оз пыр горшөд. Шыбиті, и ставыс.

— А винасө — юан?

— Юны ме эг на и босытчыв. Менам дидуля горилкатө оз радейт и меным оз тшөкты. А табак крадөт пятак, для меня — вредный враг.

Выльөн на старшина сеталіс быдөнлы виччысына кык восьмина махорка, вежонся норма. Найөс и пуктіс ефрейтор Капуста курилка пельөсын сулалысь неыджыд пызан вылө да кыпыда содтіс:

— Куритöй на здорöвье!

Связистьясöс быттьö доналöм көртөн дзужалісны: сэн и тан — быд пельöсын Капусталөн «подвиг» йылысь сёрнитöны.

А ме дугдi жö нин махорка нёнявны, дöзми юмов-курыд тшынсö нюшкыны. Старшина отсаліс: сакар пö пондан босьтны содтöд, он кө куритчы. А сакартö асыв и рыт столöвöйын сетлісны сöмын рöчөн-джинйөн, кружка чайтö эз и юмовтлы. Со и шуи ме аслым: бурджык юмов чай курыд табак тшын дорысь.

Ефрейтор Капусталөн водзмöстчöмыс бур көйдыс моз кутіс рöдмыны. Öти бöрся мöд кутісны вежöрсявны: курилка пельöсын пызаныс регыд тырис махорка пачкаясөн. Сэсся и пызаныс вошис, а сы пыдди сувтіс фанера куд — махоркаыс сэнi лои лыдтöм.

Локтіс öтчыд гудöкөн ворсыштны Веня вок да шензьö: «Тіянö коммунизм воис? Ми тай век на олам важ лозунг улын — «Куритчöй, ёртъяс, махорка — бур! Махорка салдатлысь югдöдö юр!» А гашкö, и меным позьö осьмушка быдса зептавны?» Капуста ышöдіс: «Босьт көть куднас». А Веня ышмис да куднас и нуис аслас ротаö. Та бöрын «курилка» нимсö көть клуб вылö веж: сійö лоис сöмын сылан-ворсанінөн. Веня сэнi ворсіс Удора ног «русского», а Кырнышев «табъя кокнас» петкöдліс, кыз колö йöктыны, сямман кө, велöдчы пö.

Связистьяслөн и чайныс быд асыв пондіс лоны мукöдъяс серти кык пöv юмовджык. И быдөн тöдіс: юмолыд содтö вын.



Висьтъяс

Кырийв Ёньё

Уна гожом чөж пыр гажаа оліс кырийвса тайё важиник, но зумыд на керкаыс. Сійё сулаліс сиктысь неуна бокинджык. Көзяиныс, Кырийв Ёньё, гётрасьом бөрас нарошнө стрөитчис джуджыд нөрыс йылын, кытысянь ылөдз тыдалісны увтасын паськөдчөм муяс да видзьяс, найёс юкысь вөр діяс да веретяяс, лөзалысь Эжвалөн чукаялысь вөнныс да сы сайын чөв олысь пармаыс.

Кырийв Ёньё, латшкөсіник тушаа, паськыд пельпома, зумыд восьласа, муош кодь зіль, быд удж сяммыліс вөчны, быдтор артмыліс сы киын. Со и сиктын, ковмыліс кө кодлыкө тшупны керка-карта, пырджык корлісны Кырийв Ёньёос. Төдісны, мый аслыс моз жө зумыда вөчас. Збыльысь, керкаыс Кырийв Ёньё-лөн чача кодь вөлі. Вадорысь кайысьяс нарошнө сувтлывлісны сы весьтын и юкмөссьыс көдзыд ванас горшнысө веськөдігмоз нимкодьясьлісны гырысь өшиньяса, мичаа серөдөм балкона да джуджыд чардака керканас, коді быттё ошйысис аснас ветлысь-мунысьяслы: видзөдөй пө ме вылө, войтырөй, татшөм мича стрөй-басө өдвакө нин кыськө аддзыланныд.

Тулыс-гожомнас прөст кадсө Кырийв Ёньё коляявліс вадорын. Кор тувсовъя ытваыс азыма нылыштліс видзьяс да веретяяс, паськөдчыліс саридз моз, Кырийв Ёньё водз асывнас радейтіс нимкодьясьыштны кильчө вывсянныс тайё помтөм-дортөм отнас. Сэки сылы торйөн нин кокниа лолавсис. И воліс мөвп, мый өдвакө көнкө эм татшөм мича иныс. А рытнас мышнопсө лөсьөдөм бөрын Кырийв Ёньё тэрмасьліс вадорлань. Сэні сійё вөйтавліс гымгаяс, ветельяс, ботанъяс. Сэсса войсө колялігмоз вугыртіс кутшөмкө джуджыджык веретя вылө пестөм биपुर дорын. Асывланьыс кыйсян угоддьояссө видлалөм бөрын мөдөдчыліс ветки пыжнас сикт горувлань. Терем кодь керкаыс ылысянь тыдаліс. Сійёс аддзөм бөрын Кырийв Ёньөлөн кокыс быттё ачыс вайөдліс горт дорас. Сэтшөм окота вөлі өдйөджык адзөдчывны гөтырыскөд, челядыскөд, кодъяс вөсна Кырийв Ёньё пессис лун и вой. Сійё зілис бура велөдны ныв-пиянсө да кутіс лача, мый бөрыннас найё оз жө вунөдны бать-мамнысө, водзө вылө лоасны пөрысьмөм гозъялы зумыд мыджөдөн.

Вочасөн Кырийв Ёньөлөн да Дашөлөн быдтасьясыс верстям-мисны да разөдчисны гырысь каръясө. И нөрысйывса гажа керкаын гозъя колисны өтнаныс. Эз, некод налөн быдтасьяс пиысь сиктө эз кольччы. Көть эськө ставныс бать-мамыс моз жө ичөтдырсянныс вөчисны быдсикас уджсө, радейтісны матігө-гөрсә вөр-васө. Но пессысь вежөрныс, пөсь сьөлөмныс чуйдіс мунны кытчөкө бокө, көні дзулыкйөн пуис олом-выломыс, көні

эз вöв сиктын кодъ нэмöвöйся чöв-лөнныс да йöзыс саридз гы-
яс вылын дзибрасысь пыжъяс моз зілісны корсьны ассьыныс
шудсö.

Кырийыв Öнью эз дивит таысь челядсьö. Быдöнлөн öд аслас
олöм. Сійöс со гöтырыскöд сиктса олöмыс кыскис. Да и кыdzi
нö мöд ногыс? Уна велöдчыны некоднанныслы сьöкыд воясад
эз удайтчы. Сідзи сэсся и вужъясисны чужанінас. А öнiя том
войтыр кöсйöны унджык аддзывны, став мусö кытшовтны да
овмöдчыны сэтчö, кутшöм öзынö крукасяс налөн якöрыс. Гашкö,
таdzi и колö. И рытъяснас Кырийыв Öнью да Дашö лыддявлісны
ныв-пиянсянныс гежöда волысь письмöяссö, терпитны позытöма
виччысисны насянь звöнок. А кор воліс быдтасъяссянныс ку-
тшöмкö юөр, гозъялы сьölöм выланыс бара кыпыд лоліс. Кöзя-
инъяс вылас видзöдігмоз гажмыліс и нöрыс йылын сулалысь
керкаыс.

Кырийыв Öнью керкаын важ моз кыпыд вöлі гожöмнас. Сэки
öта-мöдныскöд вежласьöмөн воливлісны ныв-пияныс асланыс
челядьыскöд. И зумыштчöм гырысь öшиньяса керкаыс ловзыліс.
Öтияс сэки ноксисны öшинювса град йöрын, дöзьöритісны пук-
тасъяссö, мöдъяс ломтылісны пывсян, коймöдъяс лэччылісны
вадорö купайтчыштны да вуграсыштны, ветлісны вотчыны вөрö.
Кырийыв Öнью да Дашö кылісны сэки асьнысö медся шудаөн.
Налы чайтсис, мый важ моз томось да код тöдас на мыйдыра
оласны тайö керкаас.

Рытъяснас пывсьöм-мыссьöм бöрын ставөн пуксьылісны
ыджыд пызан сайö. Кырийыв Öньюлөн да Дашöлөн ныв-пияныс
сэки кузя висьтасьлісны ыджыд каръясын олöм-вылöм йивсьы-
ныс, петкöдлісны фотографияс, ошйысьлісны шедöдöм награда-
ясөн. Сёрниö корсьурö суйсьылісны ичöтджыкъяс. Пöль-пöчлы
торйөн нимкодъ вöлі найöс кывзыны. Коркö öд челядныс татшö-
мось жö вöліны. А öнi асланыс нин ныв-пиян эмось. Сідзкö,
абу весь овсьöма свет вылас Кырийыв Öньюлөн да Дашöлөн. Со
кутшöма паськалöны налөн вужъясыс. И водзö на содасны да
нимöдасны рöднысö.

Но сэсся кадыс вочасөн катовтчыліс аръявыв. Пыр этшаджык
лоліс госьтыс Кырийыв Öньюлөн гажа керкаын. Медбöрын мöдöд-
чылісны карлань и бөръя волысьясыс. Кырийыв Öнью да Дашö
синванысö чышкалігмоз кольöдлісны дона госьтъясöс автобусöдз
да ен могысьөн корисны тшöкыджыка воливлыны на дорö.
Шулісны, эз пö нин уна коль миянлы овнысö тайö свет вылас
да колö на эськö аддзысьлыны кувтöдз, мед вöлі кодлы синъяс-
нымöс тупкыны. А сэсся гөрбыльтчыштöм, дзор юрсиа Кырийыв
Öнью Дашöыскöд кутчысьöмөн ньöжйöник мöдöдчылісны сикт-
сайса нöрыс йылын сулалысь керкалань.

Кырийыв Öнью бөръя кадас кок висьöм вöснаыс эз нин лэч-
чывлы вадорö. Ветки пыжсö да чери кыян угодысьяссö донтöм
донысь вузаліс сиктсаяслы. А ачыс мича лунъясö радейтліс пу-
кавны кильчö вылас да важ моз нимкодьясьны увтасын шыльк-
нитчöм мича вөр-ванас. Кыdzi и водзті, рытыввывлань визувтіс
Эжва ю. Арся шондіыс койис таво кежлö бөръя мелі югөръяссö
кельдöдöм туруна видзяс вылö, идралöм муяс вылö, веретаяс
бокын сулалысь зарни кыдзяс да гөрда коръя пипуяс вылö.
Важ моз лöзалис мöдлапöвса пармаыс. Лунвывлань лэбигмоз

чужан муыскөд прöщайтчисны турияс да дзодзөгъяс. Регыд нин воас кöдзыд төв да вевттыс мусö еджыд эшкынөн.

Кымынысь тайö серпассö аддзыліс Кырыйв Öнью, но некор эз мудзлы нимкодъясны вөр-ванас, енэжтас сайысь муртса на мыччысьöм унзіль шондінас, лэбачьяслөн гажа сьылöмнас, рыття гөрд кыанас, войся енэжын дзирдалысь кодзувъяснас. Ачыс эз и тöдлы, кыдзи колисны мырсиг-пессигас олöм воясыс. А вөр-ваыс быттьö эз и пöрысьмышт. Öньюлы эз нин уна коль овны, но окота на вöлі помтöг бергавны тайö шонді улас. Но абу тай сетлöма Енмыс мортыдлы мöд олöмсö.

Öні Кырыйв Öнью корсюрö весиг майшасьліс: мыйла нö ас-лас быдтасьяс пиысь некодöс эз сяммы кольны гортас, эз сяммы помтöг велöдны радейтны татчöс мичлунсö? А гашкö, найö гырысь каръясад олігөн сэсса дзикöдз вунöдасны чужаніннысö? Бать-мам кулöм бöраныс оз нин кутны воливлыны гортаныс, көні коркö көмтöг котравлісны лысваа турун вывті, йöртлісны картаö сюрукöс, кузь рыттясö пукавлісны урокъяс сайын, төвся кадö гажаа сералöмөн исласьлісны джуджыд кыр йывсянь.

Тöвнас лымйыс тыртліс джуджыд нöрыс йылын сулалысь керка дінö туйсö. Весиг пошта новлöдлысь, томиник нывка, жаявліс Кырыйв Öнью керкалань восьлалігөн. А асьныс гозъя лым пиас вежоннас кыкысь кымын вöйласигмоз, öта-мöднысö кутышталігмоз, кыдзкö-мыйкö кевлісны сиктса лавкаö няньла да чай-сакарла. А сэсса гортаныс воөм бöрын дыр зыравлісны эбöстöммöм кокъяснысö. Войяснас налы эз узьсы, торйөн нин бушкала поводдя дырий. Шоныд вольпасын куйлігмоз казътывлісны коркöя олöмнысö да ышлолалісны. И коркö асъядорыс нин унмовсьлісны.

Сöмын шондіыслөн тулыслань бергöдчöм бöрын кыпыдджык лоліс гозъялы лов выланыс. Кырыйв Öнью тэрмасьмөн пасьтасьліс да ыджыд пу зырийөн весавліс нöбалöм лымсö кильчö дорысь, юкмöслань да пывсянлань нуöдысь векныыдик туйяс вылысь. И пыр кевмис Енлы, мед öдйöджык воас тулысыс да гожöмыс, мед бара гажа лоас сы керкаын.

Кырыйв Öньюлы и Дашöлы важөн нин эськö позис овмöдчыны карö, асланыс быдтасьяс дінас. Öтчыд гозъя и збыльысь мунлісны сиктсьыс. Но сöмын тöлысь вермисны овны бокин, первой öти, а сэсса мöд пи орданыс. Гозъяös кутіс кыскыны ас кинас лэптылöм керкаö. Эз во налы сьölöм вылас ыджыд карын шума олöмыс, тшын дука сынöдыс, пыр кытчöкö тэрмасьысь йöзыс. Сэкисянь гозъя гортаныс шуисны овны. Öд карас быд вой вöталісны ассыныс позсö. Кыдзи нö сійös поэбö эновтны? И öні Кырыйв Öнью горт дорас ноксигөн пыр ёнджыка и ёнджыка кутіс лача: а гашкö, збыльысь кодкö сылөн быдтасьяс пиысь бөр бергöдчас гортас?

Кузнеч шор

Ервасьдорсянь Гаждорö мунігөн ордымсö вомöнавлö неыджыд сёнті визувтысь Кузнеч шор. А сійös вуджöм бöрын тыдовтчöны Эжва бокса джуджыд нöрыс йылö пуксьöм Гаждор грездлөн керкаясыс. Мыйла шорсö шулöмаöсь Кузнеч нимөн, ог тöд.

Ичӧтдырйи Гаждорӧ ветлігӧн та йылысь эг юасылы. Но миян ӧд весышӧрӧ некор нинӧм оз нимтыны, век нин кутшӧмкӧ помка аддзасны. Тыдалӧ, шор бокас коркӧ кузнеча сулавӧма.

Гаждорын ичӧтдырйиним школаыс эз вӧв. И сэтчӧс нывкаяс да зонкаяс воывлісны Ивадорса начальнӧй школаӧ. Сійӧ сулаліс миян керкакӧд орччӧн, Ӧсе Ёгор ордын. Мекӧд ӧтлаын велӧдчысыс — Терень Ивӧ Витя да Тимӧ Пашӧ Тамара, а нӧшта классӧн ыджыдджык Мӧдест Витя да Ладе Капа гортсыыныс вӧрзылысны зэв водз, вуджлісны Кузнеч шор, восьлавлісны муяс вомӧн Ервасьдорлань нуӧдан ордымӧд ас костаныс ворсігмоз и коркӧ сэсся воӧдчылісны жӧ ыджыд керкаын меститчӧм кык жыръя школаӧ.

Сёрӧнджык нин Ивадорысь Паш Вась Шурик, Петрӧ Вань Коля, Мишӧ Петя Рая, Укол Педе Миша Люся гаждорсаяскӧд ӧтвылысь кутім ветлӧдлыны Пальса шӧр школаӧ. Ивадорсянь Пальса школаӧдз куйм километр. А гаждорсаяслы быдса витӧс коліс восьлавны. Дерт жӧ, челядьыд челядь и эм: школаӧ мунігӧн и ворслім-дурлім, и косьӧдз волім, и бӧр бурасьлім. Туйыд сэки вӧлі лыа да сёй сора, и арнас да тулыснас тырліс уна ва гуранӧн, а тӧвнас тӧладжык лунъясӧ дзикӧдз нӧбӧдліс. И ковмыліс ньылӧдтӧдз кевны толаясӧд. Коркӧ сэсся Пальса МТС-сянь ыджыд трактор кыскыліс ас бӧрсяыс «утюг», да туйыд бӧр шылявліс. А гаждорсаяс пиысь ӧткымынӧн сэки лыжиӧн ветлывлісны школаӧдзыс. Та вӧсна, тыдалӧ, и бура петкӧдісны асьнысӧ ордыисигъясӧн.

Бӧрасджык ме куті ёртасыны гаждорса Терень Ивӧ Витякӧд. Тайӧ зонмыс воліс сьӧлӧм вылам бурлуннас, кыпыдлуннас, шмонитны радейтӧмнас. Шойччан лунӧ ме асывсянныс кӧмасы-пасьтасы да мӧдӧдча ёрт ордам. Мамӧй пыр и шуас:

— Бара нин Терень Ивӧ Витя дорад мунан? Эн ылав сэтчӧ. Пемдытӧдзыс лок. А то кӧинъяс шӧрӧ веськалан.

Ме мыйкӧ нурбыльта вомгорулам да тэрмасьӧмӧн пета гортысь. Тӧвся луныд ӧд кӧч бӧж кузя. Зэв лӧсьыд восьлавны лымйӧн неуна нӧбӧдӧм ордымӧд Ервасьдор помсянь Гаждорӧ. Со чӧла вугралӧ Кузнеч шор, тырӧма лымйӧн. Шор визьӧгас ва будка сулалӧ. Некытӧн весиг кок туй оз тӧдчы. Кутшӧм нӧ кӧинъяс тані вермасны лоны? Кӧтӧрӧн кая сён кыр йылӧ. И со нин тыдовтчӧны Гаждорлӧн медводдза керкаясыс. А Витя ёртӧй, вӧлӧмкӧ, важӧн нин виччысьӧ менӧ. Бать-мамыс меліа жӧ нюмъялӧны керкааныс пыригам.

Ӧта-мӧдлы висьтасьӧмӧн тӧдлытӧг кольӧ кадыс. Ывла вылын рӧмдӧ, гыӧралӧм ӧшиньясыс пыр ёнджыка пемдӧны. Кытчӧ нӧ татшӧм ӧдйӧ удитіс пышйыны лунюгыдыс?

Ме заводита тэрмасыны гортӧ.

— Пукышт на, пукышт,— шуӧ Витя.— Удитан на гортад.

— Эн торк мортсӧ. Бать-мамыс майшасыны кутасны,— пыр жӧ велӧдӧ писӧ паччӧр вылын пукалысь, косіник чужӧма Терень Ивӧ.— Тӧда ме Сивер Иллятӧ и Настуктӧ. Сэсся мӧдысь миянӧ оз лэдзны зонсӧ.

— Гашкӧ, кольӧдыштны колӧ?— медбӧрын шыасьӧ ме дінӧ Витя.

— Оз, оз,— вочавидза ме.— Туйыс абу ёна кузь.

Биа керкаысь петӧм бӧрын ывлаыс кажитчӧ сап пемыдӧн.

Медбöрын синмыд велалö жö. Ньöжйöник лэчча сөнö. Неылын сьöдöдö ва будка. И друг чаетсьö меным, быттьö сы сайын кодкö сулалö. Морт али звер, кодi сэнi? Сюсьджыка видзöда. Некод, тыдалö, абу. Орччөн быдмысь бадь кустьясыс повзьöдчöны, буракö. И век жö сьölöм вылын абу ёна долыд. Збыль öд кодкö вермас уськöдчыны. Тэрыба восьлала водзö, корсюрö бöрлань видзöдывлiгмоз. И со Кузнеч шор кольö ылöджык и ылöджык. А неылын пöртмасьöны нин Ервасьдор грездлөн биясыс. Лов вылын пыр жö долыдджык лöö. Регыд гортö воа. Мам эськö дивитыштас жö, мыйла пемдытöдзыс сэнi олi. Но дзоньви-дзайн воа гортö да, оз сэсся ёна броткы.

Коркö сэсся воис и сийö рытыс, кор Терень Ивö Витяöс ми, сылөн ёртъясыс, колльöдiм армияö. Войбыд пукалiм да гажöдчим. Сетiм кыв не вунöдны ёрта-ёртнымöс.

Сы бöрын Терень Ивö Витякöд ме эг нин сэтшöм тшöкыда паныдасьлы. Мунi овны да уджавны карö. А сийö армиясьыс воём бöрас пондiс бать-мам керкаас овны. Найö сэки эз нин ловъяöсь вöвны. Пырис уджавны совхозö. Быдсяма уджсö ковмис мыркны. А бöръя кадас зiлис стрöйтчан бригадаын. Тöвнас пöрöдiс вөр, гожöмнас тшупсис. Дерт, сьöкыд удж вöснаыс корсюрö и курыдтортö видлалiс. Мый сэсся вöчан? Тадзи унаён аслыныс шуда здукъяс недыр кeжлö корсьlöны. А Пальса шөр школатö Терень Ивö Витя сiдз эз и помав. Сэки шуисны, оз пö сетчы сылы велöдчöмыс. А ме чайта да, зiльлуныс эзджык тырмы, öд сюсь зонмөн быдмис.

А сэсся Терень Ивö Витя гöтрасис. Но гöтырыс вöли ассъыс ыджыдджык да висьлöс. И кор меöдз воис шог юөр, мый Терень Ивö Витя гöтырыскöд сотчöма керкаас, некыдз эз кöсийссьы эскыны таö. Зэв шог вöли меным сэки, тадзи помасис коркöя бур ёртлөн олöмыс да. Öнöдз на казъывла Кузнеч шор вомөн Терень Ивö Витя ордö ветлöмъясöс. И кыдзкö аслысног шоныд лолö сэки сьölöм вылам.

Абу жö нин ловъя мекöд öти классын велöдчысь Петрö Вань Коля. Сыкöд ёна жö лöсявлi. Школаын велöдчигөн тшöкыда ветлывлi сы ордö. Радейтiм шахматөн ворсны. Öкмысöд класс помалöм бöрын ми Колякöд шуим пырны велöдчыны Ухтаса горно-нефтянöй техникумö. Ме, кöть и бура сдайтi экзаменъяссьö, весиг мукöдлы отсалi пырны, техникумад эг веськав. Шуисны, миянлы пö слаб синма бурöвикъясыд оз ковны. А мыйла та йылысь водзджык эз висьтавны, ог тöд. Но Коля, кöть и пырис велöдчыны, эз жö помав техникумсö. Тыдалö, стипендияысь öтдор сылы сэсся отсöгыс некытысь эз чукты да. Гортсаясыс тшыгöма олiгад эз вермыны ёна отсавны, и Коля бөр бергöдчис Ивадорö. Куим нылöс Галина гöтырыскöд быдтiсны.

Карысь шойччан лунъясö гортö волiгөн пыр паныдасьлывлi Колякöд Эжва дорын, öтлаын вуграсим. Сэки и унатор йылысь сёрнитлiм, казъыглiм важсö... Но сиктса сьöкыд уджыд тай виö морттö. Вöрын уджалiгөн Коля доймöма, да сьölöмыс сувтöма.

Кымынөн менам сиктса ёртъяс пиысь абу нин ловъяöсь! Корсюрö Ракадорса шойна вылын гуяссö кытшовтiгөн весиг синвайö доршасьлö. Овны да вывны эськö тайö войтырыслы, тшöтш и менам ичöтджык воклы, Володялы. А со тай доймалöмъяс, висьöмъяс да неминучаяс вöсна ковмис кадысь водз мунны

модар югыдас. Мыйла нӧ мукӧдыслы шуӧма водза-водз кувны? Некод та выӧ оз сет меным вочакывсӧ, весиг и важысянь тӧдса, тулыснас помтӧг збоялысь, а гожӧмнас дзикӧдз раммылысь Кузнеч шорӧй. Шорыслы абу шуӧма морт моз кувны. И мед жӧ водзӧ олас да чӧла визувтас — коркӧясӧ казътылігмоз.

Кӧні тэ, чужан грездӧй?

Карсянь лэччысь асъя автобус ньӧжйӧник сувтіс Катыд грезд шӧрӧ. Чеччысьыс эз вӧв уна. Василий Петрович некодӧс на пиысь эз тӧд. Да и сійӧс ӧдвакӧ кодкӧ тӧдіс. Ас грездас ӧд челядырсяныыс эз воы. Сылӧн тшӧтшъяысыс важӧн нин лойсны дедъясӧн да бабъясӧн. Унаӧн удитісны водны грездсайса шойна выӧ. Василий Петрович сӧмын довкнитіс юрнас лавка кильчӧ вылын сулалысь мужичӧйяслы да нывбабаяслы, а сэсся ньӧжйӧник мӧдӧдчис тӧдса туйӧд грезд лунвывса нӧрыс йылын сулалысь керкалань.

А сьӧлӧмыс сэтшӧма тіпкис: сійӧ и видзӧд, чеччыштас морӧс кудсьыс. Керка дорӧ матыстчигӧн нӧшта нин ньӧжмӧдіс восьлас-сӧ. Тані ӧд коркӧ, батыс киӧн нэмӧвӧйся пожӧмъясысь стрӧйтӧм, ӧні на зумыда сулалысь керкаас, сійӧ чужліс да быдмыліс. А со эстӧн сӧн бокас сулавліс горъя пывсян. Но ӧні сьӧдасьӧм стена пывсяныс эз нин вӧв. Важмис, кӧнкӧ, да сэсся пилитісны пес выӧ керкаын выль олысьясыс.

Збылысь, тӧдчис, мый тані кодъяскӧ олоны. Керка подуvsӧ вӧлі кисьтӧма цементысь, ортсыса стенъяссӧ кышӧма вагонкаӧн. Вевтыс шипер улын. Лунвылас, увтасінланьын, сулаліс выль пывсян. Сыкӧд орччӧн — ыджыд теплица, сэні тыдалісны ӧгуреч да помидор петасъяс. А кильчӧ дорас котсісны курӧгъяс. На бӧрся стрӧга видзӧдіс мыйкӧ броткигмоз ыджыд гӧрд сорса петук. Неуна ылынджык нюжйӧдісны кузь сьылінысӧ дзодзӧгъяс.

Сідзкӧ, бать-мам керкаас овмӧдчӧмаӧсь бур кӧзяинъяс. Василий Петровичлӧн чужӧмбанӧд пондісны лэччыны синва моляс. Ӑд кымын во сійӧ эз воы тайӧ гажаинас! Со эстӧн сӧн пыдӧстіыс дзольгӧ-визувтӧ ичӧтик шор. Тулыснас сійӧ збоймыӧ да весиг джуджыд нӧрыссӧ дась нуны. Нӧрыс лунвывланьыс паськыд муяс. А нӧшта улынджык — видзьяс да веретяяс. На коласын — Эжвалӧн чукулыыс. Быд пӧраӧ тані вӧлі зэв гажа. Ӑні Василий Петрович весиг каитчыны кутіс, мый сы дыра эз воы чужанінас.

Но друг сылысь мӧвпгьяссӧ торкис кильчӧ ӧдзӧс дзуркнитӧм шы. Керкаысь котӧрӧн петіс еджыд юрсиа, сандалиа детинка. Ӑти киас — дженьыдик шатин, мӧд киас — нидзув доз. Зонка тэрмасьӧмӧн лэччис кильчӧ сод кузя да тӧвзис вадорӧ нуӧдысь туйӧд. Сэккості кильчӧ вылын тыдовтчис оӧма нин ань да пондіс лыддьӧдлыны:

— Василь! Кытчӧ тэнӧ морыс нуӧ? Эн, колӧкӧ, тэрмась. Сконъясян да водза мозыд жӧ пидзӧстӧ дойдан. Удитан на вадорад.

Тайӧс кылӧм бӧрын Василий Петрович тӧдлытӧгыс нюммуніс. Сійӧ ӧд ачыс коркӧ татшӧм жӧ еджыд юра вӧлі. Батыс нӧк юрӧн шуывліс. Ӑні эськӧ еджыд жӧ, но дзормӧмысла нин. Тайӧ детинкасӧ моз жӧ сійӧс шулісны Васильӧн. Тадзи жӧ горӧд-

лывліс сылы кильчö вивсянныс мамыс, кор Василь тэрмасьомөн котöртлывліс вадорлань.

Тайöс казтыштöм бöрын Василий Петровичлы долыд лои. Быттö асьсö сійöс тöдöны тайö керкаас.

Сэккості нывбаба казяліс тöдтöм мужичöйöс, сюся видзöдліс сы вылö да нюркйöдлөмөн шуис:

— Но-о-о, кутшөмкө тöдтöм гөсьт тай локтöма. Эз öд весьшө-рö талун каньным асывбыд мыссьы. Тöдö пемöсyd, мый кодкө пыралысь лоö.

— Энö ёна видзöдöй ме вылö, öдвакө тöданныд,— воча кыпы-да шуис Василий Петрович. Сэсся ланьтыштліс да содтіс:— Менö öд мамöй коркө тайö керкаас и чужтыліс. Тайö нöрыс йылас и колис челядьдырöй.

Олöма ань нöшта ёна чуймис тайö кывъяс бöрас:

— Но-о-о, важ көзяиныс тай локтöма видлыны. Вай, вай, пырав, видзöдлы, кыдзи олам. Тшай ютöгыд ме тэнö бöрсö ог лэдз.

Василий Петрович ньöжйөнник пырис көзйяка бöрся. Сійö кытшовтіс синнас керка пытшкөссö да бара на мөвпыштіс, мый бать-мамыслөн керкаын олöны збылысь идöра көзяинъяс. Быдлаын дзим-дзурк. Мичаа мавтöм джоджас вольсалöма джодждöраяс. Стенас öшалöны серпасъяс. Жыр пельöсын сулалö ыджыд холодильник. А коркөя ыджыд пач пыдди тэчöмаöсь ичöтджыкөс, плитааöс да паччöраöс.

— Видзöданныд, кыдзи олам?— нюммуніс көзйяка да содтіс:— Менö Гора Варукөн шуöны. Нэмсö мөсъяс дорын нокси. Öнi со внук-внучкаöс лелькуйта. Пыр пола Василь вöсна. Юр вундысь кодь öд быдмö. Пыр кевма, мед нинöм жö сыкөд оз ло.

Василий Петрович висьталіс аслас бать-мам йывсыйс, и Гора Варуклөн пыр жö ловзыштіс синмыс:

— Кывлі, кывлі на йылысь. Зэв шаньöсь вөлöмаöсь. Ме öд ачым орчча грездысь петавлі. Татчöс войтырсö ставнысö тöда.

Көзйяка пузьöдіс тшай. А Василий Петрович лэпталіс пызан вылö карса гөснечьяс: калбас, сыр, апельсин, кампет, а на дорö и вина доз. Мед көзйяка эз дивит сійöс, ачыс пановтіс:

— Ме ачым курыдторнад ог ёна дурлыв. Но талун бара быттö веськалі челядьдырся кадö. Мам-бать татысь мунöм бöрын ёна гажтöмтчылісны. Пыр мөвпалісны татчö бөр бергöдчөм йылысь. Но кытысь нин... Батьöй сідзи и куліс тайö гуся мөвп-нас. А мамöй кулөм водзвылас шуис, ветлы пö, Василь, коркө-некоркө чужанінад да копыртчыв миян керкалы, сулалö кө на сійö. Со сійөн ме и локті татчö, мед казтыштны бать-мамлысь югыд паметсьö.

Гора Варук да Василий Петрович точкысисны кока румкаяс-өн. Гөсьт кутіс висьтавлыны аслас челядьдыр йылысь. А син водзас ловзисны сійö кадся серпасъясыс. Батьыс, Öндреян Петрö, уджаліс татчöс колхозын бригадирөн. Авъя да уджач морт вöлі. Грездын сійöс ёна пыдди пуктылісны. Но öд ускөттöбид тай воас, кытысянь он и виччысь. Öтчид арланыйс кузь киа кутшөмкө йöз гусялöмаöсь видз вылысь быдса турун зорöд. А войнабöрся воясö законъясыд чорыдöсь вöліны. Кывсис, мый көсийöны мыждыны таысь и Öндреян Петрöс, фронтöвикöс. Сійö пö вузаліс кодлыкö турунсö. Көть эськө грездса войтыр

таӧ эз эскыны. Но ӧд лӧжтӧ кӧ дугдывтӧг кутан дольны, эскысьыд пыр сюрас. И кодсюрӧ збыльысь пондісны мыжавны Ӧндреян Петрӧӧс.

Отчыд арся пемыд рытӧ кодкӧ гольӧдчис Ӧндреян Петрӧлӧн кильчӧ ӧдзӧсӧ. Ичӧтик Василь буретш паччӧрас куйліс. Пырис колхозса председатель Семён Михайлович, ас грездса морт. Кык мужичӧй пуксисны пызан сайӧ да кутісны негораа сёрнитны. Но Васильы век жӧ удайтчис мыйсюрӧ кывны.

— Кывзы, Пётр Андрианович,— шыӧдчис колхозса председателыд батыс дінӧ.— Ме гӧгӧрвоа, мый тэ ньӧти абу мыжа. Но видлы тайӧс висьтавны законтӧ дорйысьяслы. Ме кӧ тэ дор сувта, ачымӧс пуксьӧдасны. А тэнӧ и збыльысь уна во кежлӧ кӧсйӧны дзескыдінад йӧртны. Челядьыд ӧд ичӧтӧсь на. Колӧ на йылысь мӧвпыштлыны. Бурджык мун семьянад мӧдлаӧ. Со орчча леспромхозын пӧ уджалысьяс колӧны. А сэккості ми кузя-визяӧн мыж вӧчысьястӧ корсям.

— Но кызди нӧ ме аслам керкаысь муна быдса араваӧн?— воча шуис Ӧндреян Петрӧ.— Код вылӧ керкаӧс коля? Да и коді бокынсӧ та мында нянь сёйысьсӧ виччысьӧ?

— Эн тшӧтясь,— стрӧга вочавидзис Семён Михайлович.— Не тэ кодъ йӧзӧс чеглывлісны. Медводз мӧвпыштлы семья йывсьыд. Налы ӧд водзӧ овны.

Ӧндреян Петрӧ юрсӧ ӧшӧдӧмӧн кывзіс колхозса председателыс. А мӧд асыводзнас нин мӧдӧдчис семьяыскӧд неылысса леспромхозӧ. Кыдзи Катыд грездын удайтчис ставсӧ бергӧдны Семён Михайловичлы, некод эз тӧд. Но Ӧндреян Петрӧӧс выльлаын некытчӧ эз кутны кыскавны. А регыд мысти сійӧ лоис медбур вӧр лэдзысьяс лыдын. Сэні и быдмис сэсся чойясыскӧд Василь. Мамыс, Опонь Лиза, вӧрын жӧ верӧсыс моз уджаліс. Увйысис. Мӧстӧ видзны вӧр посёлокад сьӧкыд вӧлі, да гозъя ньӧбисны кӧзаясӧс. Налы ӧд оз сэтшӧм уна туруныд ков. Гожӧм-нас отпускалигӧн посёлоксаяс отсалісны колхозникъяслы турун пуктыны. А таысь водзӧс найӧс лэдзисны ытшкыны ты бокъяс, бадь пу коласъяс. Тадзи и бергӧдчисны посёлокса вӧр лэдзысьяс скӧтнысӧ видзигас. Ӧндреян Петрӧлӧн да Опонь Лизалӧн челядьыс, позьӧ шуны, кӧза йӧв вылын и быдмисны.

Но вӧрса уджыд ӧдйӧ жутӧдіс Василий Петровичлысь батьмамсӧ. Вочасӧн пыр ёнджыка кутісны висьӧдчыны. Сэки и чужис налӧн гортаныс бӧр косӧм йылысь мӧвпыс. Сійӧ вӧлі налы мича мойд кодӧн.

А сэккості Василь, семьяас медся ыджыд быдтасыс, помаліс посёлокын сизим класс да велӧдчис шоперӧ. Сэсся овмӧдчис карӧ да уна во чӧж новлӧдліс аслас машинаӧн республика пасьта быдсяма грузъяс. Отсаліс бать-мамыслы сувтӧдны кок йылӧ ичӧтджык чойяссӧ. Коркӧ сэсся посёлокбердса пармаысь вӧрыс быри, да лесопунктсӧ пӧдлалісны. Но Василий Петрович эз эновтчы сьӧлӧмыслы мусмӧм посёлоксьыс. Стрӧитіс сэтчӧ дача. Да и посёлокыс чужан грездяныыс неылын вӧлі, и тайӧ пыр шонтыліс сьӧлӧмсӧ.

Сэсся тӧдлытӧг челядьыс быдмисны да ас кошт выланыс петісны. И со пенсия вылас Василий Петрович юрын пыр ёнджыка кутіс бергавны чужан грездас ветлӧм йылысь мӧвп. Ӧд сэтчӧ кӧсйисны ветлыны и бать-мамыс. Асьнысӧ тай чужанінся-

нныс бокын и гуалисны. Медбёрын, кор Василий Петрович пондіс быд вой вѳтавны ассыс грездсѳ, шуис видлыны чужанінсѳ.

Гора Варук синвасѳ чышкалігмоз чѳла кывзис Василий Петровичлысь кузь висьтсѳ. А неуна джынъялыштѳм вина дозйыс сі-дзи и сулаліс пызан вылын. Кык пѳрысь мортлы винасьыс чѳс-кыдджык вѳлі олѳмнысѳ казътылѳмыс.

Медбёрын Гора Варук шуис:

— Гашкѳ, узьмѳдчан миянын? Аски нин гортад мѳдѳдчан. Регыд нылѳй да зятѳй воасны. А на бѳрся и гора гѳлѳса быд-тасъясыс рытсѳ кутасны гажѳдны.

— Ог нин кут тѳянѳс манитны,— вочавидзис Василий Петрович.— Менѳ ѳд гортын виччысьѳны. Кѳсъя рыгъя автобуснас бѳр мунны. Бур, волі мам-батъ керкаѳ да. Налысь кѳсьѳмсѳ збыльмѳді. Мед шонъянѳйяс оз кутны майшасъны сѳсся та вѳсна мѳдаръюгыдас, эм кѳ кѳнкѳ сѳйѳ.

И век жѳ автобусын пукалігѳн Василий Петровичлы сѳѳкыд лои сѳѳлѳм вылас. Со воліс сѳйѳ чужан грездас недыр кежлѳ и бара нин пышѳй сѳтысь. Кыдзи ковмис коркѳ пышѳыны батъ-мамыслы. Посѳлокас олѳгѳн сѳйѳ эз пырысьтѳм-пыр велав рочасъны, да выль ѳртъясыс нерлісны коми зонкаѳс. Сѳсся эськѳ и велаліс, но пыр гажтѳмтчыліс чужан кывсьыс. Карын олѳгас зѳв гежѳдкѳд удайтчыліс сѳрнитыштны коминас. И бара жѳ сѳмын ас грездысь петлѳм войтыркѳд. А аслас челядыс ичѳтдырсянныс нин рочасисны. И батыслысь чужан грездсѳ оз тѳдны, кѳтъ эськѳ эз ѳтчыдысь висътавлы налы сы йылысь. И та вѳсна Катыд грездас найѳс оз кыскы. Мѳдджык кадѳ быдмѳм том йѳзлѳн мѳдджыкѳсь тѳжд-майшасъмъясыс, кѳс-йѳмъясыс. И Василий Петровичлы ѳні чайтсис, мый батъ-мамыс и ачыс олісны эз сідзи, кыдзи эськѳ коліс. Та вѳсна лои воштѳма зѳв унатор, и мыйкѳ вежны оз нин артмы.

Жыннян

Коркѳ уна-уна во сайын лунвыв кыр йылын грездса мужи-чѳйяс лѳптисны джуджыд часовня, мед вичко праздник лунъясѳ каитчыштны абутѳм грекъяссыс вежа ай водзын, корны прѳща да бур олѳм. Часовняѳ чукѳртчылісны пѳрысь и том. Копыртчы-лѳмѳн юрбитісны ыджыд ѳбразъяс водзын, быдѳн аслыс бурсѳ кевмѳмѳн. Ярыюгыд паськѳма, морѳсас югъялысь ыджыд креста вежа ай гора гѳлѳсѳн бласлѳвитліс быдѳнѳс, корис видзчысьны грекъясысь, чуксаліс сѳѳлѳмсянъ уджавны да бура овны. И грездса войтыр кокни сѳѳлѳмѳн, негораа варовитігмоз разѳдчыліс-ны гортаныс локтан праздникѳдз.

А чуксавліс йѳзѳс служба вылѳ часовня сигѳр йылѳ ѳшѳдѳм ыджыд жыннянлѳн гора бувгѳмыс. Сѳйѳ бытгѳѳ садъмѳдліс быдѳ-нѳс дыр кадся узьѳмысь. И грездса олысьяс пернапасъяс чѳвта-лігмоз тѳрмасълісны часовняѳ. Грездса олысьяс нимкодъясисны жыннян звѳннас.

Нимкодъ вѳлі татшѳм лунѳ и жыннянлы. Медводз сыысь, мый садъмѳдіс грездлысь вѳтын нисъ вемѳсын моз чѳв да рам олѳмсѳ. Йѳзыслѳн сѳки и збыльысь югзылысны чужѳмъясныс. Ѳд нылѳм петтѳдз быдлунъя пессъѳм-ноксъѳм сайын найѳ эз

казявны асгөгöрса югыд олöмсö. А жыннянсö кывзигöн йöзыс недыр кeжлö эновтчылісны тöжд-майшасьöмсьыс да шензьöмөн видзöдывлісны ас гөгöрыс. Вöлөмкö, олöмыс и збыльысь мича, кор енэжын дзирдалö яръюгыд шонді да быдөнöс шонтö. И жыннянлы вöлі торйөн нимкодъ, мый сяммыліс небзьöдыштны йöзыслысь сьöлөмсö, вайыштны налы кöть мыйтакö радлун.

Тадзи вöлі уна во чöж, кытчöдз выль власът эз пöдлав часов-нясö да лöсьöд сэтчö склад. Эмбурла часовняö гежöдика пыра-лысьяс весиг эз кужны чайтны, мый некымын во сайын татчö воыль йöз шыöдчывлісны бур корöмөн Медыджыд дінас. Но мый тай он чайт, сійö и збыльмö.

Гажтöм лоис и часовня йылын öшалысь жыннянлы. Сы дорö каян содъя пусö разисны, мед челядь эз кавшасьны жыннян дінас. И сійö чöла öшаліс часовня йылын да шога видзöдіс грезд вылö. Сöмын ён төв дырйи пондыліс негораа бувгыны да казътивны ас йывсьыс, ме пö öд ловъя на. Энö пö вунöдöй ме йылысь, грездса олысьяс. Мый вылö кö пö öд шогма на.

А грездса олысьяс и збыльысь эз вунöдны сы йылысь. Öтчыд зэв төла гожся луно челядьлөн дзулöдчöм вöсна сотчис грездын кымынкö керка. Кутшöм ёна эськö пессисны йöзыс, мед кызкö кусöдны бисö, но яр төв вöсна нинöм эз вермыны вöчны. Сэки кодсюрö и кутіс шуасьны, Енмыс пö мыждіс мянöс важ грекъясысь. Но унджыкыс сералісны та вылö да вöзйисны ёнджыка видзчысьны биысь. Сэки и чужис öтувъя мөвп: колö лэдзны часовня йылысь жыннянсö да öшöдны сійöс сикт шöрын сулалысь амбар вевт улö, мед кутшöмкö ускöттö дырйи звöнитны да кад воштытöг локны öта-мöдлы отсöг вылö. Сідзи и вöчисны. Лэдзисны жыннянсö часовня йылысь да öшöдісны грездшöрса амбар вевт улö.

И со öні жыннян аслысног кутіс видзны йöзлысь олöмсö. Суас кö кодöскö ускöттö, кодкö тракнитас жыннянсö кывъяс көрталöм көвйöдыс. Либö ковмас кö чукöртлыны йöзсö тöдмöдны выль власът индöдъясөн, жыннян бувгöмыс пыр жö чукöстас грездса олысьясöс выль колхоз правлениеö.

Жыннян звөн чукöстліс йöзöс и гаж вылö чукöртчывны. Сэні пасйылісны бура уджалысьясöс да сетлісны налы козинъяс. А сэсса ставөн пуксьылісны кузь пызан сайö, пöттöдз сёйисны-юисны да гудöк улö сьылісны-йöктісны. Тайö кадас лэдзлісны троныгыны жыннянөн и челядьöс. А налы нимкодъыс! Дерт, жыннян сэки радліс жö, мый сы йылысь оз вунöдны, мый сійö колö йöзыслы. И гора шыяснас дыр гажöдіс грездсö.

А öтчыд мича гожся луно амбар дорö матыстчис колхозса юралысь да пондіс тракйыны жыннянсö көвйöдыс. И жыннян нимкодъпырысь шыасис. Сійö öд эз тöд, мый могысь локтіс юралысь. А грездса шай-паймунöм олысьяс тэрмасьöмөн чукöртчисны амбар дорö да чöла виччысисны, кор колхозса юралысь дугдас бовгыны жынняннас.

Здук-мöд мысти сійö эновтіс жыннянсö да юöртіс йöзлы, асывнас пö мян му вылö уськөдчисны пеж вөрөгъяс и мужичöй-яслы ковмас мунны чорыд тыш вылö. Мужичöйяс да зонъяс чöла кывзисны шог юöрсö. А аньяс да нывъяс пондісны гораа бöрдны. Здук мысти амбарбердса ыджыд эрдыс тыртöммис.

Ставон разодчисны гортаныс, мед дасьтыны ыджыд тыш выло мунысь веросьяслы, пьянлы, вокъяслы колана эмбурсо.

Чов-лонь пуксис тыртөммөм грездын. Шога восьлалісны амбар дорті удж выло мунігөн да бөрсө локтігөн нывбабаяс, пöльяс, челядь. Чöла висьтасисны öта-мөдныслы вир кисьтана тыш вывсянь воом юөръяс йылысь. Унаөн чышкалісны синванысö матыссаяслөн усьом йылысь төдмалөм бөрын. Шог вöлі тайö кадас и жыннаны. Некод эз бувгы сыөн. Уна лун-вой тадзи колис.

Но со воис öти тувсовъя лун. И амбар дінö бара матыстчис сійö жö колхозса юралысьыс. Öні сійö вöлі ки пöла и кок пöла. Фронт вылын унаысь чорыда ранитчыліс. Но век жö ловйөн воис гортас. И со сылөн чорыд киөн вөрзёдом жыннан бара чукөстис йөзөс гора шынас. Амбар дорö чукөртчисны пöрысь и том, на лыдын и гортаныс воом ранитчөм фронтөвикъяс. Колхозса юралысь нимкодпырысь висьталіс чирөм гөлөснас, мустөм вөрөгөс пö пасьвартөма и тайö луныс грездын лоас празникөн. Бара кузь пызанъяс сайö чукөртчисны йөзыс, медсясö нывбабаяс, пöльяс да челядь. Юргисны гора да мича кывъяс. Но мыйта вöлі синваыс, некод оз куж висьтавны. Аньяс синва пырыс казътылісны усьом веросьяснысö, пьяннысö. Öд таөдз найö кисьталісны синвасö войнас, медем ичöt челядыс эз казавны. Накөд тшөттш шогсьөмсорөн нимкодясис и жыннан. И челядь бара лунтыр бувгисны сыөн.

Сійö кадсянныс дыр на öшаліс жыннаныс амбар вевт улын. Но сэсся амбарыс важмис, и сійөс разисны пес выло. Сэки вошис кытчөкө и гора да мича гөлөса жыннаныс. И öдвакө кодкө вермас висьтавны, көні öні сійö. Жыннан, көнкө, гөгөрвоис, мый öнія кадö, кор быдтор йылысь позьö зэв öдйö төдмавны да пыр жö юөртны, сійö некодлы нин оз ковмы, да корис Медыджыдыслысь кутшөмкө дзебсянін. И йөз дорö жыннаныс воас сөмын сэки, кор бара кутас ковны налы.



Төдны кольём кадсө, мед лосьодны водзө лоан олөмсө

Кулөмдін району эм ичөтик сикт, шусьө Ичөт Кужйөн. Дерт, быд сиктлөн эм аслас туйвизь — мыйсянь пансьөма сиктас олөмыс, коді сійөс чужтөма да сідз водзө. Со и Ичөт Кужлөн татшөмыс эм. Гашкө, төданныд? А вот кывзөй, кутшөм легенда ме төда!

Важөн-важөн, и не сөмын ме, а весиг миян пөч-пөльяс, ыджыд мамъяс да ыджыд батьяс нин оз төдны, быттьө Эжва ю кузя Шойнатысянь да Нёбдінсянь кывтөмаөсь пыжа йөз, корсьөмаөсь, кытчө эськө позис овмөдчыны, медым кыйны озыр вөр-ваысь звер-пөтка, сөстөм ваысь чери да вына му вылысь босьтны град выв пуктасъяс да нянь.

Кывтісны-кывтісны визув ю кузя и шуйгавылысь аддзисны зэв мича да гажа нөрыс. Йөзыдлы сьөлөм вылө воис тайө гажа нөрысыс да сійөс вольсалысь веж лудыс. И мөвпыштисны татчө сувтны и овмөдчыны. И нимтісны тайө инсө «Куж» кывйөн.

А мыйла бөрийсны татшөм ним? Вөлөмкө, важся эрзь кывсянь «Куж» кыв вуджөдчө кыз «поляна» (комиён кө, «луд», «эрд»).

И мойдын моз кыптіс-паськаліс ичөтик сикт, содісны дзим-дзурк керкаяс. Сиктыс пансьөма зэв гажаинө — нөрыс йылө. Видзөдлан кө сы вылө бокиясь, то шензьөдө синтө мичлуннас, кыпөдө ловтө, пытшкад садьмө-ловзё кутшөмкө югыд вын. Керкаясыс терем-теремок кодьось, пыр и тыдалө, мый лөптөмаөсь найөс вежөра йөз. А нөрыс горулын кельыдлөз лентаөн пөртмасьө алькөс берегъяса Эжва. И йөзыс, кодъяс овмөдчылөмаөсь татчө, вөлөмаөсь зэв вынаөсь, төлкаөсь, сибыдось, биа бордаөсь, радпырысь панлөмаөсь быд виль лун и дорлөмаөсь шуда да гажа олөм. А ас костаныс нимтісны асьнысө «кужсаясөн».

Кыз и быд сиктын, Кужйын вөвлөмаөсь и эмось на аслас геройяс, төдчана мортъяс, кодъяс асланыс морт оласногөн, сьөлөмсянь уджалөмөн нимөдісны тайө сиктсө эз сөмын район пасьтала, но и республикаын.

И ме ошйысигмоз казътышта ыджыд мамөс — Елена Дмитриевна Тарабукинаөс.

Төдан кө эськө, кутшөм туйвежын
тэно виччысьө шудыд,
мөдлаті эськө он жө нин ветлөдлы да!

Тарабукинъяслөн голь коми семьяын öти гожся шондiа лунö сюрс öкмысё кызь витöд воын чужис медводдза кага, кодöс шуисны Еленаөн. Тайö нимыс греческöй кывсянь вуджöдчö кызди «дзирдалысь, югъялысь». Елена быдмис збой, винёв нывкаөн. Асьö тöдö квайт арöссиянь. Кор сылы вöли квайт арös, Тарабукинъяс семьяын чужис нин куим ичöтджык челядь. Елена-налөн (öни менам ыджыд мам) вежöрас кольöма, кызди сiйö видзöма Граша чойсö, кодлы чужöмсяньыс вöлöма сöмын некымын тöлысь. Бать-мамыс мунлисны водз асывсянь удж вылö, а медыджыдсö, Еленаös, кольлисны видзны челядьös. Дерт, квайт арöса нывкаыдлы абу окота лунтыр пукавны гортад да видзны чой-вокös, окота ветлыны гуляйтыштны. Ас вылас кышалас айлов дөрöм, сэтчö пуксьöдас Грашатö и мунö гуляйтны сикт кузя, вөрö на удитлас пыравны тусь вотны. Потшösъяс вомöныд оз вермы вуджöдны кагатö да первой Грашатö потшös костöдыс сюяс, а сёсся ачыс потшös вомöныс вуджас.

Тадзи челядьтö видзöма-олöма 9 арösöдз. Öкмыс арös бöрын пырöма Ичöт Кужса школаö, көни велöдисны сöмын нельöд классöдз. Велöдисны арифметика, естествознание, история, роч кыв, коми кыв. Бурджыка сетчöма сёрнитана урокъяс: история, естествознание — паметъыс вöлöма бур. Да и став предметыс мунö вөлöм коми кыв вылын.

Медводдза кык восö велöдысьөн вöлöма боковысь локтöм морт, Иван Александрович Пономарев. Сёсся сiйös босьтлöмаös армияö. И бөръя кык восö велöдысьөн вöлöма боковысь жö локтöм морт — Марья Андреевна.

Витöд классын велöдчыны колö вöли кайны Ыджыд Кужйö, но мамыс абу лэдзöма нывкалы öзтыны сёлöмас велöдчöмлысь югыд бисö: колö вöли мунны уджавны, мед вердны ыджыд семья.

Миян кадö тшöкыда шулывлöны, мый дзöлядырся кадыд мойдкыв кодь сöстöм да гажа. А менам ыджыд мамлы вичмылöма курыд челядьдыр. Дас кык арöссиянь сылы дзик пыр сылы вылас сölöма верстьö тöждлун да кусöдöма нывкалөн синъясысь вильыш бияс. Öниä том йöз дорö позьö шыöдчыны: мед ичöтсянь лоис сямыд, колö аттьöавны кувлытöм удж. Öни, мен чайтсьö, дышлуныс мукöд том йöзас йиджöма пытшкösас унджык коланасьыс. А важся кадö бөрйынысö вöли нинöмысь: либö бур уджөн асьтö доръян да пальöдан курыд шогтö, либö босьтас Енмыс.

Ставөн уджалісны колхозын. Вөлöма Кужйын кык колхоз — «Гигант» и «Ленин ног». Ыджыд мам пыралöма и уджалöма «Гигант» колхозын, а комын сизимöд воын пыртöмаös ставнысö «Ленин ногö». Сиктса йылöмтö ыстылісны шабдi нетшкыны, турун юр ваявны, велöдисны нянь вундыны. Вöv вылö пуксьöдлісны агсасьны. Вövтö, дерт, дас кык арöса нывкаыд абу вермылöма ни доддявны, ни лэдзавны. Да отсасисны ыджыдджык арлыда детинаяс. Кор батьсö нелямын öтиöд воын нуисны война вылö, колисны ыджыд мам мамыскöд öтнаныс. Ыджыд мамлы вөлöма дас квайт арös, а медічöт квайтöд чойыслы муртса кык арös: «Ыджыд лоин, колö водзö овны. Сьöкыдлунысь оз ков повны!»

Война эз лэдз пукавны шонѹд позѹйын да лѹбачпѹян моз виччысьны вомѹ мѹйкѹ чѹвтѹм. Олѹсны тшыг нѹсьѹ пѹт, сѹйѹм ни юѹм. Весиг идзас сѹйлѹсны. Идзассѹ медводз нальлѹсны, пызь пыдди пуктылѹсны вундалѹм сѹсь картупель. Ставсѹ ѹтлаын гудравлѹсны да рачын пѹжавлѹсны. Татшѹм нянь вѹвлѹ. Ичѹт вокъясыс вѹв бѹж сѹысь вѹчлѹсны дзуг. Дзугѹн кѹялѹсны, пулѹсны да сѹйлѹсны уркайясѹс. Ѳд уна челядя семья-яслы вѹлѹ кык пѹв сѹѹкыджык. Отсѹг, дерт жѹ, некодсянь эз вѹв. Со и ковмис, мед вердны сизим душа семья, кайны вѹрѹ уджавны.

Вѹрын ыджыд мам мырсис дас во чѹж. Уджалѹсны план вылѹ. Лунся планыс кѹ тырѹ, сетлѹсны 800 грамм нянь, а оз кѹ — 600 грамм нянь. Кер дорад уджалѹгад планыд пѹшти некодлѹн эз и тырлы. Да став лунся сѹяныс и вѹлѹ 600 грамм нянь. Шонѹд паськѹм пиысь нинѹм эз вѹв: ни гын сапѹг, ни кепысь, ни купайка. Вит восѹ ыджыд мамѹй сѹмын вѹр пѹрѹдѹма, а сѹсся увѹйысѹма, катѹйтѹма кер. Уджавлѹсны водз асыв-сянь и сѹр рытѹдз пидзѹсѹдз лымтѹ собалѹмѹн. А тувсовъялѹгѹн ковмылѹс пуръясьлыны да келавлыны ѹиа ва пиын.

Сыълѹм-ѹѹктѹмтѹ эз тѹдлыны — мудзѹмысла эз вермыны, кокъяснысѹ ѹдва кыскалѹсны. Сѹйѹ этшаник удждонсѹ, мѹй сетлѹмаѹсь, ыджыд мам ставсѹ мѹдѹдлѹма гортас — сы кындзи отсавны мамыслы вѹлѹ некодлы.

Овлѹсны-уджавлѹсны Вуктыл ю дорын морт кызя баракын. Тулыс-арсѹ ѹиа ваад келалѹм бѹрын ѹйзѹм кокъясьыд кѹмкотыд пач дорын сывдытѹг оз и шед. Ѳти пач дорад косьтысисны сѹрсьѹн-бѹрсьѹн вой шѹр кадѹдз. Водан да мудзвывсьыд пыр и ланьтан. Гын сапѹг пыдди вѹлѹма кыс — кучикысь вурѹм кѹм, гѹленьыс дѹраысь, а лапасѹ кукань кучикысь медводз вѹлѹм сиралѹны, а сѹсся вурѹны. Татшѹм кѹмкотыд, дерт, некытчѹ эз туй. Оз ѹд прѹста, кыдз шуѹ ыджыд мам, ѹиа ваын собалѹм бѹрад ки-кок лыястѹ ѹнѹ пѹрысьясыдлысь куснѹдлы.

Уджалѹгад уналаѹ волѹсны. Ѳтчыд нелямын нѹльѹд воын арнас мѹдѹдлѹсны паракодѹн моль бѹж колльѹдны Трѹхозеркаѹдз. Том ѹѹзыд, ѹйсѹ жуглѹмѹн, кѹтѹ чувкиѹн пырѹны вѹлѹм ваас да керъяссѹ ѹѹткалѹны. Сулик ва кѹтасѹм паськѹмсѹ косьтынысѹ вѹлѹм некѹн, ѹд олѹмаѹсь паракод вылын, а сѹнѹ косьтысянѹнъяс эз вѹвны. Сѹмын коркѹ Додз сиктын нывъясыдлы ломтѹсны пывсян — ѹна тойѹссьѹмаѹсь.

Кытчѹдз став керѹыс оз мун Сыктивкарѹдзыд, гортад эз лѹдзлыны. Кодсюрѹ эз вермывны терпитны татшѹм сѹѹкыд-лунъяссѹ да пышѹылѹсны гортаныс.

Моль бѹжыдкѹд ветлѹмаѹсь кык тѹлысьѹдз да гортас волѹмаѹсь сѹмын октябр помын.

Тѹвнад коми войтырыд вѹр пѹрѹдѹсны, а гожѹмнад — турун пуктѹсны. Кор ыджыд мамъяс эз тувсавны (тулыснас Вуктыл юсянь мольнас керъяс колльѹдлѹны Ѳжваѹдз), колхозын гѹрисны, а гожѹмнас турун пуктѹсны.

Ѳти воѹ ыджыд мам ѹна висьмылѹма. Нелямын коймѹд воын вѹр пѹрѹдѹмаѹсь Уллыана дорысь. Уллыанаас вѹлѹм олѹны, а пѹрѹдчѹны орчча вѹрас. Медводз пѹрѹдчѹма, сѹсся эбѹстѹммѹма да пѹрѹдчынытѹ абу кутѹма вермыны, и сувтѹдѹмаѹсь кыс-

касьны. Абу кутöма вермыны кыскасьнытö, да ыстöмаöсь лым весавны. Кор нин абу кутöма вермыны весиг лымтö весавны, водтöдöмаöсь больничаö. Вöзйысьöма гортас, но гортас абу лэдз-лöмаöсь. Бурдöдысьясыд вöлөм чайтöны, мый кыткö пытшкö-сыс висьмöма. Мөдöдасны Кулөмдинö вöчны рентген. Но рентге-ныд петкөдлöма, мый некутшöм висьöм пытшкöсас абу. Сэсся ыджыд мамö мунöма гортас Кужйö да сылөн ыджыд мамыс вайлöма гортас öти кужса мужичöйöс. Мужичöйыд вöчöма ва да ва вывтыс визьйöдлöма пуртөн и тшöктöма ыджыд мамöс сийö ванас мыссьыны. Дерт, некод оз тöд, сийö ваыс отсаліс али ачыс ыджыд мамöй бурдіс.

Тшöтш казътывлö ыджыд мам нелямын витöд во, кор бара жö усьлöма кок йывсьыс. Вöлöма сылы кызь вит арöс.

Кайöмаöсь том войтыркөд Сордйольö ытшкыны. Луннас зэр-мöма да мөдöдчöмаöсь бөр мунны гортас. Друг нывбабаыдлөн гут ыдждаөдз топалöма лолыс, мышкыс быттö йизьöма, кокъ-ясыс абу аслас лоöмаöсь, вынтöмөсь. Ачыс абу гөгөрволöма, мый лоöма ськөд. Асьсö выныштöдөмөн ыджыд мам кыздзкö-мыйкö слабитöм кокъяснас кутöма восьлавны гортлань. Став том йöзыд ыджыд мамöс öтнассö кольöмаöсь. Ывла вылын вö-лөм рөмдö нин. Гортö мунан туйыс вөр пытшкын. Ковмылöма том нывбабалы корны отсөг лөнъ ывлаыслыс да пемыд вөр-ваыслыс — öтнаслы дзик нин шуштöм вöлöма. Но быдторлөн эм пансьöм да пом, и кузь туйлы коркö лоас пом да тыдовтчас рөднöй керкаыс.

Друг аддзöма: водзынджык пемыдас тыдовтчöма ичöтик яр чут — дзарвидзысь папирос пом. Ыджыд мам муртса садь быртöдзыс абу повзьöма. Но некытчö он воштысь, туйсьыс кежнйтö некодарö. Муртса матыстчöм бöрын гөгөрвоöма, мый туйбокса мыр вылын пукалö мужичöй. Тайö вöлöма кужса мужичöй. Ыджыд мамöс бур сьөлöма мортыс виччысьöма, мед отсавны мунны гортöдзыс. Аддзöма, мый ставныс коль-öмаöсь да, буракö, жаль босьтöма. Öтлаын ньöжйöникөн лэч-чöмаöсь Кужйөдз. Гортас воöмаöсь сёр пемыднас нин. Мамыс ыджыд мамлөн дзик пыр заваритöма ньыв лыс да кодзув-коткар и сийö ваас сулөдöма нывсö быд лун. Но кокъясыс не-кызд эз көсийны бурдны, пыр на вöліны кынöсь. Мамыс ко-рас тöдысь мужичöйöс. Мужичöйыд ыджыд мамöс пывсьöдас куим пывсянын, да нывбабаыд вöлисти сы бöрын сувтöма кок йылö. Медводз кутас ньöжйöникөн ветлөдлыны, а сэсся некымын вежон мысти весиг Кулөмдинөдз подөн ветлас, а ар-нас бара каяс вөрö.

Шуласны тай, томдырся олөмыд пö — бордъя шань вояс. Но ыджыд мамлысь висьталөмсö кывзöм бöрын сідз оз чайтсы. На дінö олөмыс ньöти абу вöлöма шань. Сы мында сьökыдлун венөм бöрын том аньяс абу весьөпөрöмаöсь, быдлунъя удж бертöмысь налөн абу пемдöма вöльнöй свет вылас ясыд видзөдласыс. Ыджыд мам муніс олөм туй кузяыс пыр водзö да эз усь, öд юр весьтас дзирдаліс да и öні на дзирдалö куслытöм кодзув. И вöлі кө менам вöля, эськö сеті енэж шөрсьыс нöшта на югыд кодзув. Вежөрö воöны кывбурысь татшöм кывъяс:

«Эмöсь йöз, быттö ярьюгид кодзувъяс,
Кодъяс пемыдын койöны дзирд.
Быттö войвывса мичаник дзоридзяс
Гажөн тыртöны тувсовъя видз».

Ветымын öтиöд воыс лои зэв тöдчанаөн ыджыд мамлөн олöмас — ассьыс сьölöмсö да олöмсö йитис менам ыджыд батькöд — Тарабукин Иван Федосеевичкöд.

«Видзяс былö куртны мöдi сöмын ме,
Мунігкості киöс кутіс сэк:
Мыйся, шуа, кодлөн кабыр татшöм ён?
Видзöда да, орччөн кыв-вора том зон».

Верöс сайö петігөн быд морт сьölöмсянныс кöсйö, мед эськö öтувъя олöмыс вöлі гожся асыв кодь жö югыдөн да сöстöмөн, кузь туй кодь жö помтöм-дортöмөн. И ыджыд мам эскис, мый öнi олöмыс сылөн лоö ытва дырйи рöднöй юыс кодь паськыдөн, шондi петан кадö кымöртöм енэж кодь джуджыдөн. И водзö олöм лöсьöдöм йылысь мөвпъясыс вочасөн кутисны лоны коланаөн.

Менам ыджыд бать ветлöма война былö. Нелямын кыкöд воын мунöма. Дзик пыр веськалöма Ленинградскöй блокадаö. Сэни прöстöй салдатъясыд зэв ёна кынмавлöмаöсь да тшыгъявлöмаöсь. Нелямын коймöд воын зэв ёна ранитчылöма сойыс да мышкыс. Лэдзöмаöсь волыны гортас, мыйла сэк кезлö блокаднöй кытшсьыд вöлі петöмаöсь нин. Гортас волöм бöрад ыджыд батьöс бара нуöмаöсь Ленинградад. И сэни воюйтöма война помасьтöдзыс.

Сылөн висьталöм серти, война бöрас кольччöма Ленинградö да овмöдчöма нывбабакöд. Олöма сыкöд кутшöмкö кадколаст. Но öтувъя олöмыс абу артмöма да ыджыд бать мунöма Эстонияö. Сэни уджалöма трактор вылын. Коркö öти лунö кодъяскö корасны ыджыд батьлысь ведра солярка. Сійö вöлöма зэв прöст мортөн да абу öткажитöма йöзыдлы, сетöма соляркатö. И ведра соляркаысь ыджыд батьöс судитасны да сетасны сылы көкъямыс во.

Сылы мойвиöма пукавны öти камераын сюсь йöзкöд. Найö отсалісны ыджыд батьлы гижöдчыны, медым делöсö видлалісны виль пöв. Гижöмаöсь, мый ыджыд бать соляркатö абу сетöма, а мыськалöма солярканас машиналысь запчастьяс. И куйм во пукалöм бöрын лэдзöмаöсь гортас. Кужйö воöма ветымынöд воын.

И вот ветымын öтиöд вося ноябр тöлысьын ыджыд мам ыджыд батькöд гижсьöмаöсь. Вөрö уджавны ыджыд мам абу нин кайлöма. Тöвнас турун кыскалöны, а гожöмнас гөрöныкöдзöны да турун пунктöны. Ветымын нельöд воын панісны кыпöдны ас керка. Ветымын сизимöд воын петісны нин овны виль керкаас. Чужтöмаöсь куйм челядьöс. Сиктас сэки абу вöлöма ясли ни сад. Асывнас вöлөм ыджыд мам челядьтö пуксьöдö вöла доддьö да нуö инькаясас. А рытнас, удж бöрас, сідз жö бөр вöла доддьөн нуö гортас. Тадз и быдтысьлöмаöсь. Кужъяд ясли-садыд вossьöма сöмын квайтымын квайтöд воын. Сэк

жө колхоз «Ленин ног» вуджөдөмаось Кулөмдинса совхозлөн кужса отделениео.

Ыджыд баты борья воясё ёна висёма. Дзоньвидзалунсё ёна жугөдома война вылын да тюрьмаын тшыгъялөмыс да кын-малөмыс. Ыджыд мамлы ковмис унджык гортса уджсё аслыс моздравны. Дас вит во отувья олөм бөрын квайтымын квайтөд воын ыджыд баты кувсис. Ыджыд мамлы вөлі нелямын оти арөс. Ки вылас колис куим чоя-вока.

Вуджөртөм да сөстөм олөм йылысь эскөмыс вежсис отка олөм вылө. Быттьөкө олөмлөн паськыд веж ордым кузя нывба-баыд мунис-мунис да син водзас дзик пырысь ордымыс медводз векняммис, а сэсся дзикөдз помасис. Быттьө кок улас полөмпы-рысь видзөдліс да аддзис сьод руөн вевттысьсөм пыдөстөм йир, кытчө ягвыв пожөмлөн кодь зумыд, топыд, ыджыд дойысь дрөйөдлөм тушаыс вермас вот-вот усыны. Арся ва мында синва кисьтөм бөрын нывбаба шуис ачыс аслыс, мый оз чег сійөс сьод шогыс, өд морөсас тіпкө вына сьөлөм. Да и челядь йылысь мөвпалігөн лолыс пондіс бөрдны и сывны, юрас бергаліс сөстөм да югыд шог, коді быттьө небзьөдіс да весаліс ловсө. Читкыра-сьысь рытъя шонді моз, коді югдөдө на, сөмын оз нин шонты, вежөрас пырис крепыд эскөм, мый сылөн эмөсь на дорйысьысь-яс — челядьыс.

И ыджыд мамлөн зэв водз дөваөн кольөм бөрын заводитчис шуштөм олөм. Дөва олөмыд быттьө шонді да төлысьлөн шы ни төв вермасьом: шондіыс быттьө мездьсө пемыд төлысьысь да төлысьыд ачыс шонді кытш пиысь некыдз оз мын.

Да, Ен отсөгөн челядьыд пось көвдум нянь моз ловзисны-быдмисны, лоисны мамыслы отсасьысьясөн. Куимнан челядьыслы ыджыд мам сетіс образование.

Ставныс лөсьөдісны семья да тыр-бур керка поз. Ставыс олөмас лои быттьөкө ас местаас. Но шогыд тай, вөлөм, ветлөдлө орччөн. Неминучаысь кувсьө нылыс да кольөны сылөн тыр арлыдтөм ныла-пия. Да бара на ыджыд мам пөрысь-нэмө босьтіс ас вылас сьөктөд: быдтыны да велөдны батытөм-мамтөм внук-внучкасө. Ставныс төдөны, мый батытөм-мамтөм олөмыд челядьтө быдторйө велөдас: и бурас, и лөкас. И өд артмис тайө аныслөн не сөмын быдтыны да велөдны внук-внучкасө, но и отсавны налы бөрийыны веськыд олан туйвизь, не сувтны лөк туй вылө да лоны Мортөн ыджыд шыпасянь.

Ыджыд мамлы олөмас ковмис төдлыны эз оти шог. Куим челядь пиысь коли сөмын оти пи. Некутшөм кывъясөн он вермы висьтавын сійө дой йывсьыс, кодөс төдлө мам ассьыс рөднөй челядьсө дзевигөн. Оні ыджыд мамлы көкъямысдас вит арөс и сійө эскө, мый Енмыс сетөма сылы кузь нэм батытөм-мамтөм челядьөс быдтөм вылө.

И ме, внучкаыс, кодөс быдтіс ыджыд мам, лыддя ачимөс медся шуда мортөн. Весиг босьтлө көдзыд йирмөг да ыркмунлө сьөлөмөй, кор мөвпышта сы йылысь, кыдзи эськө артмис менам олөмөй, эз кө вөв орччөн муса ыджыд мам: верми эг зумыда сувтны кок йылө да лөсьөдны ашөр олөм. Мамлөн кулөм-сянь коли нин дас квайт во. Ыджыд мам миянөс зэв ёна жа-

литіс, сы вöсна мый төдіс: ми некор нин огö кывлöй мамлысь мелі кывъяс, миянлы сыысь кындзи некод дорö шыöдчыны, некод сы кындзи оз отсав. Öнөдз на сылөн сьölөмыс висьö ми-ян понда, да отсалö мыйөн вермö.

Ыджыд мам вермас ошйысьны нель медальөн. Медводдза медальсö сетлісны «За доблестный и отважный труд в период ВОВ 1941—1945 годов». Нöшта сетлісны куим юбилейнöй ме-даль: ветымын вит во, квайтымын во и квайтымын вит во войналөн помасьöм кежлö.

Нелямын öти во уджалан стажысь пенсияыс чуктіс зэв этша — нелямын шайт, кор сы кодь жö пенсионеръяс босьтісны сё шайтöдз.

Öні ыджыд мам век шулывлö, мый шудыд абу ставныслөн öткодь, ставлы копрасьö оз öтмоз: öтикъяслы петкөдчылö вöт моз, мөдъяс ордын кабыраныс и олö.

Зэв водз мамтөг коли да став сьölөмсянь кута лача, мый вöльнöй светас став ыджыд мамъяслы да мамъяслы лоас ыджыд шуд, налөн некор оз киссьы шогсян синва да челядь муслунысь нюжалас олан нэмныс.

Дона ыджыд мам, ме муөдз копыртчыла тэныд! Да зэв ёна көсья, мед олыштан на вöльнöй свет вылас. Öд сійö зэв на и гажа!



Татчö ордымыд оз тыр...

1900 вося сентябр 18 лунö Усть-Сысольскса уезднöй земскöй собрание шуис восьтыны 8 народнöй библиотека, на лыдын и Нёбдінын. Тайöс көсйисны вöчны сы могысь, медым вöлөсьтса быд олысь вермис лыддыны небөгъяс да газет-журналъяс, медым йöзыс кыптисны ловнаныс, эз лэдзчысьны да юсьыны.

Земскöй собраниелөн 1898 вося индöд серти быд библиотекалы шуисны вичмöдны во кежлас 77 шайт. Сэтысь библиотекаын уджалысьлы — 36 шайт, книгаяс ньöбөм вылö — 25 шайт, жырсö югзöдöм да чернила-ручка ньöбөм вылö — 6 шайт, да 5 шайт — книгаяс дзоньталöм да коркаяссö вежлалöм вылö. Нöшта быд выль библиотекалы воссигас шуисны вичмöдны 145 шайт.

Сьöмсö сетисны сöмын 1901 онас. А сэтчöдз гөгөрбок артыштисны библиотекаын удж котыртöмсö, корсисны жыр, уджалысьсö, вынсьöдисны устав. И 1901 вося декабр тöлысьö Нёбдінса вöлөсьтын кыпыда восьтисны дон босьттöм библиотека. Сійöс восьтисны начальнöй училище бердын, Спирин Мишка Емель керкаын. Ачыс библиотекаыс тöрис 1-2 шкапö, көні видзисны небөгъяс. Уджсö сэнi котыртис видзöдысь (наблюдатель). Сійö жö дасьтис кабала библиотекаö колана небөгъяс да газет-журнал судзöдöм вылö.

Библиотекаыс сетис ыджыд отсöг эз сöмын училищеас воливлысь челядьлы, но и велöдчöмсö помалöмаяслы, кодъяс эз ордны училищекöд йитöдъяс да водзö кыпöдисны тöдöмлунъяснысö небөгъяс пыр.

Быд библиотекалөн вöли губернаторён вынсьöдöм устав, и уджаланногсö пасйылісны сэтчö. Сидз, библиотека воссьыліс рытнас, урокъяс помасьöм бöрын, а праздникъясö да шойччан лунъясö — асывсянныс. Эз уджав Ыджыд лун, Рөштво, Йöввыв дырйи, куим лун дорвыв. Гожся каникул дырйи велöдысь шойччигкості библиотекаын уджсö нуöдіс сэтчöс вичкоса вежа ай.

Небөгъяссö кө позис босьтлыны вежоннас кыкысь-куимысь, то газет-журналсö лэдзисны лыддыны-видлавны быд лун. Во помас библиотекаын зільысьяс дасьтылісны отчёт. Сидз, 1902 во помын Нёбдінса библиотекаын вöлöма 118 небөг, лыддысьсöма 66 морт.

1902—1903 воясö Коми муын библиотекаясса видзасын ме-дунаыс вöлöма художественнöй литература (ставсьыс коймöд пайыс), 20-25% — духовно-нравственнöй, 16-20% — историческöй, 9-10% — географическöй да естественна-научнöй, 2-6% — медицинскöй да сельскохозяйственнöй литература. Пöшти абу вöлöма техника серти небөгъяс.

Шойччан лунъясö библиотекаясын велöдчытöм йöзлы нуöдісны лыддысьöм («народные чтения»). Та могысь лекторъяс-

лы коліс босътны торъя тшөктөм пытшкөсса делояс нуодан министерствоысь. Сідз, 1903 вося февраль 23 лунö торъя тшөктөм вöлі сетöма Нёбдінса училищеысь велöдысь И.Я.Поповалы да сылөн отсасысьлы — нуöдны лыддысьöм. Лыддянторсö лекторъяс вуджöдлісны коми кыв вылö, медым став йöзыс гöгөрвоасны.

Библиотекаясн вöлі и сідз шусяна «волшебной фонарь» (мыйкö диапозитив сям). Сы отсöгөн петкöдлісны кинояс. «Народной чтениеяс» нуöдгөн петкöдлісны «Св. Кирилл да Мефодий», «Св. Стефан Пермский», «Наши воины православные», «Архангельский край» («Зыряне»), «Европа», «Азия» да мукöд кино.

1905 вося сентябр тöлысьö Нёбдінса начальной земской училище вуджис кирпичысь кыпöдöм виль стрöйбаö, сэтөн лои и библиотека. Сійö жö онас библиотекаö пондісны воны «Биржевые ведомости» газет, «Крестьянское хозяйство», «Вокруг света» да «Нива» журналъяс. А 1907 воын Нёбдінса вöлöсьтын воссис кык класса училище.

Вочасөн библиотекаясн кутісны нуöдсьыны вильвося гажöдчöмъяс, гижысьяслы сиöм кыпид рытьяс да с.в. А Нёбдінса библиотекаын зільысь Шергин 1908 вося декабр тöлысьö пунктис спектакль.

1908 восянь чорзис библиотекаяс бöрся видзöдöм. 1909 воын куим тöлысьöн видлалісны видзассыс небöгъяссö да унаöс на пиысь киритісны. Татшöм «чисткаыс» нуöдсис водзö да эз бур боксянь тöдчы видзас вылö. Сідз, 1910 воö Нёбдінса библиотекаын вöлöма 486 небöг, лыддысьöма 59 морт.

1911 восянь Вöлöгда губерняса земство дугдіс вичмöдны библиотекаяс видзöм вылö сьöмсö. Татшöмторйыс, дерт, пырысьтöм-пыр мөрччис наын удж котыртöм вылö.

1914 воö, I Мирöвöй война заводитчöм бöрын, ёна чинтісны библиотекаръяслысь удждонсö. Онас мынтісны 12 шайт. А библиотекаяссö, көні уджалысьясыс эз көйыны зільны тайö сьöм вылас, шуисны тупкыны. Но унджык библиотекаыс эз тупкысь, кутіс воссьывлыны тöлысьнас кыкысь, а библиотекаръяс зілісны дон босьттöг.

Война воясö сьöм абутöм вöсна библиотекаясö дугдісны воны виль небöгъяс. Войдöр кө сәні уджалісны мужичöйяс, сәки библиотекаравны кутісны нывбабаяс. Кодсюрö весиг асланыс сьöм вылö судзöдісны небöгъяссö да газет-журналсö.

1915 воö Нёбдінса библиотекаын уджаліс Наталья Павловна Анисимова (20 воясö сійö пунктис ыджыд пай коми сиктьясын культура кыпöдöмö). Тайö воö библиотекаын небöг лыдыс вöлöма — 421. Во чöжнас ёнджыкасö лыддысьöмаöсь челядь — 21 морт, гырысьяс пиысь — 11 морт. Библиотекаö воöмаöсь «Сельский вестник», «Свобода и порядок» газетъяс; «Известия Архангельского Общества изучения русского севера», «Нива» да «Природа и люди» журналъяс.

1916—1917 воясö уездной земствосянь да йöзкостса котыръясянь библиотекаясö кутіс воны унджык политической литература, но тайö эз ёна тöдчы видзас содöм вылö. Бур небöгъяс вочасөн киссисны, а уна во дорвыв нуöдöм «чисткаяс» бöрти видзасыс ёна гöльмис.

Сідз, 1917 воё Нёбдін вёлөсьтса библиотекаын вёлөма сөмын 421 книга, ёна чинёма и лыддысьысьлөн лыдыс (волөма 12 морт). Сэки сэнi библиотекаралөма Забоева Мария Георгиевна.

Революция бөрти, кор бырины земствояс, библиотекаяс кутисны зильны народнөй образование органъяс веськөдлөм улын. 1918 во помын Нёбдінын воссис нардом, и библиотекасө вуджөдісны сэтчө. Сэки видзассьыс киритисны важ ен нога 262 небөг.

Гражданскөй война кадө библиотекаясын уджыс нуөдсис дон мынтытөг, а мукөдлаын найө дзикөдз тупкысисны.

20 воясся сьөкыд кадө, кор коліс кыпөдны виль культура, но эз тырмыны опыта уджалысьяс, стрөйбаяс, сиктъясын шуисны восьтыны сэтшөм культура учреждение, көні эськө вөчис клублөн да библиотекалөн өтувъя удж. Тайө учреждениенас лои изба-читальня. Нёбдінын сэтшөмсө восьтісны 1924—1925 воясө. Изба-читальнясын уджалысьясөс шуисны избачьясөн. Медводдза избачнас Нёбдінын вөлі Дмитрий Фёдорович Латкин. Избачьяс нуөдісны ыджыд удж: тышкасисны пемыдлункөд, котыртлісны агрокружокъяс, көні төдмөдлісны уна вьльторйөн. А сідзжө пуктылісны сцена вылын йөзөс ышөдана спектакльяс. Таысь кындзи, избачьясөс тыртлісны и мукөд пөлөс уджөн. Гашкө, сы вөсна и уджалысьясыс ёна вежласисны: 20—30 воясө избачьясөн зілисны А.Т.Мишарин, Н.А.Макаров, И.С.Панюков, В.А.Латкин, Г.И.Макаров.

Унаөн волывлісны Нёбдінса изба-читальняө. Сідз, 1927 воё сэнi вёлөма кык сюрс гөгөр небөг, лыддысьөма 130 морт. Сэки судзөдөмаөсь «Югыд туй», «Коми сикт», «Новая деревня», «Правда», «Беднота» газетъяс; «Ордым», «Учись сам» да «Красная Армия» журналъяс.

Дас во сайө уджаліс Нёбдінса изба-читальня. Комынөд вояс помланьö культура учреждениеясын олөмыс төдчымөнъя вежсис. Культуралы пондісны вичмөдны пыр унджык сьөм, и тайө сетіс позянлун лөсьөдны виль стрөйбаяс, дасьтыны специалистъясөс да с.в. Библиотекалысь да клублысь уджсө кутісны нуөдны торъя йөз, торъя жыръясын.

1937 воясьнь Нёбдінса библиотекаын уджаліс Мария Ильинична Макарова, а 1938—1939 воясө зілисны Мария Александровна Панюкова, Фёкла Степановна Изъюрова да Михаил Фёдорович Панюков. Тайө воясө библиотека уджаліс сикт шөрын сулалысь Сөвет керкаын.

Война кадө библиотекаөн веськөдліс Августа Николаевна Турьева. Сиктса водзмөстчысьяскөд өтвылысь сійө вөчис докладъяс, лыддис лекцияс, нуөдіс лыддысьөмъяс, лэдзис стенгазетъяс да «боевөй листокъяс», котыртліс драматическөй, физкультурнөй, хорөвөй кружокъяс, дасьтіс «Герои Отечественной войны», «Фронт да тыл» и мукөд пөлөс выставкаяс.

1948 воясьнь библиотекаын уджаліс Татьяна Васильевна Макарова, а 1953 вояс март төлысьө сійөс вежис том специалист Елена Николаевна Исакова (Меникова). Бөрыннас сійө лои культураын Коми АССР-са заслуженнөй уджалысьөн. Нёбдінса библиотека йылысь казътивліс тадзи: «Сиктса библиотека да клуб сэки меститчисны вөвлөм поп керкаын. Көть и жыръясын вөлі көдзыд, олөмыс да уджыс пуис. Нуөдлім лыддысьөмъяс, небөг вежонъяс да сідз водзö. Сэки сиктса йөз ёна лыддысис-

ны, торйөн нин челядь. Библиотекаö воис уна газет-журнал, коми гижысьяслөн небөгъяс. Клубса уджалысьяскөд öттшöтш тшöкыда ветлывлім видз вылö, фермаö. Ытшкывлім и куртлім, отсалім картупель керны и весиг кукуруза пуктылім».

1955—1957 воясö библиотекаын зілис Александр Петрович Уляшев. А 1957 воя май тöлысьянь сэні босьтчис уджавны И.М.Панюкова (Макарова). 20 сайö во сиис тайö уджыслы Идея Мефодьевна. Тайö кадколастнас библиотека нёльысь вежліс олан жырсö, но та вылö видзöдтöг сэні пыр вöлі сöстöм да югыд. Идея Мефодьевна, зэв шань нывбаба, вочавидзліс быд юалöм вылö, корсьліс колана книга, а эз кө сюр небöгыс, корліс юркарысь. Гожöмнас сійö ветлывліс видз вылö, пажын дырйи тöдмöдліс турун пуктысьясöс выльторъясөн. Библиотека сетліс ыджыд отсöг и партийной съездъяслысь индöдъяссö олöмö пöртöмлы.

1978 воя арö Нёбдінын воссис выль культура керка, и библиотека вуджис сылөн мöд судтаас. 1980—1981 воясö библиотекараліс Валентина Семёновна Попова. А 1981 воя август тöлысьянь сэні öнöдз на зільö Савина Г.Д. Галина Дмитриевна тшöкыда пыртö аслас уджö уна выльтор. Топыд йитöд кутö сиктса школакöд да детсадкöд, культура керкакöд да музейкöд. Библиотекаас сöстöм, кыпид, гөгөр быдмöны дзоридзьяс. Сиктсаяс радейтöны воывлыны татчö: и челядь, и верстьö да олöма йöз. Талун кежлö Нёбдінса библиотека видзасын — 6292 небөг, а лыддысьны пыравлö 300 сайö морт.



Зиновий Петрович Соловьёв

Нелямын воысь дырджык уджалі Национальнӧй архивын да Национальнӧй музейын, аддзысьлі, сёрнитлі уна бур йӧзкӧд. Висьталышта ӧти татшӧм морт йывсьыс. Съӧкыд гижны, но 2011 вося мартын кувсис шань, небыд съӧлӧма морт — архитектор Владимир Иванович Сенькин. Дыр кад, 1967—1990 воясӧ, сійӧ вӧлі Сыктывкарын главнӧй архитекторӧн, а 1991—1996 воясын — республикаса главнӧй архитекторӧн. 1996 восянь бӧръя лунъясӧдзыс веськӧдліс аслас творческӧй мастерскӧйӧн. Владимир Иванович пӧртис олӧмас комынысь унджык проект. Медтӧдчанаясыс — Сыктывкарса администрациялӧн керка, Коммунистическӧй улица, Сыктывкарлӧн, Октябрьскӧй да Эжвинскӧй районъяслӧн генпланъяс, Великой Отечественной война воясӧ сыктывкарса усьӧм олысьяслы вечнӧй слава мемориал...

Эштытӧм вылас видзӧдтӧг, Владимир Иванович пыр шыӧдчыліс музейлӧн корӧмъяс вылӧ. 1993 воын сійӧ козьналіс музейлы Усть-Сысольск—Сыктывкарлысь XX нэм заводитчӧмсянь—60 воясӧдз фотояса 80 негатив. Ӧтчид аддзысьлігӧн сійӧ шуис, мый сылӧн эм Усть-Сысольсклӧн фото, вӧчлӧма сійӧс карас ссылкаын олӧгӧн Зиновий Петрович Соловьёв. Негативъясыс куйлӧмаӧсь ковтӧмӧн Сыктывкарса горисполкомлӧн культура отдел бухгалтерияын. Сизимдасӧд воясын найӧ веськалӧмаӧсь Сенькин В.И. син улӧ, да босьтӧма аслыс. Сӧрӧнджык нин Владимир Иванович сетис меным 19 фото да 4 негатив, мыйяскӧ на пиысь артмис туявны.

Лыда морт ӧні Сыктывкарын вермас висьтавны Зиновий Петрович Соловьёв йылысь. А ӧд сылысь нимсӧ сетлісны медводдза номера яслилы, кодӧ вӧлі кык судта пу керкаын Сӧветскӧй—Куратов туйвежын. 1998 восянь сәні православнӧй школа.

Со мый меным мойвиис тӧдмавны тайӧ морт йывсьыс.

Малӧй Сӧветскӧй Энциклопедиялӧн 8 томын (1930 во) гижӧма: *«Соловьёв Зиновий Петрович (1876—1928) — большевик, врач, ӧтув сӧветскӧй медициналы подув пуктысь да водзӧ сійӧс сӧвмӧдысь. Студенталігас, 1898 воын, Казаньын пырис партияӧ»*.

1904 воын, университет помалӧм бӧрас, русско-японскӧй война дырйи Соловьёв служитис врачӧн Краснӧй крест отрядын. 1905 воын уджаліс врачӧн Симбирскӧй губерняын. Вӧлі Симбирскас РСДПР-са комитетын членӧн.

Дмитрий Ильич Ульянов (В.И. Ленинлӧн вокыс), врач жӧ, казгытыліс тайӧ революционнӧй кадколастсӧ: *«Кор 1905 вося октябрын пансис политическӧй забастовка, ми кутім уджавны сыкӧд ӧтлаын Симбирскын, большевикъяслӧн организацияын. Зиновий Петрович энӧвтчис уджсьыс и ставнас сетчис револю-*

циялы да регыд нин лоис миян органи-
зацияын медводдзаяс лыдын».

Водзё лыддям Малой Советской Эн-
циклопедиясы: «...сэсся уджаліс Сара-
товын. Тайё воясас сійё лоис общест-
венной медицинаын тёдчана деяте-
льён. 1909 воын ыстисны куим во кеж-
лө Усть-Сысольскё». Татчө сійё локтіс
тюрмаын, отка камераын, окмыс тө-
лысь пукалём бөрын нин.

Кутшөмөн сэки вөлі Усть-Сысольск?
«...Карыс өдий паськалө. 1911 вося ян-
вар кежлө карас 6134 олысь, на пыын
3091 мужичдй да 3043 нывбаба. А ку-
им во сайын на сөмын вөлі 5100



олысь. Кар быдмөмыс мыйкө мында йитчөма велөдчанінгяс да
вузасянінгяс содөмкөд. Усть-Сысольскын эм: мужской да жен-
ской гимназияс, карса училище, ремесленной школа, духовной
училище... Велөдчысыс пөвстын унджыкыс зыряналөн (мещана
да крестьяналөн) челядьыс». «Быдсяма посни коланторнас да
сёян-юаннас, кыдзи и Устюгын, кызвынсө вузасё купеч Дербе-
нёв. Но эмөсь, дерт, и мукөд вузасьысыслөн лавкаясыс. Сидзжө
эм потребительской лавка да телеграфной станция».

Ассянь содта: өдий паськалысь карас вөлі и полицейской
управление. Ссылнойяс — 500 гөгөр морт — кызвынсө олісны
Усть-Сысольск дорышас: Парижын либө Кирульын.

Бурдөдыслөн воөм йылысь юөр өдий разаліс эз сөмын кар
пасьтала, но и орчча сиктьясөдз. Йөзыс кутісны локтөмөн
локны, но... «Соловьёв — бур агитатор, та вөсна бурдөдчан
уджсө сылы нуөдны оз позь» — тадзи пырысь-пыр шуис полиция
департамент.

Усть-Сысольскын З.П.Соловьёв уна кад сетіс научной уджлы:
ссылкаас олігөн медицина журналгясын сылөн вөлі йөзөдөма
20 гөгөр удж. Статьяясас сійё отвывтис Россияса губерниясын
инфекция висьомгяс бурдөдігөн чукөртөм кужанлунгяссө да
төдөмлунгяссө.

Ссылкаас Зиновий Петрович веськөдліс марксистской кру-
жокгясөн, дугдывтөг гижасис Д.И.Ульяновкөд, эз ородлы йи-
төдсө и суйөрсайса большевикгяскөд. Гуся литератураыс сійё
лөсьөдіс гуся библиотека, жандармгяс төдмалісны сы йылысь
сөмын 1912 вося арнас.

Ссылкаөдзыс на, тюрмаас пукалігас, Соловьёв висьмис тубер-
кулёзөн. Анна Ильинична Елизаровалы (В.И.Ленинлөн чойыс —
В.П.) 1911 вося май 5 лунся письмөын Соловьёв гижліс: «Тат-
чөс оломй, кутны кө төд вылын, мый ссылкаын, шогмана...
Но сын и омольыс, тані корсюрө овлө гажтөм... А сидзсө оз
шогав, весиг чуймала, кытысь мейн босьтчө татшөм збодерлу-
ныс да бурас эскөмыс».

Төдса куим патера, көні овліс Зиновий Петрович: өтиыс Трёх-
святительской улица вылын (өні Коммунистической) Стефанов-
ской площадь саяс, Никифоровгяс керкаын. Да кыкыс Усть-
Сысольскса Парижын, мещанкаяс Екатерина Васильевна Попова
да Евдокия Павловна Холопова ордын.

Зиновий Петрович бура ёртасис татчос олысьяскөд. Том войтыр, торйон нин каникулъяс дырйи гортъясанис воысь земскöй школаясысь велöдысьяс, тшöкыда пыравлисны сы дорö то книгага, то советла. Патераса көзяеваыс дай суседъясыс окотапырысь отсасисны гуся литература дзебöмын. А бурдöдны челядьöс, кодъясöс вайлисны весиг ылі грездъясысь, сійö пыр аддзыліс и позянлун, и кад.

Трехсвятительскöй улича вылын, Никифоровъяс дорсянь неылын, олісны Безносовъяс, налön Маша нылыс висис костнöй туберкулёзön. Сöмын Соловьёвлön бурдöдöмön да Москваö, Шереметьевскöй больницаö (öні Склифосовский нима институт — **В.П.**) ыстöм письмö отсöгön Маша Безносовалы 1910 воын вöчисны операция да сійö кутіс ветлöдлыны. Дерт, бурдöдліс Соловьёв и верстыöясöс.

Татшöм морт дінас йöзыс сибöдчисны: кывзыштны, бур совет юавны. Гашкö, и Соловьёвлön вöзйöм серти патераса көзййкаыслön, Е.П.Холоповалön, пиыс — Николай Степанович Холопов (церковно-приходскöй школаын велöдысь) — 1911 воын пырис велöдчыны Санкт-Петербургса психоневрологическöй институтö.

Мöд патераса көзййкаыслысь, Е.В.Поповалысь, Соловьёв йылысь казтылöмъяссö 1931 вося октябрын гижліс А.А.Цембер. Тöдмасямö накөд и ми. Медводз, **кöні оліс Зиновий Петрович:** «...Первой сійö оліс Томацкий ордын Северо-Западнöй улича вылын (öні Горький улича — **В.П.**), сэсся вуджис миянö (сійö жö улича вылас). Оліс торъя жырыын, но регыд мысти, верöслön кодалöм вöсна, ми Зиновий Петровичкөд петім суседъяс ордö. Первой Пуцятö, а сэсся и Авдотъя Павловна Холопова дорö. Сэні олім недыр. Верöсöй кувсис, да бөр мунім менам керкаö. Жыръяс сылön нинöм лишнöйыс эз вöв. Помнита, уджалаң пызаныслы воча öшаліс Христослön пустыньын портретыс».

Водзö, **мый нöшта вöчлывліс?** «...радейтліс Зиновий Петрович фотографируйтны. Снимайтліс Усть-Сысольскö, матігöгöрсö, асьсö. Сёйліс эз патераас, а столöвöйын мукöд ссылнöйяскöд. Оліс ёнджыкасö öтдортчöмön: пыр мыйкö гижис да уна лыддысис. Öти гожöмö сы дорö воліс воддза гöтырыс пыскöд. Арнас найö мунісны бөр».

Кызди шойччыліс? «...Зиновий Петровичлön вöлі пыж, сійö тшöкыда ветлывліс Сыктыв юті. Соловьёв зэв бура вартчис и велöдіс Вася пиöс. Öтчыд муні ю дорас вала (патерасянь неылын вöлі). Видзöда — кывтö пыж, а бöрас — шой. Горöді. Вöлöмакö, Зиновий Петрович: сійö сэтшöм бура кутчысис ва веркöсас, вермис вöрзытöг дыр куйлыны мыш вылас. Ветлывлім сыккөд вотчыны. А вöравнытö эз радейт».

Аддзысьлісны-ö сёрөнджык? «...Вит-öквайт во сайын (1925-26 вояс — **В.П.**), кор ветлі Москваö Вася дорö, пыралі и Зиновий Петрович ордö. Примитіс зэв шоныда. Уна юасис Усть-Сысольск йылысь. Öбедайті сы дорын. Корис нöшта пыравны Васякөд, но мöдысьсö менам эз нин артмы».

Кызди нин пасйылі, миянөдз воис 19 фото да 4 негатив. Негативъясын да 9 фото вылас — Усть-Сысольск, а мукöдас — кар матігöгöрыс. Зиновий Петрович радейтіс войвыв вөр-васö. Снимокъяс вылас — пожöма яг, ныв пуяс, миян юяс — Эжва, Сыктыв, Лёмью, Дырнös.

Усть-Сысольсклөн фотоясысь торъялö öти — Вознесенскöй вичко кöлöкöльясянь карлөн панорамнöй снимок. Фотосö козьналіс Соловьёвлы 1911 вося январ 14 лунö ссыльнöй ёртыс — И.Ан-типов. Нöшта кык бур фото: öти вылас куим зонка гожöмнас вуграсöны Сыктыв вылын, а мöдас — карса бульвар вылын (öня парклянын) гуляйтöны мöсьяс. Нöшта öти мича фото — Париж дорсянь снимайтöм төвса Усть-Сысольск. Бура тыдалö Стефановскöй вичко да монастыр вичкояс. Став снимокыс 1910—1912 вояся, джынйыс бурöсь на, мукöдыс — вижöдöма да вушъялöма.

Ссылка помасьöм бöрас, 1912 вося сентябрын, Зиновий Петрович Усть-Сысольскыс муніс.

1918 вося юлын З.П.Соловьёвöс индісны здравоохранениеса наркомöс вежысьöн. 1923 воын сійö лöсьöдö-котыртö да ачыс босьтчö веськöдлыны МГУ-ын социальнöй медицина кафедраöн. А 1928 воын, сьöкыда висьöм бöрын, Зиновий Петрович кувсьö.

Кык воён водзджык, 1926 воын, Усть-Сысольскын кувсьö патераса көзйякаыс — Евдокия Павловна Холопова. Сылөн пиыс, Николай, Санкт-Петербуркса психоневрологическöй институтын нель во велöдчöм бöрын нöшта помаліс военнöй училище да участвуйтис на Первой мирöвöй войнаын. Демобилизация бöрас локтіс гортас инвалидöн, бурдöдчыштіс да уджаліс школаын биология велöдысьöн. Но З.П.Соловьёвöс сійö эз вунöдлы, весиг комынöд воясас ветліг-мунігъясын некымынысь пыравліс гöтыр дорас. Маргарита Ивановна козьनावліс сылы кык фото. Öти вылас — ачыс З.П.Соловьёв, а мöдас — Усть-Сысольскса политссылнöйяс Народнöй домын «Ревизор» спектакль пуктöм бöрын.

1960 воын Н.С.Холопов, сэки нин Сыктывкарса медводдза номера женскöй школаын естествознание велöдысь, кувсис. Тайö кык фотосö сэся краеведческöй музейлы козьналіс сылөн ёртыс — Михаил Николаевич Харапов.

А Маша Безносова (сёрöнджык Мария Ивановна Йоль), кодöс отсаліс бурдöдны Зиновий Петрович, помаліс Усть-Сысольскса женскöй гимназия да тшöтш лоис велöдысьöн. Революция бöрас уджаліс партияын да пыр пыдди пуктöмön казътыліс Зиновий Петровичöс.

Эз вунöдлыны Коми мунымöс и Соловьёвлөн рöдвужыс. Маргарита Ивановна 1932 вося сентябр 24 лунся письмöын корöмön шыöдчыліс Коми облисполкомса председатель Ф.Г.Тараканов дінö, мед кыдзи вермасны, отсаласны З.П.Соловьёв нима сыктывкарса яслилы. А 1978 воын Зиновий Петровичлөн племянницаыс, Валентина Александровна, ыстіс Сыктывкарö, краеведческöй музейö, вылынджык пасйöм фотояссö да негативъяссö.



Енкöлаыс пыр отсалö...

*Енкöлаыс пыр отсалö пöртны
олöмö тiянлысь кöсйöмгяснытö, кöть
кутшöм мывкыдтöмөн найöс збыль-
вылас эз чайтны. Но тайö тiян кöс-
йöмгяс, и сöмын тi тöданныд, мында
вын сетöма найöс збыльмöдöм вылö.*

Пауло Коэльо.

2010 вося «Войвыв кодзув» журналлөн öкмысöд номерын вöлі йöзöдöма «Некор оз вун селигерса вой-лун...» очеркöй. Збыльысь öд, оз и вун. Ыджыд кöсйöмгяс пиысь öтиөн во чöж вöлі выльысь ветлыны Селигерö. И со — колян во меным бара эз мойви веськавны «Артпарад» смена вылö: том йöзöс эз чукöртны «Слово» нырвизьö. Но ме верми видлыны ассьым вынтьясöс мöдлаын. Сетi кык юöртöм: «Беги за мной» да проектъяс дасьтöм серти «Технология добра» сменаясö. И кыкнанас веськалі! Бöрйи мöдсö, öд олöмыс — тайö тшöтш проект, и колö кужны сійöс лöсьöдны колана ногөн, да и нöшта кольöм велöдчан вонас Юля Харкун нывъерткөд босьтчим коми кыв видзöм серти проектнöй уджö. Эм окотитöм, эм мöвпгяс, но олöмö найöс эг на пöртöй, и водзвыв ошйысьны ог кутöй. Чужöм думгяс серти гижим аннотация да босьтiм медыджыд донсö — сё балл.

Вобыднас Юлялысь пельсö жужжöдi Селигерөн, и сійö тшöтш ёна кöсийс сэтчö веськавны, а меным вöлі шуö, тэ пö висян форумнас, висян... Но ме эг дöзмы, öд тайö бур висьöм. Дыр виччысим тайö шуда кадсö. Миян смeналөн уджыс вöлі котыртöма мöд заездын — июль 9—17 лунтьясö. И гашкö, зэв бур, мый «Артпарадас» эг веськав, öд сэки Селигер ты дорас вöлöма ураган: пуясыс усьласьöмаöсь палаткаяс вылö, тöлыс жугöдöма уна техника, йöзыс доймалöмаöсь. Ёртлөн шуöм серти, неминуца дырйиыс чайтöмаöсь весиг, мый ловъяөн оз воны гортаныс. Енмыс видзис — эг адзыв тайö лоöмторъяссö...

Муннысö автобус таво миянлы мыйлакö эз сетны. Селигерöдз ковмис веськöдчыны аслынымлы. Юлякөд ньöбим плацкарт вагонö бöръя билетъяссö. Ме веськалі коймöд вагонö, а сійö — квайтöдö.

Туйö мöдöдчан асывнас неуна зэрис, но ми эг дöзмöй. Эм сэтшöм казаялöмтор: мыйкö кö заводитчö зэрсянь, то ставыс зэв бура артмас. И збыльысь! Кузь туйö мунiгад пыр мöвпалан, мед эськö шаньджык суседгяс веськаласны: сумкатö мед позис кольыны станцияö петалiгкостi, мед эз кодавны да эз горзыны. Пыри вагонö, а сэнi пукалö том зон, поезд вöрзъытöдз пырис мöд, коймöд, нельöд, витöд... Видзöдö ме вылö öти и шуö: «От

на төдөй, везитіс тэныд мянкөд мунны либө эз...» Ачыс нюмъялө. Вөлөмкө, тайө дембельяс, мунөны армияыс гортъясаныс. Туйбыдсө чөсмасисны быдсяматорнас, армияад, тыдалө, оз быдторнас вердны. Зонъяскөд, чайта, меным везитіс: пыдди пуктөмөн сёрнитісны, кор Юлякөд ас костаным варовитім комион, ёна нимкодясисны. Весиг торйөдчыны накөд вөлі жаль, но нинөм, өд өнія кадө, ёна кө көсьян, верман аддзыны өта-мөдтө отуввезысь да ёртасыны.

Москваө воөм бөрын поездө чукөртчисны Селигерө став мунысыс: коймөд вагонысь Юля, нельөдысь Вика, витөдысь Оксана да кык Наташа и квайтөдысь ме. Дас нель час чөж бовъялім юркарті. Кадыс вөлі уна, и ми шуим ветлыны Царицыноө.

Царицыно — тайө Москва лунвылын дворцово-парковой ансамбль, сійөс 1776 воын на тшөктылөма кыпөдны императрица Екатерина II. А кутшөм мича местаын гөрда-еджыда дворечьясыс: ыбъяс вылын быдмөмаөсь, и сэтшөм ылысянь тыдалөны. Царицыноын синтө гажөдөны фонтанъяс, и дзоридзяса помтөм-дортөм клумбаяс, и ыбъяссө йитысь джуджыдсыс-джуджыд посъяс...

Ёна мудзим паркөд ветлавны, но кызди нө он кежавлы Красной площадь дорө. Дерт, мян пиысь быдөн нин сэн вөлі, но окота йиджтыны тайө местаыслысь кыпыд русө. А сәсся недыр мысти заводитіс гымавны да зэрны...

Унатор Селигерын вежсьөма... Таво тані өтилаө котыртөмаөсь сөйөмсө: оз ков аслыд пөртйын пусыны. «Биотуалетъяс» пыдди унитаза кабинкаяс, көні весиг би эм. Оз быдөнлы сьөлөм вылас во татшөм вежсьөмъясыс, өд Селигерө том йөз төдөмлунъяс босьтөм кындзи мунөны и романтикала, но воысь воө йөзкотырлөн олан сямыс ньөжйөникөн бырөдө сійөс. Уна велөдчан шатөр местаө өні вөлі өти ыджыд. Инструктор кындзи велөдчөм вөсна кывкутіс и вожатөй, рытнас нуөдө рефлексия. Таво зэв ёна велөдчим, асывсянныс вөлі волонтерство да эффективой коммуникация занятиеяс. Обед бөрын VIP-лекция, кытчө воывлісны нималана йөз да юкисны асланыс кужанлунъясөн. А рытнас төдмөдісны фандрайзингөн да проектированиеөн. Велөдчигөн уна вельтор төдмалі проектной удж серти, босьті төдөмлунъяс сёрнитны кужөмын, восьті аслым вель мөвпъяс, вель йөзөс и весиг неуна ачымөс.

Меным мойвиис аддзысылыны пыдди пуктана войтыркөд. Со, шуам, здравоохранение министрлөн советник Софья Малявина висьтасис волонтерство да донорство йылысь. Нөшта селигерса велөдчысыскөд паныдаслісны олимпийскөй чемпионъяс Алексей Немов да Татьяна Навка. Ыджыд сцена вылын петкөдчисны бальной йөктөмъясын чемпионъяс. Ёна гажа вөлі группа «Город 312» концерт дырйи. Муслун да семья видзөм серти ныв-зонкөд сёрнитіс гижысь Наталья Толстая.

Бодибилдер, актёр, продюсер Александр Невскийлөн девизыс «Два капитана» романысь Саша Григорьевлөн кодь: «Бороться и искать, найти и не сдаваться». Тайө ыджыд тушаа ён мортыслөн зэв шань сьөлөмыс. Сійө велөдіс мянөс пыр отсавны неминучаө веськалысыяслы, инвалидъяслы. Быдмөма Александр Невский мамлөн велөдөмөн: «Эскан кө, воан көсйөмөдзыд» да Никита Михалковлөн «Свой среди чужих, чужой

среди своих» кино выlö мыджсьöмөн. Тайö мортыс збыльысь лоöма нималанаён: 2001 वोсянь снимайтчöма «Непререкаемый», «Красный Змей» да мукöд голливудскöй киноясын, гижöма «Как стать Шварцнеггером в России», «Кикбоксер», «Качалка для детей», «Все проблемные зоны: упражнения для женщин» книгаяс, вöлöма бодибилдинг серти ставмирса чемпионатъясын судьяён.

Чуймöдiс аслас кужöмъясөн Мухтар Магомедшарипович Гусенгаджиев. 1998 воын тайö мортсö пыртöмаöсь «Книга Рекордов Гиннеса»-ö кызди «Планетаын медся гибкöй мужичöйöс». Шуасны тай, енбия мортыд пö быдторйын енбия. Гимнастика кызди Мухтар Гусенгаджиев серпасасьö (и гижö весиг кокнас), пырöдчö музыкаö, ворсö театрын и киноын. Мухтар олöма 30 странаын, көнi пыр восьтöма аслыс ворсны кужанлунын выль нырвизь. Кор аддзан татшöм зiльысь йöзсö, окота налы ловъя-дырйиыс сувтöдны памятник...

«Технология добра» смена дырйи Селигерö воывлö вир босьтан мобильнöй станция. Некор на эг вöвлы донорён, поли неуна, öд кывлi, мый вир босьтöм бöрын лёк овлö. Но танi смелмöдчи юксьыны гежöда паныдасьлысь вирнам (мамö пыр вöли висьталö, мый менам положителнöй нельöд группа). Тайö асывнас зарядка бöрын эг котöртöй сёйны, а босьтiм паспортъяс да сувтiм öчередьö сдaiтны вир. Кöсйысьыс вöли уна, но эз ставсö примитны: кодлөн пö гемоглобиныс улын либö вирас уна белокыс, налы позьö сдaiтны сöмын плазма, кодлөнкö сöныс оз тыдав. Став инстанциясö вуджöм бöрын меным шуисны, мый вирсö сдaiтны позьö. Быдөнлысь босьтiсны 450 мл. Шуисны, тайö пö зэв уна медводдзаысь сдaiтысьяслы, но весиг эг казьявлы, мый мын вирыс этшаджык лоис. Мöдарö на, лунтыр сэсся быттö бордъя вöли! Сэтшöм нимкодъ, мый кодлыкö вöчи бур, öд менам вирöй кодлыкö отсалас кольны ловъяён.

Мöдысь волiгөн Селигерын ворсiсны нель көлысь. Дерт, жöник-невестаяс эз вермыны дасьтыны паськыд пызан куим сюрс гöсьт вылö, но невестаяслысь традиционнöй букетъяс позис видлыны кыйны. И меным веськалiс жö öти еджыдик дзоридз...

Гажа вöли Селигерын... Рытьяснас позис чукöртчыны ты бокö да сылыштны-ворсыштны гитараён, йöктыштны, ворсны волейболөн, велосипедөн панласьны, быдсяма тренажёр вылын ёнмöдчыны, пöттöдз купайтчыны радейтана тыын, пыравны öтуввез-кафеö, видлавны небöгъяс лыддьысянiнын, пырöдчыны быдсяма конкурсö, ветлыны мастер-классъяс вылö, весиг кинояс петкöдлiсны... Быд здук вайис сьöлöмлы долыд ру... А июль дас витöд лунö форум вылын вöли сiдз шусяна «День влюблённых». Сэки позис ыстыны муса мортлы мелi кывъяса письмö, сöмын валентинка вылын быть колö вöли пасйыны ним, ов да бейджлысь номер, öд лагерын куим сюрс гөгөр морт... Вöли и обнимашкаслөн лун — позис пöттöдз сывъясьны. Рытья чукöртчöм дырйи тöдтöм ныв разöдлiс кутшöмкö юöртöмъяс, меным тшöтш сетiс, а сэни гижöма — «Сывйышт менö». Киын кутi кабаласö, и кодi сöмын эз матыстчыв ме дорам...

Гажöдчöм кызди Селигерын вöли и траур лун. Ныв-зон öзтiсны сисьяс Татарстанын вöйöм теплоход вылын пöгигнитöм йöз понда. Тайö луннас Селигерын дугöдiсны став гажöдчöмсö.

«Технология добра» сменалён бөръя велёдчан лунас вёлі нуёдёма «Добровolec Селигера» делөвөй ворсөм. Босьтөм төдөмлуннас видлім вынъясымөс спонсоръяскөд сёрнитөмын. Чайта, тайё ворсөмсьыс быдмасны ён проектировщикъяс.

«Беги за мной» сменалён уджнас абу ёна төдса, но верма висътавыны, мый налөн быд лун нуөдсис мастер-класс бур сёян серти. А медся төдчанаяслөн лыдө пырис «Группа отвеса». Ыджыд сьөктаа том йөзлы дасьтисны зэв ыджыд вески, кытчө вермисны сувтны став кыксё кымын мортыс. Медводдза луннас налөн сьөктаыс вёлі өкмыс сюрс гөгөр кило. Лунысь-лун найё ёна уджалісны ас выланыс, бөрыннас нин тайё группаыс кок-няммис пөшти тонна вылө!

Медся нимкодён лоис меным колян वोся ёртъяскөд паны-дасьлөмыс. Эг и чайт, мый нөшта аддзысьла тайё дона йөзыс-көд! Паныдалі Наташа инструкторөс Курскысь, москваса Миша-өс да сочиса Сашаөс. И козыналі налы Сыктывкарысь вайөм магнитъяс. Ёртъяслы зэв любө лои, а Наташа пунктис став водзын мог: чукөртны воддза воын волөм 20 мортсө да бара өт-лаын воыны Селигерө.

Гажтөм вёлі торйөдчыны ёртъяскөд да колыны сьөлөмлы дона местаяссө, таво быттё гортө татчө волі... Бөръя рытнас миянлы разөдісны сертификатъяс, көні гижөма, мый збыльысь велөдчим «Селигер — 2011» том йөзөс велөдан Ставроссияса форум вылын. А войнас вёлі мичасьыс-мича салют, енэжө биа пөнарикъяс лэдзөм, ёртъяскөд колльөдчөм... Бөрдөмөдз лои... Ачым эг чайт... И колян во кө смена помасьтөдзыс на стөча төді, мый локтан онас быть вола, то таво эг вермы сетны кыв, өд таво помала университет, ковмас корсьны удж да оланін. Ог төд, мый выльсө ваяс тайё воыс, артмас-ө ветлыны радейтана лагерө... но төда, мый тайё быть коркө лоас... Бара паньөс колян वोся моз кытчөкө кольсьөма... Бөръя войнас вошөма. Мөд во сетла жө юөртөмөс... «Енкёлаыс век отсалө пөртны олөмө тіянлысь көсьөмъяснытө»...



Пошта кудйысь

Видза оланныд, «Войвыв кодзув» журналса дона редакция!

Ми зэв нин важон, уна во чож, лыддям журналнытö. Миян коми йозлы сійö зэв бур да интереснöй. Сэтшöм окотаысь лыддим Юрий Васютовлысь повесыт «Салдат Васюта», кодöс гижöма прöстöй да гөгөрвоана кывйон, дзик сідз, кызди сёрнитöны миян Емдін районын. Ставыс гөгөрвоана, ясыд, ёна и кажитчис! Миян верöскöд быд номер воом бöрын вöлі, рочон кө шуны, «громкая читка». Кажитчис сійон, мый сиктса том морт, коді кужö вöчны став уджсö — и вадорын кыйсö, вöрын оз вош, и войнадырся да бöрся сэтшöм лёк кадас сылы сюрöма став сьöкыдыс да лёкыс, кызди и миянлы, армияын служитигас некор абу ышнясьлöма, ошйысьлöма, а вöчлöма век сідз, кызди коліс бур салдатлы, и вөлöма бур радистон. Повесытас Ю.Васютов гижöма, мый зэв сьöкыд вöлі служитны Рига карын, öд сэкся олысьясыс унаон эз ёна радейтны миянлысь салдатысöс. Карö петалігөн пыр ковмыліс видзчысьны, мед мыйкö эз вöчны лёкöс. Да и веськавліс салдат Васюта сэтшöминас нывъяс ордын гөститігъясөн, но Енмыс век вөлöма сылön «пельпом вылас», видзлöма став лёкторъясысь. Прöст кадö гижиштас кывбур, лыддыштас небöг да газетъяс, гижиштас гортас письмö пöрысь бать-мамыслы. Зэв уна сьöкыдтор муніс сы вывті тайö куим во чожнас, но ставсö вермис венны том салдат. Бура помаліс службасö да воис гортас прамой верстыö мортон, а радейтана нылыс виччысьöма сійöс армияысь.

Чолöмалам тіянос ставнытö Виль воон, сиам зэв уна да бур повесыт на печатайтны коми йозлы. Став бурсö тіянылы виль 2012 воын. Радпырысь виччысям виль гижöдъяс.

**Мая Дмитриевна да
Иван Яковлевич Холоповъяс.**



ПЫДДИ ПУКТАНА АВТОРЪЯС!

Редакцияö гижöдъяснытö ыстігөн быть колö юртны:

1. Ассыныд ним, вич, ов; кор да көні чужлöмныд (лун, тöлысь, во).
2. Паспорт юбръяс: номер, серия, кор да көні сетісны, гортса адрес (прописка серти).
3. Индивидуальной налоговой номер — ИНН (кодлön эм).
4. Страховой свидетельство номер.

Тайöс юөрттöг редакция гонорар оз вешты.

*Журналын йöзöдтöм гижöдъяс
редакция оз рецензируют и авторыслы найöс оз мöдöд.
Редакция оз век во öти кывйö авторъяскöд.*

Комп. набор и верстка **Н.Кузнецова.** Корректор **Н.Габова.**

Адрес редакции: 167982. ГСП-2, г. Сыктывкар, ул. Карла Маркса, д. 229, Дом печати, каб. 202.
Телефоны редакции: 24-47-52 (гл. редактор), 24-51-52 (общ. отд./факс).
E-mail: kodzuv@mail.ru

Подписано к печати 14.02.2012. Формат 70х108^{1/16}. Печать офсетная. Усл. печ. л. 7; усл. кр.-отт. 8,4; учётно-изд. л. 7,54. Тираж 770. Заказ № . Регистр. ПИ № ФС 3 - 0226 от 20.12.2006 г. выдано Беломорским управлением Федеральной службы по надзору за соблюдением законодательства в сфере массовых коммуникаций и охране культурного наследия. Публикация материалов, направленных на освещение реализации социально-значимых проектов, осуществляется при государственной поддержке в форме субсидии Агентством Республики Коми по печати и массовым коммуникациям. Отпечатано в ООО «Кировская областная типография», 610004, г. Киров, ул. Ленина, д. 2. Цена свободная.